

# آراء الملوك

اثر  
سری کریدی

→→→○○○○←←←

منلی  
کتابچی آراکل

→→→○○○○←←←

معارف نظارت جلیله سنک رخصتیه طبع اولمشدر

→→→○○○○←←←

استانبول

(ا.م.) شرکت مرتبه مطبعه سی — باب عالی جاده سنده نومرو ۵۲

۱۳۰۳

SÜLEYMANIYE G. KÜTÜPHAN I

Kismi . Tekkeler - Nasip Ef

Yr I . 1 0

E. I . 1 0

Tasnif No

363



طوغری سوز

مقدمه بو مجموعه نك. مأخذينه يازمش اولديغم  
«تمهيد» ده شو وجه ايله فتح مقال ايتشدم، ديمشدم كه:  
«تحدیث مفاخری یولنده تعیر لائق بولمقدن عاجز  
اولديغمز ذات شوكتسمات حضرت پادشاهينك تعميم  
انتشار معارف جهته معطوف ومصروف اولان جلائل  
همم شاهانه لری آثارنددركه عصر مزده هر الى قلم  
طوتان بو الهوس، اخلافه برر يادكار اهداسنه هوس  
ايدرك آز زمانده پك چوق مأثر بديعه جلوه نماي ساحة  
ظهور اولمش در.

«بو مسلمدركه، هرهانكي مؤلفك وجدانه مراجعت  
اولنسه، قلمني اهترازه كتيرن بری - استفادة انام، او

شرکت مرتبیه مطبعه سی — باب عالی جاده سی  
نومرو ۵۲



بری - ابقای نیکنام آرزولرندن عبارت ایکی سائقه جیلی  
ایدوکنی اعتراف ایدر.

ایشته بو عبد عاجزی دخی او یولده تحریک خامه غیرته  
خواهشاندیرن مجرد او سوق طبیعی در.  
دیگر بر اثر عاجزانه مدهده شو نظمی کشیده سلاک  
ارتجال ایتمشدم، دیمشدم که :

نامنی آ کدیران آنجق اثریدر کشینک  
اثر خیری اولان کیمسه نیک اولمز نامی

نامنی آ کدیره جق بر اثری اولیانک  
قورور اصل شجر عزتی اولماز نامی

ینه او مقدمهده دیمشدم که :

«استطاعت علمیه نه قدر آز ایسه هوسم او قدر  
چوق، کندم نه درجه ادنی ایسه هم همتم او درجه عالیدر!»  
ایشته مجرد بو معنادر که، بکافوق الاقدار نشر آثاره

اشارتفرمای اجتسار اولیور . یوقسه حد ناشناسانه  
حرکتدن اجتنابک لزومنی بیلیمیه جک قدر صاینیسز دکلم.  
نحل ناتوانک بیک بر چیچکدن طوپلادیغی اجزاء  
لطیفه ایله وجوده کتیردیکی شهد شیرین کی، «آراء الملل»  
نامیله انظار ذوق آشنایان ادبه عرض ایدیلن بو مجموعه  
حکمت اشتمال دخی نیجه تصانیف معتبره دن مقتبس  
بر خلاصه دلنشیندر که، مطالعه سی حلاوت بخش ذائقه  
جان اولسه کرکدر . والله الموفق والمرشد.

انقره ۱۳۰۳

سری کزیدی



# آراء الملل

مقدمه

علم الغیب که، جناب حقہ مخصوصدر، بر عمان مجهولیت  
ایچنده مستور اولان احوال مستقبلی بیلک دیمک اولسنه نظراً  
اصول اعتقادیاتده کندی امتک یتمش اوچ فرقهیه منقسم اوله جغنی  
جناب رسالتناه افدمزک قبل الوقوع اخبار بیورمش اولسی صحت  
نبوت سنیه لرینی مؤید معجزات باهره دن دکلیدر؟

رسول الله صلی الله تعالی علیه و سلم افدمز « یاقینده امتم  
یتمش اوچ فرقهیه منقسم اوله جقددر . بونلرک بر فرقه سندن  
ماعداسی اهل نارددر » دیمش و او فرقه واحده ناجیه یی « وهی  
ما انا علیه واصحابی » امتیاز فاخریله فرق مخالفین دن تخصیص  
واستثنا بیورمش در .

« اختلاف امتی رحمة واسعة » حدیث عالیمی باب اعتقادده  
ظاهر حال وطریقت اصحابه متبع اولیان اهل خلاف حقنده  
جاری دکلددر . بوکا ظاهر لفظ حدیث دخی دلالت ایدر . زیرا

لغة ثابتدرکه خلاف ایله اختلاف آره سنده معناه فرق عظیم  
وارددر .

اختلاف — طریق وصول متفاوت، فقط مقصود متحد اولان  
شیده جاریددر .

مثلاً — زیارت کعبه قصدیله بر کیسه نك بغداددن، دیکرینک  
استانبولدن رهرو سمت حجاز اولسی کی .

ع

جمله نك مقصودی بر اما روایت مختلف

خلاف — احدها آخرک فعلنه مخالف ایشده بولنان ایکی  
کیسه ییننده اولور .

مثلاً — بر کیسه نك شرقه، دیکرینک غربه متوجه اولسی کی .  
طریقت ناجیه محمدیه ذاهب اولان اهل سنت و جماعتک  
خلافده اولوب ظاهر حال وطریق اصحابی منکر بولنانلرک ایسه  
شبهه یوق که طریق وصوللری ده، مقصودلری ده بشقه در . آنک  
ایچون بونلرک اهل حقه مخالفتی رحمت واسعه دکل، خسارت  
فاجعه در .

رحمت واسعه دیه توصیف بیوریلان اختلاف امت، فروع  
مسائل اجتهدیه حقنده کی اختلافات مجتهدیندر . ایشه بوراسی  
شایان دقتدر .



## تمهید

احکام شرعیہ، ایک ہیہ منقسمدر .

قسم اول - کیفیت عملہ متعلق اولان احکامدرکہ بونلرہ  
« احکام فرعیہ و عملیہ » اطلاق اولنور .

احکام مذکورہ ادلہ شعیہ دن مستنبط اولق سبیلہ (فرعیہ) در .  
عباددن صادر اولان کیفیت عملہ متعلق اولق حسیلہ ده  
( عملیہ ) در .

قسم ثانی - کیفیت اعتقادہ متعلق اولان احکامدرکہ بونلرہ ده  
« احکام اصلیہ و اعتقادیہ » تسمیہ اولنور .

بونلر احکام شرعیہ دن قسم اولک اصلی اولدیغی ایچون  
( اصلیہ ) در .

بو احکامدن مقصود نفس اعتقاد اولدیغی ایچون ده  
( اعتقادیہ ) در .

اعتقادک معنای لغویسی دوکلمنمکدرکہ بو مناسبتله بر شیئہ  
کوکل باغلامق معناسنه ده استعمال اولنور .

عقیده - عقائدک مفردی اولوب ربط قاب ایدیلن شیئہ  
اطلاق اولنورکہ بونک بزم اوزرمزه فقط بیلنسی واجبدر .

مثلا - جناب واجب الوجودک موجود، واحد، صانع

عالم، قادر و قیوم اولدیغی وسائر صفات جلال و کمال ایله متصف  
بولندیغی واحوال آخرت مثلی شیرلی بیلک کی .

احکام فرعیہ و عملیہ دن باحث بولنن علمه « علم شرایع  
واحکام » دنیلیر .

شرایع - شریعه نک جمعیدر .

شرعک حقیقتی وضع آلهیدرکہ عباد، دارمعاش و معادده  
صلاحلرینی مترتب اولان عقائد و افعال و اقواللرینک احکامنی  
آندن اوکرنیرلر .

ایشته وضع آلهی ایله موضوع اولان بو قانون مقدسه -  
فعل بمعنی مفعول اوله رق - شریعه دینیر .

شرع - دخی « شریعت » کی بو معنایه اطلاق اولنور .  
شرعک معنای اصلی لغویسی « اظهر » در .

شریعتک معنای « طریق ظاهر » و (موردماء) در . منقول  
عنه ایله منقول الیه اولان شو ایکی معنی بیننده کی مناسبت ایسه  
واضحدر .

نصلکه، بر طریق ظاهر و مستقیمه سالك اولانلر یوللرینی  
شاشرمیوب منزل مقصوده ایریشیرلرسه، وضع آلهی اولان احکام  
شریعتہ اتباع ایدنلر دخی کمکرده راه نجات اولیوب واصل



سرمنزل فلاح اولورلر . آنک ایچون شریعت، طریق ظاهره تشیه اولندی .

علم شرایع واحکام — علم فقه دیمکدرکه احکام شرعیهدن قسم اولک حفظی ایچون تدوین اولندی .

ایشته احکام شرعیه نك بو قسم اولی عدد معینه منحصر اولماز . حوادث فعلیه نك تعاقیله تزايد ایدر . بناءً علیه احکام مذکوره نك کاملاً احاطه سی قابل دکلدر . ( قدتغیر الاحکام بتغیر الزمان ) قوی بوکا اشارتدر .

احکام اصلیه واعتقادیهدن بحث ایدن علمه دخی « علم توحید وصفات » تسیه اولنور .

چونکه توحید وصفات مسائلی مباحثک اشهری، مقاصدینک اشرفی در .

بو دخی تعبیر قدیم اوزره ( فقه اکبر ) وتعبیر جدید اوزره ( علم کلام ) دیمکدر .

علم کلام — احکام شرعیهدن قسم ثانی نك حفظی ایچون تدوین اولندی .

بو قسم ثانی حد ذاتنده مضبوط اولوب حوادث فعلیه نك تعاقیله تزايد ایتمز . بناءً علیه بونک احاطه سی متعذر دکلدر .

## مفردات

احکام — حکمک جمعی اولوب حکمکده اوچ معناسی وارددر .  
 ۱ — بر امری ایجاباً و یا سلباً آخره اسناد ایتمک .  
 ۲ — نسبتک وقوع و یا لاوقوعنی ادراک ایتلک .  
 ۳ — بالاقتضا، یاخود بالتخییر افعال مکلفینه متعلق اولان اثر خطاب الله . « وجوب، اباحه، وبونلرک امثالی » کبی .  
 اقتضا — فعل و یا ترکی طابیدن عبارت اولوب درت نوعدر .  
 ۱ — ترکدن منع ایله عیددن طلب فعلدرکه بوکا ( ایجاب ) دیرلر .

۲ — یالکز طلب فعلدرکه بوکا ( ندب ) دینیر .  
 ۳ — فعلدن منع ایله ترکی طلبدرکه بوکا ( تحریم ) دینیر .  
 ۴ — یالکز فعلدن منعدرکه بوکا ( کراهت ) تسیه اولنور .  
 ( مندوب ) مستحب دیمکدر .  
 تخیر — اقتضانک عدیلی اولوب فعل و ترکی عدم طلبدرکه بوکاده ( مباح ) دینیر .

## اهل الاهواء

اهوا — هوی لفظنک جمعیدر .  
 هوی — من غیر داعیه الشرع نفسک شهواتدن مستلذ اولدینی شیئه میلاننه دیرلر .



اهل الاهواکه، بونلرک عنوان دیکری ده (اهل قبله) در .  
باب اعتقاده اصحاب رسول اللهک ظاهر حال و طریقتلری  
اوزره جاری و آنلره متبع اولان اهل سنت و جماعتک خلافتده  
اولوب ظاهر طریق اصحابی منکر اولدقلرندن « طائفه مخالفین »  
و « اهل بدعت و ضلالت » تسمیه اولندیلر .

آتی ده بیان اولنهجی وجه ایله بعض مسائل اجتهدیهده  
بین الاصحاب ظهور ایدن اختلافات جزئییه ایسه بدعت و ضلال  
قیلندن دکلدر .

ینه آتی ده تفصیل اولنهجی وجه ایله باب اعتقاده صحابه  
کرامک ظاهر حال و طریقتلرینی انکار ایله اک اول قواعد  
خلافی تأسیس ایلین (معتزله) فرقهسیدر .

الحاصل صدر اسلامده صحابه کزین ایله اخیار تابعین شرف  
مصاحبت نبی و قرب عهد پیغمبری برکاتی اولان صفای عقیدتلری  
و وقایع و اختلافاتک قلت و ندرتی وثقات مسلمینه بالمراجعه حل  
شبهه ایتمهک امکانی جهتیهله علم فقه و کلامک فروع و اصولی،  
ابواب و فصوله تقسیم و ترتیب احتیاجندن مستغنی ایدیملر .

وقتاکه اهل اهوانک ظهوریه بین المسلمین فتنه و فساد، حادث  
اولدی، اختلاف آرا سببیه تکثر ایدن وقوعات و فتاوی علمای  
دینی نظر و استدلال، اجتهد و استنباط، تمهید قواعد و اصول،  
ترتیب ابواب و فصول ایله اشتغاله مجبور ایدوب مدونات علوم  
شرعیه بو صورت وسیله وجوده کلمش در .

شویله که :

احکام عماییه بی ادله تفصیلیه سندن بالاستنباط بیلدرن علمه (فقه)،  
احکام فرعییه بی افاده سی حیثیتله احوال ادله دن اجمالاً باحث اولان  
علمه (اصول فقه)، احکام اعتقادییه بی دلائیلله بیان ایدن علمده  
(کلام) نامنی ویردیملر .

### مفردات

فتاوی — فتوانک جمعیدر . دعوانک جمعی اولان (دعاوی) کی .  
دقت بیوریایورمی ؟ « دعاوی » لفظی « فتاوی » وزننده در .  
مع مافیه بنغزده شایع اولدینی وجه ایله و اوک کسریله ده  
استعمالی صحیحدر دیمشدر .

فتوی — شاب قوی معناسنه اولان (فتی) دن مأخوذدر .  
مستفتی اجوبه حادثهده مسائلی تقویه ایتدیکچون فتوایه (فتوی)  
دینلدی .

نظر — فکر دیمکدر .

مطالب کسبیه نک تحصیلی انتقالینه محتاجدر .

انتقالک اولکیسی — مطالبدن مادییه، ایکنجیسی — مبادیدن  
مطالبه حرکتدر .

حرکت اولی — ماده بی، حرکت ثانیه — صورتی تحصیل  
ایدر .



«ترتيب امور معلومة لتحصيل مجهول» معنائه اولان فكر، حركت اولى ايچون لازم، حركتين ايله مسبوقدر.

استدلال - دليله نظرله اولور.

ايستر علتدن معلوله، ايستره معلولدن علتله اولسون.

اجتهاد - لغتده جهددركه مشقتى تحمل ديمكدر.

اصطلاحده «استفراغ الفقيه الوسع ليحصل له ظن لحكم

شرعى» معناسنه دركه «نيل مقصود ايچون بذل مجهود» تعبير معروفيله ده مراد بودر.

استفراغ الوسع - بونك معناسى تمام طاقت وقدرتى بذل

ديمكدر. بر صورته كه نفس مجتهد، مزيد عليه دن عادتاً عجزى نى حس و ادراك ايله.

مجتهد مطلق - يعنى مستقل بالمذاهب اولان مجتهدك

شرطى، احكامه متعلق اولان آيات قرآنيه نى جمع ايله بونلرك معانى لغويه و شرعيه سنه، اقسامنه عالم و موارد اجماعك علمى حاوى اولمقددر. تاكه اجتهادى موارد اجماعه مخالف اولسون.

علم فقهك موضوعى - حلال و حرام اولان افعال مكلفيندر.

اصول فقهك موضوعى ادله سمعيه دركه بونلر دخی كتاب ۱

سنت ۲ اجماع امت ۳ قياس فقهادر ۴

دلالت اجماليه - امر كى در.

امر - وجوه شتاده مستعمل اولوب مشهورى اون سكر وجهدر.

امر - وجوب ايچوندر.

نهی - تحريم ايچوندر.

ادلة تفصيليه - «ما يصدق عليه الامر والنهى» تعبيريله تعريف اولنمش در.

كلام - سحاب وزنده مطلق سوزده دينير. مفيد اولسون اولسون.

كلام ايكيدير. كلام نفسى، كلام لفظى.

كلام نفسى - نفس متكلمده قائم اولان معنادر.

ان الكلام لى الفؤاد وانما

جعل اللسان على الفؤاد دليلاً

بيت مشهوريله، و جناب عمر بن خطابك خطبه مشهوره سندن مأخوذ «و كنت قد زورت فى نفسى مقالة اقولها» قولييله كلام نفسينك وجودينه استدلال اولنور.

تفصيلى «نقد الكلام فى عقائد الاسلام» نام كتابمزدده مندرجدر. «سر قرآن» نام كتابمزدده ايضاحات كافيه واردر.

كلام لفظى - كلام نفسيه دلالت ايدن الفاظ و عبارات و اشارتدن عبارتدر.



علم کلامک (کلام) تسمیه اولنسنه برقاچ سبب بیان ایتمشلردر.  
اک مهمی سبب آتی در.

اهل اهوا خلفای عباسیه زماننده «قرآن، مخلوقدر» دیه  
آندن اول هیچ ایشیدلماش برسوز چیقاردیلر.

خلفای مشارالیهمدن بعضاری بوسوزه قاپلیدیلر. هرکسی  
وباخصوص ائمه دین و علمای مجتهدینی سورت مخصوصده جالب  
وامتحان ایدرک خلق قرآنه قائل اولیانلری انواع عقوباته  
اوغراتدیلر. کینی آصدیلر، کسیدیلر. کینی زندانه آتدیلر. حاصلی  
بواوغورده چوق ذوات محترمنهک دماء محرمهسنی هدرایتدیلر.  
رؤسای اهل الاهوا اولان معتزله دخی خلفای مشارالیهمه  
مداهنه ایله سلب صفات و خلق قرآن مسئلهسنده مظاهرت  
ایلدیلر. بناء علیه کلام نفسی الهی بی اثباتده علمای اهل سنتله  
اهل اعتزال ییننده خیلی قیل وقال وایچه نزاع و جدال وقوع  
بولدی. بوسببله علم کلامه (کلام) دینلدی. حکمتله مخلوط اولمیان  
«کلام متقدمین» بودر.

وقتا که (مأمون) خلیفه زماننده فلسفه یونان، عربجهیه نقل  
اولندی. خلق فلسفیات ایله زیاده توغله باشلادی. بو توغل  
بالاخره فساد عقائدی منتج اولماق ایچون فلسفیاتک عمده مقاصد  
ومسائلی بالتحقیق مغایر شرع شریف اولان جهتی رد و ابطالده  
احراز تمکین و ثبات مقصدیله متکلمین دخی فلسفیات ایله پک  
چوق اوغراشه رق علم کلامه بوندن خیلی شی درج وادخال ایلدیلر.

حتی طبیعیات والاهیاتک باشلوجه مسائلی دخی درج ایدوب  
هله ریاضیات ایله اول قدر اوغراشمشلر و علم کلامی برحاله  
کتیرمشلر که اگر دلائل سمعیه بی دخی مشتل اولمسیدی، علم کلامک  
فلسفه دن فرقی قالمیه جقدی.

ایشته «کلام متأخرین» دخی بودر که فلسفه ایله مختلطدر  
وبالجمله علم کلام، اشرف علومدر.

چونکه احکام شرعیهک اساسی وعلوم دینیهک رئیسی در.  
اشرف علومدر.

چونکه علم کلامک معلومات و مسائلی، عقائد اسلامیه  
وغایتی - یعنی فائده و منفعتی، دین و دنیا سعادتلرینه فوز  
وظفردر.

اشرف علومدر.

چونکه برهانلری علی الاکثر ادله سمعیه ایله مؤید حجج  
قطعیه در.

واقعا سلف صالحدن بعضیاری علم کلامی طعن ایله تعلیم  
وتعلمدن منع ایتمش ایسهده آنلرک بو طعن ومنعی آنجق عقائد  
حقه مسلمینی افساد، قصدنده بولنان و عقائد بابنده غوامض  
ومشکلات متفلسقین دن محتاج الیه اولمیان شیلرله اوغراشان کیمسه لره  
کوره در. یوقسه اصل واجبات و اساس مشروعات اولان بویه بر علم  
جلیلی تعلیم وتعلمدن منعک صواب اولدینی نصل تصور اولنه بیایر؟



## مشرع

محققدرکه خاتمۀ شرفنامۀ نبوت صلی الله علیه وسلم افندمن  
بالاخانۀ علیینی تشریف بیوردقلرنده باطناً نفاق، ظاهراً وفاق  
اوزره بولنان اشخاصدن ماعد اهل اسلام بر عقیندهده راسخدم،  
برطریقدهه ثابتقدم ایدی.

وقتا که خاتم الانبیا صلی الله تعالی وسلم افندمن عزم  
کلشنسرای عقبی بیوردیلر، مجرد مراسم دین میینی اقامه، مناهج  
شرع قویمی ادامه غرضیله کفر و ایمانی ایجاب ایتمین بعض مسائل  
اجتهادیده بین المسلمین سرنمای ظهور اولان اختلاف، صحابه  
کرامک آخر ایامندک شیئاً فشیئاً ترقی ایدردی. تا که معبدالجهینی،  
غیلان الدمشقی، یونس الاسواری نام کیسهلر ظهور ایدوب  
قدرده و جمیع اشیایی تقدیر خدایه اسنادده عقائد صحیحه اربابنه  
مخالفت ایلدیلر.

ایشته باب اعتقادده صحابه کرامک ظاهر حال و طریققلرینی  
انکار ایلله اک اول قواعد خلافی تأسیس ایدنلر بونلردر.

آندن صکره برمنطوق حدیث نبوی اهل اسلام یتمش اوج  
فرقهیه متفرق اولنجهیه قدر خلاف - تشعبدن، آرا - تفرقندن  
خالی اولمادی.

## کفر و ایمانی ایجاب ایتمین اختلافات

کتب سیر رسول اللهک همان جملهسنده و باخصوص کتب  
معتبرۀ کلامیهدن شرح موافقده گذارشپذیر خامۀ تحقیق اولدیغنه  
کوره بین المسلمین اک اول (وصیت) مادهسنده اختلاف اولندی.  
شویله که:

رسول الله صلی الله تعالی علیه وسلم افندمن خستهلکی مشدد  
اولدیغنده اصحاب کرامنی نزد هایونلرینه جمع ایدوب جملهسنه خیر  
دعا وبر چوق نصایح ایفا بیوردقدن صکره او جمعیتده «اثنونی  
بقرطاس اکتب لکم کتاباً لاتضلوا بعندی ابدأ» بیوردیلرکه،  
خلاصۀ مآلی «بکا کاغد ودوات ویرکز! سزه بر وثیقہ یازدیم؛  
بندن صکره کمکرده راه نجات اولیهسکر.» دیمکدر.

رسول الله صلی الله تعالی علیه وسلم افندمنک بو وصیتنامهده  
نه یازه جقلری معلوم دکلدی. «عمر بن خطاب» ایسه کیم بیایر  
نصل بر ملاحظهیه مبنی «رسول الله خستهلکک شدندن کندینه  
مالک دکلددر. بزه کتاب الله کافیدر.» دیهرک تحریر وصیتنامهیه  
مخالفت ایلدی. بونک اوزرینه حضار کرامدن کیمی احضار  
ادوات دوات ایلله انفاذ امر پیغمبری، کیمی رأی عمری استصواب  
ایدرك بین الاصحاب کفتکو چوغالدی. بر درجهده که حبیب ادیب خدا



صلی الله علیه وسلم افندمن بیحضور اولوب «یانمدن قالدکتر! حضور نبی ده نزاع اولماز.» بیوردیلر.

احباب کرام دیگر محله چیقوب تکرار حضور پر نور نبوی به کیردکارنده وصیت بیورملرینی رجا ایتمشلر ایسه ده فخر عالم افندمن وصیت بیورمیوب «آرتق نبی ترک ایدکز! زیرا بنم بولندیغم حال بکا تکلیف ایتدی ککزشیدن احسندر.» بیوردیلر.

### استطراد

صبحی پاشا حضرتلرینک بر محاکه سی

پاشای مشارالیه حضرتلری (حقائق الکلام فی تاریخ الاسلام) نام اثر معتبرلرنده بو وصیت ماده سنی وجه مشروح اوزره نقل و حکایه بیوردقدن صکره دیدیلر که:

رأی عاجزانه مه کوره بوراسی جای تأملدر.

«بکا کاغد و دوات ویرکز.» دیدکارنده بعض احباب «ان النبی یهجّر» دیوب حضور سعادتلرنده نزاع اولدی. «انیا حضورنده نزاع اولماز.» دینجه احباب دیگر محله چیقوب بعده ملخانه طلب وصیت ایتدیلر دیو کتب سیرده یازلمشدر. وکویا بوسوزی دین (عمر) رضی الله تعالی عنه ایمش.

بو بحثده برقاج وجه ایله اطراد و تناسب کورنمز. بلکه بعض محلنده تناقض دخی عیاند.

برنجیسی - حجة الوداعده نیجه بیک کشینک مواجهه سنده عامه حجاجک حضورنده قرائت ایلدکاری خطبه ده «کلام اللهی وسنت رسول اللهی سزه سراج طریق هدایت ایتدم. تمسک ایدرسه کز ابداً یولی شاشرمازسکز.» دیمش ایدیلر. بونک عقینده دیگر وصیتیه حاجت قالمامش ایدی. خصوصاً حجة الوداع، خطبه سنی تلاوت ایدرلرکن عامه حجاجک مسموعی اولمق ایچون صوت عالیلری ایردیکی محلندن احباب آلوب دها اوتیه ایصال ایدرلردی که، عرفه ده اولان جمله حجاجک مسموعی اولسون. اوجهتله حجة الوداع خطبه سی بزه متواتراً کلوب صحتده هیچ برشبهه من یوقدر.

ایکنجیسی - کتب معتبره و اخبار موثوقه ایله ثابتدر که، احباب کرام نزد سعادتلرنده اول درجه ده ادب و محویتده ایدیلر که، وجه سعادتلرینه بیله امعان نظر ایده مزلردی. بناءً علیه حضور سعادتلرنده نزاع ایتک اوله بیلورمیدی؟

اوچنجیسی - ایستدیکی کاغد و دواتی ویرمه مخالفت ایتدکدن صکره مصرأ وصیت طلب ایتلریدر. بونده تناقض ظاهر دکلیدر؟ عمر رضی الله تعالی عنه بویله برقبا حرکتی اسناد یاقیشورمی؟ عمرک ذات همایونلرینه اولان صدق و محبتی بر درجه ده ایدی که ارنحاللری خبری شیوعنده کندوسندن کچوب «محمد اولمدی» دیو



اصرار ایلدی و ابوبکر رضی الله عنه ارتحاللارینی اعلان ایدنجه عمر بایلوب یره دوشمیدی؟ بونده محققین سیر، متفق الکلمه در. بوصفته اولان ذات، رسول الله علیه السلامک آخر نفسنده آحاد ناس، مواجهه سنده سویلیمیه جک بر سوزی سویلرمی؟ بو تعقل اولنورمی؟ او یله ایسه بو بحثده غرض وارد.

کویا وصیت، علی کرم الله وجهه نك خلافتی ایچون اوله جقمشده اصحاب بونده قیل وقال ایتدیلر دینلش! اکر بو صحیح اولسه مؤخرأ نیچون طلب وصیته اصرار اولنسون؟

بونده دخی نظر و بحث وارد. فرض ایدلم که، رسول الله علیه السلام بو سوزی سویلش اولسونلر! بونده حضرت علی به خلافت وصیتی تعقل اولنماز. «سزه بر شی یازدیم که بندن صکره ابدأ یولی شاشرماز سکر». دیمشلر ایمش! علی رضی الله تعالی عنه ابدی دکل ایدی که، امته الی الابد رهتما اولسون. سقیفه جمعیتنده ابوبکر رضی الله تعالی عنه بیعت اولندقدن صکره ابوسفیان، علی بن ابوطالبک یانه کیدوب «کل! سکا بیعت ایدلم. اکر مخالفت اولنورسه، (مکه) نی سوار ی و پیاده ایله طولدرم». دیدکده انفعال ایدوب «سنک غرضک اسلام بیننه تفرقه قویمقدر». دیهرک ابوسفیاندن اعراض ایتدیلر.

رسول الله علیه السلامک مرضلری مشته اولدیغنده عباس رضی الله تعالی عنه علی کرم الله وجهه یه «کندوسندن صکره خلافت ایده جک کیم اولدیغنی رسول اللهدن سؤال ایله!» دیدی.

«بن بونی صورمام. زیرا بزه وصیت ایتیمیه جک اولورسه، ابدأ بزه خلافتی ویرمز لر.» دیدی.

ابو بکره بیعت اولنمقده اولدیغنی علی خبر آلدقده کیجه لک البسه ایله مستجراً خانه سندن حیقوب بیعتدن صکره آرقه سندن کوندریلان البسه سنی (سقیفه) ده کیدکلری ابن اثیرک (الکامل) نام تاریخنده مذکوردر.

رسول الله علیه السلام کیمسه یه خلافتی وصیت ایتدکلری متواتردر.

صبحی پاشا حضر تلرینک کلامی بوراده بتدی.

پاشای مشارالیهک شو انتقادات مدققانه لری اصحاب کرام حقلرنده مأمور اولدیغمز حسن ظنه موافق اولوب مسئله مجبوت عنها حقبنده شمدی یه قدر هیچ بر مورخ بویله بر محاکمه یوروتما مشدر. لکن عقل قاصر محجه محاکمه نك بعض نقطه سی جای بحث و نظردر.

اولا - سیر رسول اللهی ضبط و تحریر ایدن بو قدر علمای اعلامک معال بالعرض دینیان بویله دوزمه بر وقعیه یی بالاتفاق صحیح اولق اوزره تلقی ایدهرک کتابلرینه یازملری و علی الخصوص اصل واجبات و اساس مشروعات اولان علم کلام مباحثی میاننه درج ایله «مبدأ اختلاف اهل اسلام بودر.» دیملری اذهانی تردده دوشورمز می؟

بالعموم مدققین علمایه - باخصوص فوق العاده اهمیتی حائر



اولان بويله بر امر ديني ده ب نصل اسناد غفلت ايد بيليرز؟  
صكره علمای ديندن ثقه واعتمادی قالدير مق لازم گلزمی؟ شو قدر که  
پاشای مشاراليهک دیدیکی کبی بويله بر قبا حرکت دخی حضرت  
عمره حقیقه یاقیشدیر یله ماز . بناءً علیه بونده انسانه حیرت  
الویرسه سزادر .

یالکز شوراسی وار که حضرت عمر، بشریتدن منسلخ،  
انیاکبی معصومه دکل ایدی . آنک ایچون حسب البشریه بويله  
بر حرکتده بولنمش اولمسی ده عقلاً استبعاد اولنه ماز .  
ثانیا - نبيذیشان افندمرك ایستدکاری کاغدودواتی ویرمه  
اصحابدن بعضیلری مخالفت ایتدکن صكره مصرأ وصیت طلب  
ایتمرنده تناقض وار بیوریلور .

رای قاصرانه مه قالیرسه بونده تناقض یوقدر . ندامت واردر .  
ابتدا وقوع بولان مخالفتک مغایر ادب اولدینی صكره بالملاحظه  
آکلاشیله رق مخالفت واقعه دن اظهار ندامتله ویاخود حصول  
اکثریتله طلب وصیت ایتمش اولملری نه دن جائز اولسون ؟

ثالثا - ابو بکر الصدیقه بیعت اولنقدده اولدینی حضرت علی  
خبر آلدقده کجهک البسه ایله مستجلاً خانه سندن چیقوب بیعتدن  
صكره آرقه سندن کوندریان البسه سنی (سقیفه) ده کیدکاری  
حقنده (ابن اثیر) تاریخندن منقول کلامده ده نظر واردر .  
چونکه حضرت علینک حضرت ابو بکره بیعتدن بر مدت  
تخلفی اهل سیر بیننده متفق علیه اولوب کتب کلامیه ده ده مصر حدر .

محققدر که امام علی، حضرت فاطمة الزهرانک «رضی الله  
عنها» داربقایه ارنحاله قدر بیعتی تأخیر ایلدی .

بیعت عامه دن آتی آی صكره امام علی بیعت ایده جکنی  
خبر ویردیکنده خلیفه رسول الله حضرت ابوبکر الصدیق فوق  
العاده سونمش وحائز اولدینی اهمیت عظیمه جهتیله منبر رسول  
اللهه چیقوب بیعت امام علی بی ناسه اعلان وتبشیر بیورمش  
اولدینی کذلک کتب سیر و توارینخده رقمزده کذلک اهل تحقیقدر .  
ابن اثیر (الکامل) نام تاریخنده کرچه صحیحی پاشا حضرت تلرینک  
بیان بیوردقلری فقره بی ده یازدی . فقط فقره مذکوره اسلوب  
کلام عرب اوزره ضعف روایت دلالت ایدن (قیل) صیغه  
تمریضیه مصدر اولدقن بشقه آندن اولده، صكره ده کرک امام  
علینک وکرک دیگر بعض صحابه کرینک بیعتدن تخلفلرینی و امام  
مشاراليهک آتی آی قدر بیعتدن تخلفی صحیح اولدینی ده بیان  
ایلدی . ایشه مورخ مومی الیهک عبارده سی شودر .

الکامل - جلد ۲ صحیفه ۱۳۵

«... فقالت الانصار اوبعض الانصار لانبايع الا علياً قال  
وتخلف علي وبنوا هاشم والزبير وطحة عن البيعة وقال الزبير لا  
اغمد سيفاً حتى يبايع علي فقال عمر خذوا سيفه واخربوا به الحجر  
ثم اتاهم عمر فاخذهم للبيعة - وقيل لما سمع علي بيعة ابي بكر خرج



فی قیص ماعلیه ازار و لارداء عجلاً حتی بایعه ثم استدعی ازاره  
ورداءه فتجلله - و الصحیح ان امیر المؤمنین مابایع الابد ستة اشهر.  
والله اعلم

مورخك صحیح اولمق اوزره قید و تصریح ایلدیکی قول مشهوری  
ترك ايله ضعفنه اشارت ایتدیکی قول غیر مشهور ايله اثبات مدعا  
اولنه بیلیرمی؟

باخصوص ینه مورخ مومی الیهك او صحیفهده قید ایتدیکی  
خطبة عمرده دخی «... وان علیاً والزیر ومن معهما تخلفوا  
عنا فی بیت فاطمة و تخلف عنا الانصار... الخ» دینلش درکه  
بوندده حضرت امامك بیعت ابو بکردن تخلفی مصرحدر.  
بو خطبه ایسه بر خطبة موضوعه اولیوب کتب کلامیه نك جمله سنده  
کلام نفسی بی اثبات ایچون ایراد ایدیلن (و کنت زورت فی نفسی  
مقالة اقولها) سوزینی دخی حاوی اولان خطبة مشهوره درکه  
بوکا هیچ دیه جك یوقدر.

مورخ مومی الیه یوز او توز سکرنجی صحیفهدهده «قال الزهری  
بقی علی و بنوا هاشم و الزیر ستة اشهر لم یبایعوا ابا بکر حتی  
ماتت فاطمة رضی الله عنها فبایعوه» عبارده سیله دیگر بر روایت  
صحیحه دها نقل ایلش درکه امام علینك، بنی هاشمك، زبیرك وفات  
حضرت فاطمه یه قدر آتی آی بیعت ابو بکردن تخلف و تأخر  
بیورمش اولدقلرینی اشعار ایدر.

## ذیل

بنی هاشمدن بشقه بیعت ابو بکردن تخلف ایدنلر کتب سیر  
وتواریخده بر وجه آتی مضبوطدر:

زبیر، عتبة بن ابی لهب، خالد بن سعید بن العاص، مقداد  
بن عمرو، سلمان فارسی، ابوذر، عمار بن یاسر، براء بن عازب،  
ابی بن کعب، بونلرک کافه سی حضرت علی به میل ایتشاردی.  
مشار الیهمدن بشقه ابو سفیان دخی بیعتدن تخلف ایلدی.  
عتبة بن ابی لهب بو بایده شعر آتی ايله بنی هاشمه و خاصه  
امام علی یه اولان میلنی اعلان ایتشدر:

## شعر

ما کنت احسب ان الامر منصرف عن هاشم ثم منهم عن ابی حسن  
عن اول الناس ایماناً و سابقه و اعلم الناس بالقرآن و السنن  
و آخر الناس عهداً بالنبی و من جبریل عون له فی الغسل و الکفن

من فیه مافیهم لا یمترون به  
ولیس فی القوم مافیهم من الحسن

اسلامده اولان سبقنی امام علی کرم الله وجهه حضرت تباری  
دخی بیت آتی ايله بیان و اعلان بیورمشدر:  
سبقتمک الی الاسلام طراً  
غلاماً ما بلغت اوان حلمی



§

اسامة بن زيدك جیشندن تخلفده اختلاف اولندی .  
شویلهکه :

جناب فخر عالم افندمن حال صحتلرنده حوالی شامیهده  
متوطن عرب متصره دن (قضاءه) قیلهسی اوزرینه مکمل براردو  
ترتیب ایدوب آزادلوسی زیدک اوغلی اسامه بی سرعسکر نصب  
وتعین ومعیته کبار مهاجرین و انصارندن بعض ذواتی مأمور  
بیورمشر ایدی .

کروه منافقین بونی بین الاصحاب تفرقه قویغنه وسیله ایتک  
ایستدیلر . اوتهده بروده دهنکشای اعتراض اولوب « باقکر !  
حضرت محمدکه، اجله مهاجرین وانصاری بر غلامک معیتنه  
ویریور ! » دیمکه باشلادیلر . بو خبر وحشت اثر، واصل سامعه  
سید البشر اولنجه « آنک پدری زید حقتنده اعتراض اولنخیدی .  
حال بوکه زید، مأمور اولدیغی ایشه نصل لایق ایدیسه اسامه نکهده  
امارت جیشه اقتداری واردر . همان ای اصحاب ! طور میکر !  
مأمور اولدیغکر جهته کیدکر ! هرکیم جیش اسامه دن تخلف  
ایدرسه ملعوندر . » بیوردیلر .

بو صرهده رسول الله افندمنک مزاجی منحرف و کوندن  
کونه خسته لکی مشدد اولمغله شاید داربقایه ارنحال بیوررلرسه  
مقر خلافتی محافظه ایچون اردوی هایون متأنیانه حرکت ایدیوردی .  
وقتا که هجرت سنیه نك اونجی سنه سی ربیع الاولنک اون

ایکنجی کونی رسول الله صلی الله علیه وسلم افندمن ارنحال داربقا  
بیوردیلر، بنیان ایمانلری هنوز رصانتکیر استحکام اولیان قبائل  
اعرابک کیی عمومأ، کینک بعض فروعی « نعوذ بالله » ارتداد  
ایلدی . یالکر قریش ایله بنی ثقیف قیلهلری اسلامده ثبات  
ایلدیلر . لکن بونلر دخی برطرفدن حضرت رسول اللهک  
رحلتی، او برطرفدن مخالفارینه نسبتله کندیلرینک عددجه قاتی  
جهتیه ایله مظلومه یاغموره طوتلش قیون سورسی کی متحیر  
قالدیلر .

برکون کبار اصحاب، عقد انجمن مشورت ایدوب حضرت  
صدیقه « یلیرسکرکه هرکس جیش اسامه یه جند مسلین دیور .  
عربک حالی ایسه معلومکدر . لایق اولان شمدیلک جماعت  
مسلمینی تفریق ایتیوب یانکده طوتلمیسن . » دیدیلر .

حضرت صدیق دخی امر رسالتپناهی یه مخالفت ایددمیه جکندن  
بحثله « بوراده یالکرلقدن یرتیجی حیوانلرک طعمه دندان اشتهاسی  
اوله جغمی بیاسهم، ینه امر نبوی یه امتثالاً البته جیش اسامه بی  
تنفید ایلرم . » جواب قاطع النزاعیه تکلیف واقعی قطعاً رد و باب  
مناظره نی سد بیوردیلر . ارنحال نبی مناسبتیه مدینهده طوپلانان  
عسکر اسلامی (جرف) نام محله کی اردوگاهه چیقاردیلر .

بووجه ایله امر رسالتپناهی واراده خلافتپناهی یرنی بولدقن  
صکره سرعسکر « اسامه » معیتده بولنان عمر بن خطاب چاغروب  
« شمعی مدینه یه کیت ! خلیفه رسول الله عرض ایتکه ناسک



وجوه و متخیزانی بنمله کیدیور. مدینه تنها قالیور. خلیفه رسول الله، حرم نبوی به و سائر مسلمینه مشرکین تسلط ایدر دیه قورقارم. تنسیب بیوررلر سه عسکرله مدینه به عودت ایدهیم. دیدی. حضرت عمر مدینه به متوجه اولنجه صناید انصاردن بعضیلری اسامه نك حدات سندن بحث ایدرک آندن یاشلی برذاتی سر عسکرلکه تعیین بیورملرینی خلیفه رسول الله عرض ایتسنی کندینه اخطار ایلدیلر.

عمر رضی الله تعالی عنه اسامه دن آلدینی امر اوزرینه نزد حضرت صدیقه واروب ابتدا اسامه نك دیدیکنی عرض ایلدی. صدیق اکبر آکا جواباً «یا لکرلقدن پامال کلاب و ذئاب اوله جغمی بیلسم، ینه امر رسول الله مخالفته جیش اسامه بی کری چویرمام!» دیدی.

حضرت عمر بو جوابی آلدقندن صکره صناید انصارک رجاسنی ده عرض ایلدی.

بو دفعه حضرت ابوبکر الصدیق، اوطوردینی یردن صحرا یوب قالقدی. حضرت عمری صقالندن طوتدی. «آنک سنی غائب ایتسون ای خطا بک اوغلی! حضرت رسول اللهک امارت جیشه تعیین بیوردقلری ذاتک تبدیلانی بکا نصل تکلیف ایدم بیایرسین؟» دیه آزارلادی وهان بالذات معسکرهایونه عزیمت بیوروب سر عسکر اسامه ایله کوروشدی و جمله عسکره خطاباً «کیره جککز مملکتده چوجق وقادینلرک و عموماً پیرلرک

و مناسترلرده عبادتله مشغول اولانلرک حیاتی محافظه ایده جکسکر و مأکول اولان هر نوع دیشی حیوانی ضرورت اولدقجه کسمیه جکسکر و آغاچلری کسوب یاقیه جکسکر. بوامرلریمی محافظه ایدیکز!» دیدی و آنلری ماشیاً تشیع ایلدی.

اسامه، خلیفه نك ماشیاً تشیعندن محجوب اولوب «یا سزدخی بینک! یاخود رخصت ویرکز، بن ده آندن اینهیم.» دیدی.

حضرت ابوبکر الصدیق «جناب حقه قسم ایدرم که، نه سنی آندن ایندیررم، نه بن بینرم. راه حقه بر ساعت قدردمی آیاغم توزلانسون؟ حال بو که غزایه کیدن مرد مجاهد هر آتدینی آدیم ایچون یدی یوز ثوابه نائل اوور؛ کندی نك درجه سی عندالله یدی یوز قات یوکسلیر؛ یدی یوز سیئه سی محو اولنور.» دیدی و بر خیلی مسافه یوریدی. دونه جکی صروده کندینه معین اولق اوزره عمر الفاروقی یاننده براقسنی اسامه دن ایستدی. اسامه دخی موافقت ایتدی. ابوبکر الصدیق، عمر الفاروقی استحقاقاً مدینه به عودت ایلدی.

اردوی هایونک بو وجه ایله (قضاءه) اوزرینه حرکتی مسلمانلر حقنده موجب نفع عظیم اولدی. زیرا نفاق اوزره بونان طوائف عرب «مسلمانلر قوه کافیه مالک اولمسالر، بو عسکری شوزمانده مدینه دن چیقاروب غزایه کوندرمز لردی.» دهرک اسلام علیهنده اولان منویات و تصورات فاسده لرندن چوغنی فعله چیقارمغه جسارت ایدم مدیلر.



ۛ

رحلت نبوی ده اختلاف اولندی.

شویله که :

رسول اکرم صلی الله علیه وسلم افندمک آغرشدیغنی  
استخبار ایتدکارنده اسامه، عمر، ابو عبیده «رضی الله تعالی عنهم»  
اردودن قالقوب مسجد شریفه کلمش ایدی. امهات مؤمنین، روح  
پرفتوح محمدینک اوچوب اعلائی علیننه کتدیکنی کورنجه فریاده  
باشلادیلر. آنلرک فریاد وفغانی ایسه مسجد شریفده کی اصحاب  
کرامی شاشرتدی وعظیم تلاش واضطرابه دوشوردی.

حضرت علی قالب بی جان کبی اولدیغی یرده طوکه قالدی.  
حضرت عثمان دیلی طوتیلوب دلسز کبی ایلدی.

حضرت عمر بویله بردهشتلو حالی کورنجه مدهوش اوله رق  
قلیجه طاوراندی. «هرکیم حضرت پیغمبر فوت اولدی دیرایسه،  
بوینی اوریرم!» دیهرک قلیج النده و آیاق اوزرنده طوره قالدی.  
حضرت ابو بکر کندی محله سنده ایدی. کلوب بو حالی  
کوردی. همان حجره سعاده کیردی. اول فخر عالمک یوزینی  
آچدی. کوردی که روح پر فتوح اوچوب کتمش، فقط سائر  
ناسک جنازه لرنده کی چرکین حاللر آنده یوق؛ جسد شریفی لطیف  
ونظیف اوله رق ینه نور کبی یاتیور.

«آه! مماتک حیاتک کبی کوزلدی.» دیهرک اوپدی، آغلادی.  
ومبارک یوزینی اورتدی. واهل یتته تسلیت ویردی.

بعده اول یار غار صدیق حیقوب مسجد شریفه کلدی. «ای  
ناس! هرکیم که محمده طاپیورایسه بیملی که محمد اولدی. وهرکیم که  
اللهه طاپیور ایسه بیملی که الله باقیدر، اولمز.» دیدی وهان (وما  
محمد الا رسول قد خلت من قبله الرسل افان مات او قتل انقلبتم  
على اعقابکم ومن ینقلب علی عقبیه فلن یضر الله شیئاً فسیجزی  
الله الشاکرین.) آیت کریمه سنی او قوددی.

معنای منیفی «محمد دکل، الا رسولدر. آندن اول نیجه  
رسوللر کلوب کچمشدر. او اگر اولور، یاخود قتل اولنور ایسه  
سز کیرو دونه جکمیسکز؟ هرکیم کیرو دوزر ایسه الله بر ضرر  
ایتمز. الله ایسه نعمت اسلامک شکرینی ایدنلره مکافات ایده جکدر.»  
دیمک اولور.

بو آیت کریمه احد غزاسنده «محمد قتل اولندی!» دیو  
بر سس ایشیدملکه اهل اسلامه پک زیاده شاشقینلق و پریشانلق  
کلسی اوزرینه نازل اولمش ایدی. اول وقتدنبری اصحاب کرام  
بو آیت کریمه بی کرات ایله ایشتمش و دفعات ایله تلاوت ایشتمش  
ایدی. لکن رسول اکرمک وفاقی اوزرینه اول مرتبه حیرته  
قالدیلر و او یله بردن دریای غم و افکاره طالیدیله که کویا اول آتی  
هیچ ایشتمش کبی اولدیله. حضرت ابوبکر اول آتی او قورایکن  
حضرت عمرک عقلی باشنه کلدی. رسول اکرمک وفاتنه ایناندی.  
دیزلرینک باغی چوزلدی. یره دوشدی.

(قصص انبیا - ج. پ)



§

تعیین مدفن نبوی ده اختلاف اولندی .

شویله که :

رسول اکرم افندمن وفات ایدنجه اصحاب کرام بیننده اختلاف آرا حاصل اولوب « کیمی مکده، کیمی مدینه ده، کیمی سی ده قدسده دفن اولتلیدر. » دیر ایکن حضرت صدیق کلوب « پیغمبر لر وفات ایتدکلیری یرده دفن اولنور لر. » دیه بر حدیث شریف نقل وروایت ایتکله بیت عایشه ده فراش سعادتلیری قالدیر یلوب اوراده دفن ایدلی .

### استطراد

خدمت مقدسه تجهیز و تکفین، امام علی کرم الله وجهه و حضرت عباس ایله مخدوملری فضل و قم و موالی رسول الله بن اسامة بن زید و شقران رضی الله عنهم حضراتنه تودیع اولندی .

جسد هایون جناب سید المرسلینی غسل ایدن امام علی اثنای غسلده تقلیب ایدن حضرت عباس ایله مخدوم مکرملری فضل و قم - صوبی دوکن اسامه و شقران - لحد شریفی حفر ایلین ابو طلحة الانصاری - قبره ایندیرن امام علی ایله فضل و قم و شقران ایدی .

### استطراد

سیده النساء حضرت فاطمة الزهرا والده مزك فراق پدر تأثریله سویله مش اولدینی قطعه بلیغه در .

ماذا علی من شم تربة احمد ان لا یشم مدى الزمان غوالیا  
صبت علی مصائب لو انها صبت علی الایام صرن لیالیا

صحابی اطلاقه سزاوار اولانلر کیلدر ؟

بوراسی تحت اختلافده در .

سعید بن مسیب حضرت تلیری یالکر لاقول برسنه نزد ساعی جناب رسالتپناهیده طوروب آنکله برلکده غزایه کیدنلری صحابی عد ایدردی .

بعضیلری دیدی که : بلوغه ایرمش اولدینی حالده نبی اکرم صلی الله علیه وسلم افندمنی کورمش اولان اهل اسلامه ولو که یالکر بر ساعت مقداری شرف صحبت نائل اولمش اولسون صحابی دینلیر .

کیمی دیدی که : صحابی - رسول الله صلی الله علیه وسلم افندمنك متخصص موالاتکاری، محرم اسراری، سفر و حضرده اول فخر عالمك یار غمکساری اولانه اطلاق اولنور .



اکثر علمانک رأی بونک اوزرینه در که صحابی - مسلمان اولدینی  
 حالد حضرت پیغمبرک مبارک جمالنی کورن، برده ولوکه پک آز  
 مدت اولسون شرف صحبت نبویه نائل اولان ذاته دینیر.  
 شو قول اخیره کوره حین ارتحال نبیده موجود اولان  
 اصحابک مجموعی یوز یکرمی درت بیک نفره بالغ اولور.  
 رسول الله افندمن مکه فتحنه اون بیک، حنین غزاسنه اون  
 ایکی بیک، حجة الوداعه قرق بیک نفر صحابی ایله عزیمت  
 بیورمشلر ایدی.

#### طبقات اصحاب

برنجی طبقه - خدیجة الکبری، علی المرتضی، زید بن حارثه،  
 ابوبکر الصدیق رضی الله تعالی عنهم کی اسلامده حائز شرف  
 تقدم اولانلردر که اوتوز طقوز نفر اولدقلری حالد حضرت  
 ارقم (صفا) اوزرنده اولان خانه سنده طوپلانوب رسول اکرم  
 ایله کیزلو مصاحبت ایدرلردی. قرقچیلری اولان حضرت عمر  
 اول خانه ده ایمانه کلدی.  
 ایکنجی طبقه - حضرت عمرک اسلامندن صکره اسلام ایله  
 مشرف اولانلردر.

اوچنجی طبقه - مکهدن حبشهیه هجرت ایدنلردر.  
 دردنجی طبقه - عقبه ده برنجی دفعه بیعت ایدن انصاردر.  
 بشنجی طبقه - ایکنجی دفعه عقبه ده بیعت ایدن انصاردر.

آلتنجی طبقه - اوچنجی دفعه عقبه ده بیعت ایدن انصاردر که  
 یتیم ذاتدر.

یدنجی طبقه - مدینه منوره ده مسجد نبوینک بناسندن مقدم  
 فخر عالم افندمنک مسجد قباده بولندقلری زمان مکهدن هجرت  
 ایدوب کلنلردر.

سکزنجی طبقه - بدر غزاسیله حدیبیه سفری آره سنده  
 هجرت ایدنلردر.

اونجی طبقه - اهل بیعت رضواندر که حدیبیه ده تحت الشجره  
 بیعت ایدنلردر.

اون برنجی طبقه - حدیبیه مصالحه سندن صکره وفتح مکهدن  
 اول هجرت ایدنلردر.

اون ایکنجی طبقه - یوم فتحده اسلام اولانلردر.

اون اوچنجی طبقه - رسول اکرم افندمنی ادراک ایدوب  
 کورن صیان مسلمیندر.

صحابه کریندن بر فرقه جلیله ده اوارکه آناره اهل صفه  
 دینیر. بونلر منزللری، عشیرتلی اولیان فقراء مسلمیندر که عهد  
 سعیدنبویده مسجد شریف صفه سنده یاتارلر واوراده سایه لیرلردی.  
 بناء علیه آکا نسبت اولنه رق کندیلرینه اهل صفه دینلدی.

حضرت رسول الله هر آقشام طعامنده اهل صفه نك بر آزینی  
 کند یاننده آلیقویوب سائرینی اصحاب کرامک خانه لرینه کوندرلردی.



هربری بر خانه ده طعام ایدردی . ابوهریره ، واثله بن الاسقع ،  
ابوذر حضراتی اهل صفه نك مشاهیرنددرلر .  
(قضص انبیا - تاریخ ابی الفدا)

§

امر خلافتده اختلاف اولندی .  
شویله که :

ارمحال نبی کونی انصاردن بعضیلری کندی ایچلرندن امیر  
انتخاب ایتمک املیه نبی ساعده صفه سنده طوپلانیدیلر . (خزرج)  
قبیله سنك رئیس اولان (سعد بن عباده) نامزاج اولدینی حالده  
اورایه کلوب انصاره خطابت ایلدی . دیدی که :

«ای جماعت انصار! سزك دینجه نائل اولدیغکز فضل و مزیت  
بشقه قبیله لرده یوقدر . محمد صلی الله تعالی علیه وسلم نیجه ییللر  
قومی ایچنده اکلندی . آنلری دینه دعوت ایلدی . ایچلرندن پك  
آز کیسه ایمانه کلدیسه ده کفار ایله جهاده و دین اسلامی اعزازه قادر  
اوله مدیلر . جناب حق سزی شرف اسلام ایله مشرف قیلدی و رسول  
اکرم ایله اصحابنك محافظه سنی سزه میسر ایلدی . دشمنلر اوزرینه  
اك زیاده شدت کوسترن سزلر اولدیکز . طوائف عرب سزك  
قلیچلرکز سایه سنده ایستر ایسته مز اطاعته کلدی . و رسول اکرم  
سزلردن راضی اولدینی حالده وفات ایتدی . شمعی امارت و ریاست  
سزك حقکزد . آنی بشقه سنه ویرمیکز !»

انصاردن حاضر اولانلر دخی آکا «الله موفق ایلیه ! رأیکده  
اصابت ایلدك . بزده سنی امارته انتخاب ایلرز .» دیدیلر .

اما (اوس) قبیله سی کندی رئیس لری اولان (اسید بن  
حضیر) ك باشنه اوشدیلر و تردد و اندیشه یه دوشدیلر . چونکه  
(اوس) و (خزرج) قبیله لری ایکی قرن داش اوغللری اولدقلری  
حالده مقدما یینلرنده عداوت ظهور ایله محاربه لر وقوع بولمشیدی .  
بعده اسلام ایله مشرف اوله رق بارشدیلر . وهپ دین قرنداشی  
اولوب برلشدیلر و هجرتدن مقدم مکیه واروب عقبه ده حضرت  
پیغمبره بیعت ایتدکلرنده ایلرو کلنلرندن اون ایکی کیسه سائرلری  
اوزرینه نقیب و رئیس نصب و تعیین بیورلمشیدی . ایشته بو اون  
ایکی نقییدن بری (سعد بن عباده) و دیگرلری (اسید بن حضیر)  
ایدی و انصاردن امیر انتخاب اولنه حق اولدینی تقدیرده بوایکیسندن  
برسی انتخاب اولنق لازم کلیردی . حال بوکه ایکیسندن هر هانکیسی  
انتخاب اولنسه دیگر طرفك رقابتی موجب اولوردی . بنا علیه  
اوسیلر ، اسید بن حضیرك یاننه طوپلانیدیلر و «امارت بر کره  
خزرجیلرک انه کچر ایسه فیمابعد محکم داعیه سنه دوشرلر و بزری  
اصلا ایشه قارشدرمازلر .» دیو فسیلیدی یه واردیلر .

مهاجرین ایسه انصاردن برینك امارتی قبول ایتمک احتمالی  
یوق ایدی . زیرا قرشیلر اشرف قبائل عرب اولدقلری جهته  
بشقه برقبیله نك امری آتته کیره مزلردی . فقط سعد بن عباده نك



نطقی انصاره پک زیاده تأثیر ایتدیکندن همان آکا بیعت اولنق اوزره ایدی .

حال بوکه ابتدا خزر جیلر ایله اوسیلر بیننه رقابت کیره جک و آنلر بینلرنده اتفاق ایتسه لر مهاجرین آنلره مخالفت ایده جک والحاصل اهل اسلام ایچنه بر عظیم تفرقه دوشه جک ایدی . بوا یسه مات اسلامیة حقنده بر بیوک تهلهکه ایدی .

ایشته او یله طار و تهلهکلی بر وقتده ابوبکر الصدیق، عمر الفاروق، ابو عبیده بن الجراح «رضی الله تعالی عنهم» حضراتی اورایه خضر کبی کلوب ایرشیدیلر . شویله که :

حضرت عمر الفاروق، انصارک اول وجهه ایله جمعیت ایتدکلرینی ایشدیکی کبی حضرت پیغمبرک خانه سعادتیه واردی . حضرت ابوبکری جاغردی . کیفیتی خبر ویردی . حضرت ابوبکر الصدیق دخی حضرت عمر ایله حضرت ابو عبیده بی آلوب آنلر ایله برلکده بنی ساعده صفه سنه واردی . اول وقت انصاردن بری قالقوب «بز لر انصار رسولز . بز لر اسلامک مهیا عسکری یز . ای مهاجرین ! سز لر بزم ایچمزله کلوب صیغنش بر جماعتسکز . امارت بزم حقمزدر .» دیوردی .

حال بوکه رسول اکرم هر هانکی مجلسده بولنسه صاغ طرفه ابوبکری وصول طرفه عمری آلوردی .

ابو عبیده حقنده ده (بوامتک امینی در) دیر ایدی . بوکره

اوچی بردن اورایه کلنجه، صانکه رسول الله دیرلش اورایه کلش کبی اهل اسلامک قبلرینه تأثیر ایلدی و هرکس آنلرک سوزینه منتظر اولوب حضرت ابوبکر دخی نصل که رسول اکرم خطبه ده باشلار ایدیسه، اول وجهه ایله ابتدا جناب حقه حمد و ثنا ایتدکلر صکره عمومیه خطاباً «بوامت مقدما طاشدن و آغاجدن یامه بتلره طاپاردی . جناب حق کندوسنه عبادت و کندوسنی توحید ایتملری ایچون آنلره رسول کوندردی . عرب قومنه بابالرینک دینی ترک ایتمک کوچ کلدی . حق تعالی حضرتلری مهاجرین اولینی ایمان ایله ممتاز قیلدی . آنلر حضرت پیغمبره یار و غمکسار اولدیلر . و آنکله برلکده مشرکینک اذا وجفاسنه صبر و تحمل ایتدیلر . ایشته یر یوزنده ابتدا حقه طاپان و رسولنه ایمان ایدن آنلردر . رسول اکرمک یار وفاکاری و نصیر صدیق آنلردر . بو بابده آنلره کیسه منازعه ایده مز . مکرکه ظالم اوله . ای انصار ! سز لده دینجه قدمکز و فضل و مزیتکز انکار اولنه ماز . جناب حق سزی دیننه و رسولنه نصرت ایچون انتخاب ایتدی و سز لره رسولنک هجرتی میسر قیلدی . بزجه دخی مهاجرین اولیندن صکره سزک مرتبه کرده بشقه کیسه یوقدر . رسول الله نصرت ایتدیکز . آنکچون دعوی ایتدیککز فضل و شرفک اهلیسکز . بوکا کیسه نک بر دیه جکی یوقدر . فقط امارت بختده قبائل عرب . آنجق قریشی بیلور . بشقه سنک امارتی قبول ایتمز . زیرا قریش قومی حسب و نسجه عربک افضلدر .



ومملکتی جزیرة العربک وسطیدر. بز امرایز. سزوزراسکر. هیچ بر مشورتدن کپرو براغلامازسکر. سزک رأیکز آلتخادجه برایش کورلمز. « دیدی.

حضرت عمر دخی انصاره خطاباً « رسول اکرم خسته ایکن سزی بزه وصیت ایتدی. اگر سز امرای اوله حق اولیدیکز بزی سزه وصیت ایلردی. « دیو ابوبکرک کلامنی تأیید ایلدی. انصار دیه جک سوز بوله میوب فکر ومطالعهیه طالایلر. فقط ایچلرندن « حباب بن منذر بن جموح » قالقدی. انصارک اعلای دین ده سبق ایدن خدمتترینی تکرار ایدرک « اوس و خزر جدن بر وقریشدن دخی بر امیر اولسون. « دیدی.

حضرت عمر الفاروق، « ایکی امیر بر منصبده اجتماع ایده مز. پیغمبر هانکی قبیله دن ایسه خلیفه سی دخی اول قبیله دن اولمیدر. اولیه اولمازسه والله عرب قومی قبول واطاعت ایتمز. « دیدی. (حباب بن منذر) آنی رد ایله « ای انصار! بودینه عرب قومی سزک قلیچلرکز ایله اطاعت ایلدی. حقکزی بشقه سینه قاپدر میکز! « دیدی.

عمر، آنی تکدیر ایلدی. اودخی سرد جوابلرله مقابله ومجادلهیه باشلادی.

اول وقت (ابوعبیده) سوزلرینی کسوب « ای معشر انصار! للهدن قورقکز! - اتم اول من آمن ونصر فلا تکنونوا اول من بدل وغیر - اسلامه قوت ویرن، دینه نصرت ایدنلرک اولی سز

ایدیکز. صاقین ابتدا ایشی بوزان دخی سز اولمیه سز! « دیدی. بوکفتار دلپذیر، حضاره حسن تأثیر ایدوب در حال انصاردن وخزرج قبیله سندن سعد بن نعمان بن کعب بن خزر جک اوغلی بشیر «رضی الله تعالی عنه» آیاغه قالقوب « ای اصحاب! انتباهه کلکز، بدیهیدر که حضرت محمد قریشی در. آنکچون امر خلافته ده آنک قومی احق و اولادر. بزم اسر جهادده و نصرت دین ده مسابقتمز جهتیله فضلز منکر دکدر. لکن بزم آندن مراد من اللهک و رسولنک رضالرینی تحصیلدن عبارت ایدی. بز بوندن طولایی دنیاچه عوض ومکافات ایسته میز. بناء علیه نیل دنیا ایچون اهل حقه تعرض لایق دکدر. « دیدی.

حباب بن منذر « یا بشیر! عمزاده که [ یعنی سعد بن عباده یه ] حسد و نفسانیت ایدیورسین. « دیدی.

بشیر بن سعد « یوق والله اولیه دکل لکن حقلرینی غصب ایچون خلق ایله منازعه یی کریه کوریورم. « جوابی ویردی. ایشته اول وقت حضرت ابوبکر الصدیق « سزه بو ایکی ذاتی انتخاب ایتدم. برینه بیعت ایدکز! « دیو عمر الفاروق ایله ابوعبیده یی کوستردی.

ایکیسی بردن عرض معذرت ادب ایتدیلر. و « حضرت پیغمبرک ایلری کچیردیکی ذاتک اوکنه کیم کچه بیلیر؟ « دیدیلر. بوصره ده کفتکو چوغالمغله حضرت عمر الفاروق « سنک تقدیمی رسول الله سنی نمازده کندیسنه خلیفه ایتمکله بزه کوستردی.



سَنَك اوزرك. امارتى قبول ايدرمى يز؟ الكى اوزات! بيعت ايدهم. « دیدى .

بشير بن سعد، مسابقتله جمله دن اول بيعت ايدرك سائر ناس دخی طاقم طاقم کلوب بيعت ايتديلر .  
(على الاكثر قصص انيادن منقولدر)

يوم بيعتك فرداسى حضرت ابو بكر الصديق منبر رسول الله حيقوب خطبه آتیهنى اوقودى .

خطبه

«ايها الناس قدوليت عليكم ولست بخيركم فان احسنت فاعينوني وان اسأت فقوموني الصدق امانة والكذب خيانة والضعيف فيكم قوى عندى حتى آخذله حقه والقوى ضعيف عندى حتى آخذ منه الحق ان شاء الله تعالى لا يدع احد منكم الجهاد فانه لا يدعه قوم الا ضربهم الله بالذل اطيعوني ما اطعت الله ورسوله فاذا عصيت الله ورسوله فلا طاعة لى عليكم قوموا الى صلاتكم رحمكم الله»

ترجمه سى [\*]

«ای ناس! سزه امير اولدم. آنجق سزدن خيرلو دکم .

[\*] حقائق الكلام .

اگر امارتده حسن حرکت ايدرسهم، بکا اعانه ايدکر! اسأت ايدرسهم، بنى استقامته مجبور ايدکر! صدق، امانتدر. کذب، خيانتدر. ضعيفکر عندنده قوی در. زیرا حقى قوی دن تحصيل ايدرم. وقويکر عندنده ضعيفدر. زیرا ضعيفك حقى النـدن آليويررم. ان شاء الله جهادى ترك ايتيه جکسکر. زیرا جهادى ترك ايدنلری حق تعالى ذیل ايدر . بن اللهك ورسولنك رضاسنده اولدجه بکا اطاعت ايدکر . الله ورسوله عصيان ايدرسهم بکا اطاعت ايتـمك سزك اوزركره لازم ککر. نمازه قالقکر! حق تعالى سزه رحم ايلسون . «

استطراد

«وسيجنبها الاتقى الذى يؤتى ماله يتركى»

قول كريمى جناب صديقك فضائل محسنه سنى مشعر اولان آيات جليله دندر .  
رقزده يراعۀ اهل تحقيقدر كه حضرت صديق اكبر رضى الله عنه دائرۀ منجيۀ اسلامه حين دخولنده قرق بيك ديناره مالك ايدى . مدت قليله ظرفنده بو آلتونارك كافه سنى فى سبيل الله بذل و انفاق ايلدى .

آتى ده بيان اولنه جنى وجه ايله دين مينه بك بيوك برخدمت شريفه لرى ده اعل ارتدادى دائرۀ اتحاد ارجاع ايدرك يکيدن



احیای اسلامه موفقیت جالبه لریدر که بوده خلافت سنییه لیاقت  
واستحقاقی معن اولان دلائلندر.

ابو سعیدك جناب زهریدن نقل و روایت ایتدیکی حدیثه  
کوره برکون رسول الله صلى الله تعالى علیه وسلم افدمز شاعر  
شهیر، حسان بن ثابتہ «ابو بکر حقنده برشی سویلایکک وارمی؟»  
دیه صورمشلر. حسان دخی «اوت!» جوابی ویرمکه رسول الله  
افدمز «اویله ایسه سویله! دیکلیهلم.» بیورمشلر.

حسان شوا یکی بیت لطیفی اوقودی:

وثانی اثنين فی الغار المنيف وقد

خاف العدو به اذ صعد الجبالا

وكان حب رسول الله قد علموا

من البرية لم يعدل به رجلا

حضرت رسول اکرم صلی الله علیه وسلم افدمز بو بیتلری  
استماع بیوردقلرنده کمال ممنونیتلرندن اول قدر کولمشلرکه مبارک  
دیشلری منور سازعیون ناظرین اولدی.

ستایش جناب صدیقی متضمن اولان ابیات آتیہ دخی حضرت  
حسان بن ثابتکدر:

اذا تذكرت شجواً من اخي ثقة

فاذكر اخاك ابا بكر بما فعلا

خير البرية اتقاها واعدلها

الا النبي و اوفاهما بما جملا

و الثاني التالي المحمود مشهده  
و اول الناس ممن صدق الرسلا

«اهدنا الصراط المستقيم صراط الذين انعمت عليهم» قول  
کریمی امامت جناب صدیقه دلالت ایتدیکنی فخررازی تفسیرنده  
مدلاً و مفصلاً بیان و اثبات بیورمش در.

آیت جلیله نك کیفیت دلالتنه و حضرت مفسرک حیرت بخش  
عقول اولان تدقیقات شریفه سنه اطلاع مرادایدنلر «سرقرآن»  
نام کتابزک جزء ثالثه مراجعت بیورسونلر.

§

حضرت نبی علیه السلامدن ارثک ثبوتی مسئله سندهده  
اختلاف اولندی.

شویله که:

رسول اکرم صلی الله تعالى علیه وسلم افدمز خیبرک فتحندن  
صکره مدینه منورهیه ایکی قوناق مسافه سی اولان (فدک) نام قریه  
اهالیسنی اسلامه دعوت ایتک اوزره (محیصه بن مسعود) ی  
مأمور بیوردیلر.

اهالی مرقومه ایسه خیبرک فتح اولندیغنی ایشدکلی کبی  
خوف و خشیتہ دوشهرک ارضلرینک نصفی رسول الله افدمزک  
اولمق اوزره یدلرنده ابقا اولمسنی استدعا ایلدکلرندن اول وجه ایله  
وطنلرنده ابقا اولمشلر ایدی.



بو صورتله (فدك) قريه سنك نصف اراضيسى تحت تملك حضرت رسالتپناهى به كچمش ايدى. چونكه اهل فدك اوزرينه عسكر سوق ايدلامش وارض مذكور حرباً آلتامش ايدى. رسول اكرم دنجى ارض مذكور دن كندينه كن حاصلاتى ابنای سبيله صرف ايدرلردى.

رحلت نبويدن صكره ارض مذكورى حضرت فاطمه «پدرمك ميراثيدر» ديه ايستدى.

حضرت ابوبكر ايسه «بز معاشر انبيا كيمسه يه مورث اولمىز. ترك ايتديكمز مال صدقه در.» مألنده اوله رق رسول اكرم دن نقل وروايت ايتديكى «نحن معاشر الانبياء لانورث ماتركناه صدقه» حديث شريفه بناءً حضرت فاطمه نائل ميراث پدر اوله مادی. ايسته حضرت نبى عليه السلام دن ارثك ثبوتى مسئله سنده كى اختلاف بوندن عبارتدر.

### استطراد

اهل فدك تا حضرت عمر ك زمان خلافتبه دك كويلرنده ياريجيله اقامت ايدوب صكره حضرت عمر يهوديلرى ارض حجازدن چيقاردينى وقت «ابو الهيثم بن التيهان» و «سهل بن ابى حيثه» و «زيد بن ثابت» نام ذاتلرى فدكه يوللايوب اهل فدك يدنده قالان ديكر نصف ارضك قيمت حقيقه سنى بالتقدير اصحابنه اعطا ايله كنديلرني شام طرفه طرد و تبعيد ايتديلر.

خلفای راشدین كندى زمانلرنده ارض فدك حاصلاتى سنت رسول الله توفيقاً ابنای سبيله صرف ايتمكدن خالى قالمديلر. وقتاكه امر خلافت معاويه به منتقل اولدى، ارض مذكورى مروان بن الحكمه تمليك ايلدى. اوده اوغللرى عبد الملك ايله عبد العزيز هبه ايتدى. مؤخرأ بونلرك اوغللرى وليد و سليمان ارثاً منتقل اولوب مقام سلطنته كچدكلرنده ايكيسى ده حصه مصيبه لرني عمر بن عبد العزيز هبه ايتديلر. عمر بن عبد العزيز حضرت تلى ده سليمان صكره مقام خلافته كچنجه ارض موروث و موهوب مذكورى كاملاً اولاد حضرت فاطمه به ترك ايلدى. لكن عمر بن عبد العزيز وفاتندن صكره امويلر اولاد فاطمه دن استرداد ايتديلر.

اكيوز اون تاريخنده (مأمون) خليفه زماننده تكرار اولاد فاطمه به رد اولندى.



زكاتى — يعنى مكلف اولدقلى وركوبى ويرمك ايسته مين اعراب ايله مقاتله خصوصنده ده اختلاف اولندى.

شويلاهكه: قبائل عربك برطاقى عمومأ و بعض قبائلك فروعى ارتداد ايتدكلرى صروده بونلردن بعضيلرى اداى صلاته موافقت، فقط ايتاي زكاتده مخالفت ايلديلر. اسلامده ثبات ايدنلر يالكز قريش ايله بنى ثقيف قبيله لرندن عبارت ايدى. مخالفله نسبتله بونلرك عددى ايسه آز ايدى. بناءً عليه وركو ويرمكدن امتناع



ایدنلرله محاربه ایدیلوب ایدلامسی بین الاصحاب موقع بحث و مذاکره به قونیله رق بو بایده اختلاف آرا وقوع بولدی. مانع زکات اولان اعراب ایله مقاتله بی استحسان ایتیم اصحاب کرامدن بری ده حضرت عمر ایدی. عمر رضی الله دیدی که:

«رسول الله صلى الله عليه وسلم (امرت ان اقاتل الناس حتى يقولوا لا اله الا الله فاذا قالوها عصموا مني دماءهم واموالهم) بیورمشر. مادام که مانع زکات اولانلر اهل توحید درلر، یالکز ویرکو ویرمدکری ایچون آنلرله محاربه ایتمه من نصل مشروع اوله بیایر؟»

ابوبکر الصدیق آکا «جناب رسالتناه افدمنز (الابحقها) دخی بیورمدیلرمی؟ اقامه صلات، ایتای زکات بونک ایکسی ده حقوق الله دندر. زمان رسول اللهده معین اولان ویرکودن بر دوه یولاری نقصان ویررلرسه آنلرله محاربه ایدرم.» دیوب اسبابنک استحصالنه قرار ویردیلر.

### استطراد

زمان سعادتده متعهد اولدقلری ویرکوی اعطادن مؤخرأ امتناع ایدن قبائلدن یمنده متوطن (بنی یربوع) قبیله سنک رئیس (مالک بن نویره) بر فارس وشاعر آدم اولوب غایت حسنا بر حرمی وار ایدی.

عسکر اسلام ایله اوجهته مأمور اولان خالد بن ولید واروب

آنی دردست ایلدی. مالک خالده (انا آتی بالصلاة دون الزكاة) دیوب اقامه صلاتده قصور ایتیه جکنی و فقط ویرکو ویرهمیه جکنی آکلاتدی.

خالد آکا (اما علمت ان الصلاة و الزكاة معاً لا تقبل واحدة دون الاخرى) جوابیله مقابله ایلدی که اقامه صلات، ایتای زکات ایله برابر کرکدر. بری دیکرسز شایان قبول دکدر دیمکدر. مالک صورددی که: دوستکز (یعنی ابوبکر) بویله می دیور؟ خالد دیدی که: عجائب! بزم دوستزدرده سنک دوستک دکلیدر؟ والله سنک بوینکی اوررم.

شویولده بر آرسویلشدکدن صکره خالد «قاتلک بنم!» دیدی. مالک - دوستک سکا بویاه می امر ایتدی؟ دیدی. خالد - ینه بو سوزی تکرار می ایدیورسین؟ دیه مقابله ایلدی.

شو محاوره شیدیده اثناسنده عبد الله بن عمر وابو قتادة الانصاری حاضر ایدیلر. خالده «بو آدمک قتلی جائز دکدر.» دیدیلر ایسه ده خالد آنلرک سوزینه قولاق آصمادی.

مالک - بزی ابوبکره کوندر! حاکمز او اولسون. دیوب مدینه به کوندرملری حقنده ایتدیکی استدعای ده خالد رد ایله قبول ایتیموب معیتده کی عسکرذن ضرار بن الازوره قتلی امر ایلدکده مالک خالده «بنی اولدورن بودر!» دهرک زوجه سنی کوستردی.



خالد « خیر ! او دکل، سنی اولدورن اللهدر » دیدی .

مالك « بن مسلمانم » ديه جواب ويردى . لكن خالد، سوزينه التفات واعتبار ايتيوب بويننى اوردى . صكره مالك او كوزل خاتوننى اموال غنائمدن پاره سيله آلوب تزوج ايلدى .

خالد، حين عقد و نكاحده حاضر بولملىرىنى ابن عمرله ابو قتاده تكليف ايلدى . لكن آنلر امتناع ايدوب « بركره ابوبكردن استيدان اولنسون، مساعده بيوررلرسه اول وقت تزوج ايدرسين. » ديه نصيحت ايتملر سده خالد نصيحتلىرىنى ديكلميوب خاتوننى تزوج ايدى ويردى .

( ابو نمير السعدى ) بووقعه حقنده شوييتلىرى انشاد ايلدى .

شعر

الاقل لحي او طؤا بالسنايك تطاول هذا الليل من بعد مالك  
قضى خالد بغياً عليه بعرضه وكان له فيها هوى قبل ذلك  
فامضى هواه خالد غير عاطف عنان الهوى عنها ولا ممالك

فاصبح ذا اهل واصبح مالك

الى غير اهل هالكاً فى الهوالك

مالك برادرى ( نویره ) دخى بو بابده اوزون بر قصيده

نظم ايتمشدركه بين العرب فوق العاده شهرت بولمش در .

ابيات آتیه او قصيده دندر :

وكننا كند مانى جذيمة حقة من الدهر حتى قيل لن نتصدعا  
وعشنا بخير فى الحياة وقلنا اصاب المنايا رهط كسرى وتبعنا

فلما تفرقنا كاني و مالكا

لطول اجتماع لم نبت ليلة معا

ابوبكر وعمر رضى الله عنهما وقعة مذكورة دن خبردار اولدقلرنده ايكيسى بيننده شويله بر محاوره جريان ايلدى :

عمر، ابوبكره خطاباً - خالد زنا ايتدى . آنى رجم ايتلميسين .

ابوبكر - رجم ايتم . چونكه عن قصد يامدى . اجتهادنده

خطا ايتدى .

عمر - بر مسلمى بغير حق قتل ايتديكى ايچون آنكده اعدامى لازم كلزمى ؟

ابوبكر - لازم كلز . چونكه مالكى اولدورمى ده اجتهادندهكى

خطادن نشأت ايتمش در .

عمر - هيچ دكلسه سرعسكرلكدن عزل ايتلميسين !

ابوبكر - جناب حقك كفار عليهنه صيرمش اولدينى بر

قليجى قينيه قويه مام .

الحاصل حضرت ابوبكر خالد بن وليدى سرعسكرلكدن عزل

ايتيوب آخر عمرينه دكين او خدمت معتناهاده ابقا و استخدام

بيورديلر .

خالدك كرك اهل ارتداد وكرك فرس وروم محارباتنده ابراز

ايتديكى يرارقلر قيامتهك نامنى خير ايله ياد ايتديرهك مائر

جليله دندر .

صكره عمر رضى الله عنه مسند خلافته كچديكنده اجرا آتاك



برنجیسی خالد بن ولیدی عزل ایله ابو عبیده بنی سرعسکر لکه  
نصب و تعیین ایتسی اولدی .

ۛ

حضرت ابوبکر عمر بن خطاب استخلافده ده اختلاف اولندی .  
شویله که :

ابوبکر الصدیق رضی الله عنه هجرت سنیه نك اونجی سنه سی  
ربیع الاولنده مسند جلیل خلافته کچوب مدت خلافتی ایکی ییل  
اوج آی سوردی .

هجرتك اون اوچنجی سنه سنده جمادی الآخره نك یکر می  
ایکیسنده صالی کجه سی دار بقایه ارحال ایلدی .

وفاتنده آلتمش اوج یاشنه وارمش ایلدی . آنی یهودینک بری  
زهرله مش و او زهرک تأثیریه وفات ایتمش دیدیلر . دیگر بر  
روایت ده وارکه کویا بر صوغوق کونده اغتسال ایتمکه شدتلی  
ستمیه طوتیلوب اون بش کون نمازه حقیقه مدیلر . حقیقه مدیغی  
کونلر نمازی حضرت عمره قیلدیر دیلر .

حضرت ابوبکر وفاتندن آز اول کبار اصحاب رسول اللهدن  
عبد الرحمن بن عوف ایله عثمان بن عفانی چاغروب عمرک استخلافی  
خصوصنده آنلرله استشاره ایتدی .

عبد الرحمن - « عمره دیه جک یوقدر . فقط آنک براز  
غلظتی واردر . » دیدی .

ابوبکر الصدیق حضرتلری « آنک غلظتی بنی رقیق کوردیکی

ایچوندر . مسند خلافته کچه جک اولورسه او غلظتک چوغنی  
ترك ایدر . چونکه بن آکا دقت ایتدم . بن بر کیمسه یه طاریله جق  
اولسه م اونی یومشاتمغه چالیشیر . بن پک یومشاقلق کوسترسه م ،  
بنی شدته سوق ایدر . » دیدی .

عثمان بن عفان دخی « عمرک ایچی طیشندن اینی در . ایچمزرده  
مثلی یوقدر . » دیدی .

ابوبکر الصدیق ایکیسنده ده بو سوزک محرم طوتلسنی توصیه  
ایلدی . لکن نصلسه ایش طویولمغه بر آراق ( طلحه بن عبیدالله )  
ابوبکر الصدیقک حضورینه چیقوب « عمری استخلاف ایده جک  
ایمش سین ! سن وارا یکن ناس ، عمرک شدتندن نلر چکدیکنی  
کوریور سین . یالکز باشنه قالیرسه نلر یاماز ! سن ایسه ربکه  
ملاق اولیور سین . ربک رعیتکدن سنی مسئول طوتسه کر کدر . »  
بولنده تعریضاتده بولندی .

حضرت ابوبکر یاننده کیلره « بنی اوطوردک ! » دیدی .  
قولتوغنه کیروب یتاغنک ایچنده اوطورتدیلر . اوطورنجه طلحه یه  
خطاباً دیدی که :

« بنی الله ایله می قورقودیور سین ؟ بن ربمه ملاقی اولدیغ  
وقت بکا صورارسه ( استخلفت علی اهلک خیر اهلک ) اهلکه  
اهلکک خیرلوسنی استخلاف ایتدم جوانی ویره جکم . » دیدی .  
صکره وصیتنامه تحریرینه قرار ووروب عثمان بن عفانه  
املا ایله یازدردی .



## صورت وصیتنامه

«بسم الله الرحمن الرحيم هذا ما عهد به ابو بكر خليفة رسول الله صلى الله عليه و سلم عند آخر عهده بالدنيا و اول عهده بالآخرة في الحال التي يؤمن فيها الكافر و يوقن فيها الفاجر اني استعملت عليكم عمر بن الخطاب و لم آل لكم خيراً فان صبر و عدل فذلك علمي به و رأيي فيه و ان جار و بدل فلا علم لي بالغيب و الخير اردت و لكل امرئ ما اكتسب و سيعلم الذين ظلموا اي منقلب ينقلبون»

ترجمه سی [\*]

«بو اول عهد در که آنی محمد رسول الله صلى الله عليه و سلمك خليفة سی ابو بكر دنیان مفارقت ایدرکن و آخرت دارینه کیررکن ایتشدر . بر حالده که کافر ایمانه و فاجر ایقانه کلیر . سزه خیرلی اولق ایچون عمر بن الخطابی خلافتنه نصب ایلدم . اگر صبر و عدالت ایدر سه بنی تصدیق ایتش اولور . و اگر تبدیل مسلك ایدر ده جور ایلر سه غیبی بیلدیکم جهتله بکا عتاب ایتیه سکر . بن سزك ایچون خیر مراد ایتدم . هر کس کندی عملنك جزاسنی بولور . و ظلم ایدنلر نه حاله کرفتار اوله جقلرینی قریباً بیایرلر .»

بو عهدی بر آزادلوسنه و یروب عمرله برابر مجمع ناسه

[۵] حقائق الکلام .

کوندردی . او صروده هر قفادن بر سس چیقمنغله عمر ، «صوصکر ! خليفة رسول اللهك امرینه قولاق ویرکز !» دیه ندا ایدوب خلقی صوصدردی .

عهدنامه او قوندی . جمله سی طرعا قبول ایلدی . ابو بكر دخی خلقه عرض جمال ایدرک «سزه استخلاف ایتدیکم ذاتدن راضی سکر ؟ بن اقربامدن برینی ولی عهد ایتدم . سزه عمری استخلاف ایتدم . آنی دیکلیکز ! آکا اطاعت ایدکز !» دیدی . جمله سی «ایشتنک و قبول ایتدک .» دیوهم آواز اوله رق اعلان انقیاد ایتدیلر .

آندن صکره ابو بكر الصديق عمر بن خطابی چاغروب وصایای آتیه بی ایفا ایلدی .

## وصایای صدیق

«یا عمر ان لله حقاً باللیل ولا یقبله فی النهار و حقاً فی النهار لا یقبله باللیل و انه لا یقبل نافله حتی تؤدی الفریضة المتر یا عمر انما ثقلت موازین من ثقات موازینه يوم القيامة باتباعهم الحق و ثقله علیهم و حق لمیزان لا یوضع فیہ غداً الا حق ان یكون ثقیلاً المتر یا عمر انما خفت موازین من خفت موازینه يوم القيامة باتباعهم الباطل و خفته علیهم و حق لمیزان ان لا یوضع فیہ الا باطل ان یكون خفیفاً المتر یا عمر انما نزلت آية الرخاء مع آية الشدة و آية الشدة مع آية الرخاء لیكون المؤمن راغباً راهباً لا یرغب



رغبة يتمنى فيها على الله ما ليس له ولا يرهب رهبة يلقي فيها بيديه  
المتر يا عمر انما ذكر الله اهل النار باسوأ اعمالهم فاذا ذكرتهم قلت  
انى لا رجو ان لا اكون منهم وانه انما ذكر اهل الجنة باحسن  
اعمالهم لانه لا تجاوز لهم عما كان من سئ فاذا ذكرتهم قلت اين  
عملى من اعمالهم فان حفظت وصيتى فلا يكونن احب اليك من  
حاضر من الموت ولست بمعجزه

ابوبكر الصديق رضى الله عنه حضر تلرينك فرداى وفاتنده  
حضرت عمر منبره چيقوب بر خطبه بليغه اوقويوب نهايتنده  
ديدى كه:

«انما مثل العرب مثل حمل آنف اتبع قائده فلينظر قائده  
حيث يقوده واما انا فورب الكعبة لاحملكم على الطريق.»

ترجه سى

قوم عرب سرکش دوهيه بکررکه يديچيسنه تابعدر. بناء عليه  
قائدى زويه چکوب کوتوردیکنه نظر ایتلیدر. هاله بن کعبه نك  
صاحبى اولان خدایه قسم ایدرم که سزى يولدن طیشارى چیقارمام.

ۛ

امر خلافت حضرت عثمانده تقرر ایدنجهيه قدر شورى  
خصوصنده اختلاف اولندى.

شویله که:

هجرت سنیه نك یکر مى او چنجى سنه سى ایدى که مغیره بن

شعبه نك عجم نصرانیلرندن ابولؤلؤه نام آزادلى كوله سى چارشوده  
حضرت عمره راست كلدی. مكلف اولدینى یومیه ایكى درهم  
ویركونك كثرتندن شكایت ایلدى. حضرت عمر، «صنعتك  
نه در؟» ديه صوردى. «دمیرجياك، دولكرلك، نقاشلق»  
دیدى. «بو صنعتلره نسبتله ویركونك چوق دكلدر. هم سن يل  
دكرمى یاپارم دیر ايمشسين. بكا بریل دكرمى انشا ایدرميسين؟»  
بیوردیلر.

خیث — سكا بریل دكرمى یاپهيم كه جهان بكنسون. «دیوب  
صاوشدى.

حضرت عمر — «كوله، بنى تهديد ایدیور!» دیدى.  
ایرتسى كونی مسجد شریفده صباح نمازنى قیلاركن لؤلؤه  
خیثى ایكى باشلى بر خنجرله آلتى یرندن امیر المؤمنینى جرح،  
ودها بر قاچ كشی بی قتل ایلدى.

حضرت عمر، رضى الله تعالى عنه یارده لرك تأثیرندن بی محال  
اولوب مسجده یاتدى. ونمازى عبد الرحمن بن عوف رضى الله  
عنه حضرتلرینه قیلدردى. نمازدن صكره، حضرت خلیفه بی  
خانه سنه کوتوردیلر. یارده لرك برى کوبكى آلتنده اولوب درینلکى  
جهتیه حضرت عمر حیاتندن امیدى کسدى. استخلاف ایچون  
اصحاب رسول الله بن الیقنى دوشونوركن «ابوعبیده بر حیات  
اولیدى آکا وصیت ایدردم.» دیدى. صكره عبد الرحمن بن  
عوفى جلب ایدوب «خلافتى سكا ترك ایدهم.» دیدى. عبد الرحمن



« خلافتی قبوله بک نصیح ایدرمیسکر؟ » دیدی . « ایدهمم . » دیدیلر .  
 « اولیه ایسه بنده والله قبول ایتیم ! » دینجه ( فهنی صمتاً حتی اعهد  
 الى نفر الذين توفى رسول الله صلى الله عليه وسلم وهو عنهم  
 راض ) یعنی « بنی بوسوزی سویله مامش کی عدايله ! تا کیم رسول  
 الله عليه السلام کندیلرندن راضی و خوشنود اولدینی حالده ارحال  
 ایتدیکی ذواته بو خصوصی عهد ایدهمم . » دیدیلر .

آندن صکره علی، عثمان، زبیر، سعد، رضی الله تعالی عنهم  
 حضراتی دعوت ایلوب عبد الرحمن دخی برابر اولدینی حالده  
 آنلره « طلحهیه اوچ کون منتظر اولکز ! کلیرسه فیه، کله مدیکی  
 حالده خلافت ایچون سزدن بریسنه قرار ویرکز ! سزدن خلافته  
 کچه جک اولان ذات اقاربی ناسک رقبه سنه تحمیل ایتماکه الله ايله  
 عهد ایتمش اولسون . مهاجرینی ایوا واسلامه نصرت ایدن  
 انصارک محسنه احسان و مسیئته عفو ايله معامله ایتسون . » دیدکدن  
 صکره « اسلامک ماده و مایه سی اولان قزم عربدن تحصیل اولنه حق  
 صدقه لر فقراسنک انفاقه صرف، و رسول الله علیه السلامک  
 عهدلری محافظه و ایفا ایدلسون . » دیوب بعده « آلهی ! اسلامک  
 اعلاى شاننه و مصالح مملکتک اتقانه مبالغه ایلدم . بندن صکره  
 خلیفه اوله حق ذاتی کمال راحتده براقدم . » دیدیلر .

بعده اباطلحه الانصارییه امر ایتدیله که شوری ایچون انتخاب  
 اولنان ذوات مشار الیه می بر اوطیه قیاسون . و کندیسی قپوده  
 طوروب ینلرنده قرار ورنجه یه قدر کیمسه اولدقلری محله کیرمسون .

آندن صکره اوغلی عبداللهه « بنی کیم قتل ایتدی؟ » دیدیلر .  
 « سنی قتل ایدن مغیره نک کوله سی ابو لؤلؤده در . » دیدکده « الله  
 تعالیه حمد ایدرم که بنم اولومم الله بر کره اولسون سجده ایتمش  
 کیمسه النذن اولمادی . » دیدی .

بعده رسول الله و ابوبکرک یاننده دفینه حضرت عایشه دن اذن  
 ایتدیله . آنلرده قبول ایتدیله . آندن صکره اوغلی عبد الله  
 « اهل شوری اختلاف ایدرسه سن اکثر جانبنده واکر مساوات  
 حاصل اولورسه عبد الرحمنک بولندیغی طرفده اول ! » دیدیلر .  
 بعده آخر نفسه دک ذکر الله ايله مشغول اوله رق سنه مرقومه  
 ذی الحجه سنک یکر می یدنجی چهارشنبه کونی عالم بقایه ارحال  
 ایلدی . رضی الله تعالی عنه و ارضاه .

مدت خلافتنری اون ییل آتی آی سکرز کوندر .  
 حضرت عمرک وفاتندن صکره وصیتی اوزره اصحاب کرامدن  
 ابو طلحه الانصاری مدینه منوره ده موجود اولیان حضرت  
 طلحه دن ماعدا اهل شورایی « مسور بن مخزومه » نک و بعض روایت  
 کوره حضرت عایشه نک خانه سنده جمع ایلدی .

متعاقباً عمرو بن العاص و مغیره بن شعبه دخی کلوب قاپوده  
 طور دیله . سعد در حال آنلره « سزک مراد کزی بیلیم . صکره  
 — بزد مشورتده حاضر و اهل شوراده داخل ایدک — دیمک  
 ایستیه جکسکر . بو اوله ماز . قالقکز کیدیکز ! » دیوب ایکسنی ده  
 اورادن دفع ایلدی .



الحاصل وصیت عمر و جنبه حرکت اولندی . لکن نصلسه  
امر انتخابه اصحاب و امرا بیننده تشتت آرا و مدینه منوره ایچنده  
آثار هیجان رونما اولدیغندن اهل شورادن عبد الرحمن بن عوف  
رفع قیل وقال ایچون آرقداش لرینه شویله بر تکلیفده بولندی .  
دیدی که :

« کندینی انتخابدن حیة قارمق شرطیله خلافتی افضلکزر اولان  
ذاتی ترجیح و اختیار اتمه بی هانکیکزر تعهد ایدر ؟ »  
رفقای کرامندن هیچ بری جواب ویرمدی .  
بونک اوزرینه عبد الرحمان « ایشته بن تقسمی خلع ایتدم . »  
دیدی . در حال عثمان « بوکا راضی اولانلرک برنجیسی بنم . » دیدی .  
دیگرلری ده « بزده راضی یز . » دیوب یالکزر حضرت علی اختیار  
سکوت بیوردی .

عبد الرحمان - « یا ابا الحسن ! سن نه دیرسین ؟ » دیدی .  
علی - حق اختیار ایده جکنه ، هوای نفسانی به تابع  
اولیه جگنه ، اقرباسنی ترجیح اتمیه جکنه دائر عبد الرحماندن عهد  
و پیمان ایستدی . ( چونکه عثمانک لام قز قز نداشی ام کلثوم عبد  
الرحمانک تحت نکاحنده اولمغله حضرت عثمان ایله قرابت صهریه لری  
وار ایدی . )

عبد الرحمان - « سزده صکره تبدیل و تغیره قالدیشان  
اولورسه آنک علیهنده بولمق اوزره بنمله برابر اوله جگنزه  
و ترجیح و اختیار ایدم جکم ذاتدن راضی و خشنود اولوب تردد

و مخالفت اتمیه جککزه سوز ویرملیسکزر . ایشته بنده الله تعالی  
ایله عهد و پیمان ایدرم که قرابت جهتیله خصمی ترجیح و اختیار  
ایتمیه جکم . » دیدی . رفقای کرامی ده اول وجه ایله عهد و میثاق  
ایتدیلر . اوده سوز ویردی . بعده حضرت علی بی برکناره  
چکوب « حضرت پیغمبره اولان قرابتک و اسلامده کی سبقتک  
و حسن اثرک جهتیله شمدی سن « امر خلافت ایچون شوراده  
طوپلانان ذواتک احق بنم . » دیرسین . نفسکه بشقه سنی ترجیح  
ایتمزسین . لکن سکا صورارم که بالفرض سن داخل انتخاب اولمامش  
اولسیدک ، جماعت حاضرده دن خلافتی هانکیسنی ترجیح ایدردک ؟ »  
دیدی .

علی - « عثمانی ترجیح ایدردم . » دیدی .  
آندن صکره حضرت عثمانی ده برطرفه چکوب « سن کندی  
کندیکه دیرسین که بن بر اختیار آدم . اشراف قریشدن عبد  
منافک اوغلار ندنم . رسول الله صلی الله علیه وسلمک دامادی یم .  
عمجه زاده سی یم . اسلامده سابقهم ، فضلم واردر . بو حالده خلافت  
بندن بشقه سینه نصل منصرف اوله بیلیر ؟ لکن سکا صورارم که  
بالفرض انتخاب خلیفه ایچون داخل شوری اولسیدک ، جماعت  
حاضرده دن خلافتی کی احق کورردک ؟ » دیدی .

حضرت عثمان دخی « علی بی احق کورردم . » دیه جواب  
ویردی .

بعده میعاد تمام اولنجیه دک اصحاب کرامک و مدینه منوره ده



بولان امرای عسکریه نك خانه لرینی دورايدرك آنلرده مشاوره ایلدی .

میعادك تكمیل اوله جغی كونك صباحی قریب اولنجه عبد الرحمان مسورك خانه سنه كلوب مسوری اویقودن اویاندردی . زبیری، سعدی چاغردی .

ابتدا زبیره خطاباً « عبد مناف اوغلارینی كل شو امر خلافته تشريك ایتمه ! » دیدی .

زبیر - « بن حصه می علی به ترك ایتدم . » دیه جواب ویردی .

ثانیا - سعدی خطاباً « سن ده حصه کی بكا ترك ایدرمیسین ؟ »

دیدی .

سعد - « اگر خلافته کندیکی ترجیح ایده جکسهك، اوت ! ترك ایدرم . یوق اگر علی بی اختیار ایده جکسهك بن علی بی دها زیاده سور و خلافته آنی ترجیح ایدرم . ای کشی ! کندیکه بیعت ایدی ویرده بزیده اراحه ایله ! » دیدی .

عبد الرحمان - « بن دیکری اختیار ایتك اوزره نفسی خلع ایتدم . آنك ایچون کندیجه بیعت ایده مام . » دیدی . صکره مسوری کوندروب حضرت علی بی چاغردی . آنکله ده اوزون اوزادی به محرمانه سویلشدی . حتی حضرت علی بو طول مناظراته نظراً مطلقاً کندیسنی ترجیح و انتخاب ایده جکنی قویاً امید ایدردی . آندن صکره ده حضرت عثمانی چاغردی . آنکله ده صباح اولنجه یه دك کزلی سویلشدی . آنجق نه سویلشدکری ظاهره چقمیدی .

نمازدن صکره مهاجرین وانصار و سائر امرای اسلام مسجد شریفه دعوت اولنوب کلانلردن ازدحام حاصل اولدی . عبد الرحمن بن عوف جمعیه خطاب ایدوب رأی ایستدی . کیمیسی علی بی کیمی عثمانی ترجیح ایلدی . وینه منافسه و مناقشه ظهور ایدوب فتنه و قوعی مظنون اولغله عبدالرحمن، علی به « سن کتاب الله و سنت رسول الله و ابوبکر و عمر ك خلافتده سیرت و سلوكنه اتباع ایدرمیسین ؟ » مألنده اوله رق ( عليك عهد الله و میثاقه لتعمان بكتاب الله و سنة رسوله و سيرة الخلفتين من بعده ) دیدی . علی - « علم و وسع درجه سنده اجتهاد ایدرم . » مألنده اوله رق ( ارجو ان افعل و اعمل بمبلغ علمی و طاقتی ) دیه جواب ویردی . بعده عثمانی بو سوزلری عینیه سویلادی .

عثمان - « اویله قبول ایدرم . » دیدکده عبدالرحمن عثمانك الی النده اولدینی حالده باشنی مسجدك سقفنه طوغری قالدیروب « یارب ! شاهداول، بوینده اولان امانتی عثمانك بوینده آسدم . » مألنده اوله رق ( اللهم اسمع و اشهد اللهم انی قد جعلت مافی رقبتي من ذلك فی رقبه عثمان ) دیوب آکا بیعت ایلدی .

حضرت علی دخی « لیس هذا اول يوم تظاهرتم فيه علينا فصر جلیل و الله المستعان علی ماتصفون و الله ماولیت عثمان الا لیرد الامر اليك و الله كل يوم هو فی شأن » یولنده عبد الرحمانه اعتراض بیوردیلر . عبد الرحمن دخی ( یا علی لا تجعل علی نفسك حجة و سبيلاً » دیه جواب ویردی .



علی - (سیلغ الكتاب اجله) دیهرك مسجودن چیقدی کتدی.  
مقداد بن الاسود دخی عبدالرحمانه (والله لقد تركته - یعنی  
علیاً - وانه من الذين يقضون بالحق وبه يعدلون) یولنده بر  
اعتراضده بولندی.  
عبد الرحمن (يامقداد والله لقد اجتهدت للمسلمين) دیه  
جواب ویردی.

مقداد - (ما رأيت ما أتى الى اهل هذا البيت بعد نبیهم انی  
لاعجب من قریش انهم تركوا رجلاً ما اقول ولا اعلم ان رجلاً  
اقضى بالعدل ولا اعلم منه اما والله لواجد اعواناً علیه) دیر دیمز  
عبد الرحمن (يامقداد اتق الله فانی اخاف عليك الفتنة) دیه  
تخذیر ایلدی.

الحاصل بویولده وقوع بولان بعض قیل وقلدن صکره هرکس  
حضرت عثمانه بیعت ایلدی. اوکون طلحه رضی الله عنه دخی  
سفردن کلوب عثمانه بیعت اولندیغنی خبر آلدی. خلیفه عثمان  
رضی الله عنه ایله کورشدی. عثمان آکا «مراد ایدرسه کز  
انتخابك اعاده سی قابلدر.» دیدی. اوده «اعاده ایدرمیسین؟»  
دیه سورددی. عثمان (اوت!) جوابنی ویردی. «سکا ناسک  
کافه سی بیعت ایلدی می؟» یولنده ایراد ایتدیکی ایکنجی برسؤالده  
(اوت!) جوابنی آلتجه «اجماعدن آیرلام. بن ده بیعت ایلرم.»  
دیوب و عثمانك النی طوتوب بیعت ایلدی.

ۛ

بك مهم بر اختلاف دخی حضرت عثمان بن عفانك واقعه  
فاجعه قتلنده وقوع بولمش در.

سن شیخوختنده مسند جلیل خلافته کچن حضرت عثمان  
رضی الله عنه حقیقه جامع الفضائل، کریم الخصال بر ذات  
ستوده شمائل ایدی. دائماً عفو و صفحه مائل ایدی. لکن اقارب  
و خویشانی حریص مال و جاه اولمغله حضرت خلیفه یه حلول ایدرک  
اك بیوک منصبیری بونلر اله کچور مشلردی. واقعا بونلر اهل  
و مقتدر آدملر ایدی. حتی اکثریسی شیخین محترمین زماننده  
و بعضیسی عهد سعید رسالتپناهیده استفاده اولمشلر ایدی.  
آنحق بونلردن دهامقتدرلری ده یوق دکل ایدی. باخصوص  
بعض مطرود کیمسلر دخی مظهر شرف تقرب اوله رق خالقك  
کوزینه دیکن کبی باتاردی. بنی امیهك خصوصاً ابو سفیانك  
و امثالك ایسه ظهور اسلامده حضرت رسول اکرم اقدمزله  
اهل یتی حقنده روا کوردکلری اذا و ازدرانك تأثیرات فاجعه سی  
قلوب مطهره بنی هاشمه یر ایتشدی. بناء علیه دولت اسلامیه ده  
بونلرک تفوقنی بنی هاشم بالطبع چکه مزدی. کبار اصحاب رسول  
اللهك چوغنی ایسه ابتداینده و صکره لری سوریه ده، عراق عرب  
و عجمده و بلاد سائرده متوالیاً وقوع بولان محارباتده و عهد فاروقده  
شامده ظهور ایدن (طاعون عمواس) ده شهید اولوب مقام  
خلافتك قدسیتنی طانیانلر آزالمش ایدی.

حال بوکه دائرة ممالك اسلامیه آسیاده - سوریه، عراق، ایران،



کردستان، ارمینیه، و آفریقاده - مصر، برقه، طرابلس و ملحقاتی  
برطرفدن دربند و او برطرفدن حیچون، و بر جانبیدن نوبه و دیگر  
جانبیدن تا سبته بوغازینه دک کسب اتساع ایتمشدی .  
بو دائرة واسعه ایچنده بولسان اقوام مختلفه اول زمانه دک  
احکام عدلیه قرآنی کنیدلرینه رهبرجات اتخاذ ایدرک جمله سی  
یکدل و یکجهت و اعلائی کلمه اللهده متفقاً بر زده دامن همت  
و غیرت ایکن، زمان سعادت رسالت تباعد ایتدجکه اسکی وفاق  
و اتلاف یرینه شفاق و اختلاف اماره لری یوز کوسترمکه باشلادی .  
او صروده یکی مسلمان اولان یهودی الاصل (عبد الله بن  
سبا) نام شخص دخی یکی بر مذهب احداثه تشبث ایدرک حجازی،  
کوفه یی، شامی طولاشدی . خلقی اضلاله چالاشدی . ابتداری  
اورالرده دیکیش طوتدیره میوب مصره کتدی . مصرده منویات  
فاسده سنی اظهاره فرجه یاب اوله میوب « عیسانک نزول و رجعتنه  
اینانوبده حضرت محمدک رجعتنه اینانیمانلره تعجب اولنور. » یولنده  
سوزلرله خلقی اضلاله باشلامش و بو قول فاسد ابله فریبانه سنه  
اینانان کیمسه لرده بر فرقه میدان کلمش ایدی .  
طرفدارانی چو غالجه اصل مقصد فاسدینی میدان قویوب  
« هر پیغمبرک بروصیسی اولدینی کی حضرت محمد علیه السلامک  
دخی وصیسی حضرت علیدر . خلافت آنک حتی ایکن غصب  
اولندی. » دیهرک بر چوق کیمسه یی ده بو یولده اغفال ایلدی .  
بعده اطراف و اکنافه دعوتجیلر ارسال ایله خلقی بو مذهب

باطله دعوت ایدوب آلدانه بیلدیکی کیمسه لرله بینلرنده مکاتبات خفیه  
چو غالدی . مرقومک تشویقاتیله هر ولایتده خالق والیلرندن  
شکایت باشلادی .  
او برطرفدن حضرت ابوذر رضی الله تعالی عنه شامده خلقی  
زهد و ورعه دعوتله اشتغال ایدوب بو سببیدن ناشی شام والیسی  
معاویه ایله آرمه سی بوزولدی .  
معاویه نك شکایت واقعہ سی اوزرینه حضرت خلیفه ابو ذری  
مدینه منوره یه جلب و احضار ایدوب بعد الاستجواب (ربذه)  
نام محله اقامته مأمور ایلدی .  
ابو ذرک ایسه مدینه منوره دن هجرتی حضرت عثمان علیهنده  
اولانلرک تشدید اعتراضاتنه باعث و بادی اولدی .  
کوفه والیسی (سعید بن العاصی) دخی بر کجه اشراف اهالی  
و امرا ایله صحبت ایدرکن « سواد عراق قریشک باغچه سیدر. »  
دیددی . حضاردن (اشتر) آباغه قالقوب « قلیچلر مزله فتح ایدوب  
الله تعالانک بزه نصیب ایلدیکی دیار، قریشک بستانانی اولدینی  
زعمنده میسین؟ » دیوب سائر حاضر بولنانلر دخی بررسوز سویلیوب  
مناظره مجادله رنکنی آلدی . ضابطه ناظری (عبدالرحمن الاسدی)  
شدت کوسترمک ایسته مش ایسه ده مسامرده اولانلر اوزرینه  
هجوم ایدوب بایلنجه یه قدر دو کدیلر .  
(سعید) اشتر ایله هوادارلرینی خلیفه یه شکایت ایدوب شام  
طرفه تبعید ایتدیردی .



شامده (معاویه) ایله بینلرنده بر چوق قیل وقال وقوغندن  
صکره (حمص) ده عبدالرحمن بن خالد بن ولیدک یانه واردیلر.  
اورادن (اشتر) مدینه منوره کلوب خلیفه رسول الله ایله  
کورشدی و اظهار ندامتله صوچنی عفو ایتدردی و آرقداشاریله  
برابر هر نرده مراد ایدرلرسه اقامته رخصت آلدی.

آردن چوق کچمکسزین بو فساد واختلافلر بصره ده دخی  
سرایت ایلدی. معهود عبدالله بن سبانک تزویری عراق و مصر  
جهتلرنده زیاده تأثیر ایتمکه بصره اهالیسی ده مأمورین حکومتی  
تحقیر و خلیفه رسول الله حقنده اطلاق لسان هذیان ایدر اولدیلر.  
حاصل کلام، مقر خلافتیه قریب اولان بیوک شهرلرده اصحاب  
اغراض مناصب عالیهنک اقارب و متعلقات خلیفه ده تقسیم اولندیغنی  
سررشته اعتراض ایدرک خلیفه هنک خلعی لزومنی علناً تفوهه  
جسارت آلدیلر.

کوفه اهالیسی وایلری (سعید بن العاصی) اوزرینه قیامه  
تصدی حالده ایکن (سعید) مقر خلافتیه کلوب احوال حاضرده  
حضرت خلیفه ده عرض ایلدی.

عثمان رضی الله عنه بطانته ییتدن اولان معاویه و عبد الله  
بن ابی سرح و مشارالیه سعید بن العاصی و عبد الله بن عامری  
نزدینه دعوت ایلوب رایلرینه مراجعت ایلدی. هربری برکونه  
رای ایدوب خلیفه سعیدک رآینی بالتزجیح موجبجه مخالفلرک محاربه ده  
تعیینیه اشغاللرینی تنسیب بیوردی. یکیدن جهاد قبولری آچلدی.

سعید بن العاصی محل مأموریتیه عودت ایدوب کوفه ده  
یاقلاشدیغنده اهالی مخالفتیه قیام ایله آنی کری چویردیلر. (ابو  
موسی الاشعری) نک والی نصبی خلیفه ده اعلام ایلدیلر.  
(سعید) مدینه ده دوندی. خلیفه دخی اهالینک مسئولی  
اسعافدن بشقه چاره بوله میوب ابو موسی الاشعری بی کوفه ده والی  
تعیین واعزام ایلدی.

ابو موسی، کوفه ده واردیغنده منبره حیقوب بر خطبه او قودی.  
قلوب ناسی خلیفه نک لهنه امالهیه چالشدی ایسه ده مفید اوله مدی.  
متعاقباً خلیفه نک لزوم خلعی مسئله سی میدانیه حیقوب خلافتدن  
استعفا سنی تکلیف ایچون کوفه لیلر زهاددن (عامر بن القیس) ی  
اوتوز درت سنه هجریه سنده مدینه ده کوندردیلر. (عامر)  
مدینه ده بالورود حضور خلیفه ده حیقیدی. «معظمت امورده  
اولان خطالرکه اهالی تحمل ایتمز اولدی. توبه ایت!» دیدی.

عثمان رضی الله عنه بو سوزدن زیاده منفعل اولوب حضاره  
خطاباً «اللهم بیلین بو آدم بکا محقر سوزلر سویلیور باقکز!»  
دیدی.

عامر - «بن اللهک منتقم اولدیغنی بیلیرم.» دیه جواب  
ویردی.

بو احوال دن مشکی اولان کبار مدینه نک مراجعت و ابرامی  
اوزرینه حضرت علی دخی بر آراق نزد خلیفه ده کیدوب بیان  
حال ایتمش ایسه ده بر تأثیری کوریه مدی. مدینه ده کی مشکیلر



محاربه لره مأمور ایدیلان مخالفله خبرلر کوندروب « جهاد مدینه ده در! بورایه کلیکز! » دیدیلر. اهل خلاف طاقم طاقم مدینه یه کلوب ودها بر چوق وقایع جریان ایدوب عاقبه الامر تفصیلی داغزن قلوب اهل ایمان اولان شهادت عثمان، وقوع بولدی. (چو غی تاریخ اسلامدن مقتبسدر)

§

حضرت عثمان رضی الله عنیه شهادتندن صکره عشره مبشره دن طلحه وزیر رضی الله عنیه و مهاجرین و انصار دن بر چوق ذات حضرت علی رضی الله عنیه خانه سنه واروب عرض بیعت ایتدیلر.

حضرت علی بار خلافتی تحمیلدن استنکاف ایدوب « سزه وزیر اولمهی امیر اولمغه ترجیح ایدرم. » دیدی ایسه ده مفید اولمادی. ذوات مومی الیهمک اصراری اوزرینه خلافتی قبوله میل اتمکله کندینی مسجد شریفه کوتوردیلر. ابتدا طلحه وزیر و بعده اجلاء مهاجرین و انصار بیعت ایدوب یالکز سعد و ابن عمر، عموماً ناس بیعت ایتدیکجه کندیلری بیعت ایتیه جکلیری سویلدیلر.

بنی امیه رجالی ده شام طرفه کیدوب اوراده معاویه یه التحاق و دم عثمانی دعوا یه قیام ایله بین المسلمین ایقاد نأرة خلاف و شقاق ایتدیلر.

درت آی صکره طلحه وزیر « رضی الله عنیهما » دخی حجه

حضرت علیدن رخصت آلوب کتدیلر. وهر نصلاسه مؤخرأ نقض عهد ایدوب وقعه جلی میدانه چیقاردیلر. حضرت علی عقب بیعتده مناصب عالیده بولان بنی امیه رجالتک عزانی تصمیم بیورمشلردی. آنلر ایسه غایت حریص جاه اولملریله حضرت امیر المؤمنینک بو نیتی ایشتدکلرنده بالطبع مخالفته قیام ایلدیلر.

ایشته (صفین) وقعه دلسوزی ده بو صورتله وقوعه کلدی. وقایع فجیعه مذکورنک شهرته بناء مجرد قلوب مؤمنینی ازسرنو داغدار تأثر ایتماک ایچون تفصیلندن صرف نظر اولندی. احکام فرعییه متعلق اختلافاتک بیوکلری بو مسئله لرده رونمای ظهور اولوب اهل اسلام آره سنده تفرقه حدوئیه اول و قته قدر سبب اعتلای شوکت اسلام اولان سعادت اتحاد و وفاق، نحوست خلاف و شقاقه مبدل اولدی. « ذلك تقدير العزيز العليم » §

کالاه مسئله سنده ده اختلاف اولندی.

کالاه - بالواسطه میته منسوب اولان ورثیه دینیرکه اولاد ذکور ایله والدین دن ماعداسیدر.

کالاه - مورثه ده اطلاق اولنورکه والدینی و اولاد ذکوری اولیان میتدر.

کالاه - لفظنک وارثه استعمالی صحیح اولدیغنه (جابر) رضی الله عنه حضرتلرینک قول آیسيله استدلال اولنور.



مشاراليه بر آراق آغرجه خسته لمشدی. حضرت رسول الله صلى الله عليه وسلم افندمن عياده سنه عزيمت بيوردقلرنده «يا رسول الله اني رجل لا يرثي الا كلاله» ديمش و بو قوليله جناب جابر «بنم والدمده، ولدمده يوق» ديمك ايسته مش در. كلاله - لفظنك مورثدهده مستعمل اولديغنه شاعر مشهور فرزدقك،

ورثم فتاة الملك لاعن كلاله  
عن ابني مناف عبد شمس وهاشم

بيتيه استدلال اولنور.

چونكه مال بيت «ملك سزه اعمام كردن دكل، آباء كرام كردن ميراث قالمش.» ديمك اولوب شاعر موما اليه عمي (كلاله) تسميه ايلش دركه بو مقامده (عم) وارث دكل، مورثدر. ايشته بين الاصحاب مختلف فيه اولان بو (كلاله) لفظي قرآن كريمك يالكز ايكي يرنده مذكور اولوب ايكي سي ده سورة نسا ده در. بري سورده نك اولنده، ديكرى آخرنده اولوب اولكي سي - موسم شتاده، ايكنجيسي - موسم صيفده نازل اولغله آكا آيت شتا - بوكا آيت صيف ديديلر.

آيت شتا

«وان كان رجل يورث كلاله او امرأة وله اخ او اخت فلكل واحد منهما السدس فان كانوا اكثر من ذلك فهم شركاء

في الثلث من بعد وصية يوصي بها او دين غير مضار وصية من الله والله عليم حكيم.»

آيت صيف

«يستفتونك قل الله يفتيكم في الكلاله ان امرؤ هلك ليس له ولد وله اخت فلها نصف مترك وهو يرثها ان لم يكن لها ولد فان كانتا اثنتين فلهما الثلثان مما ترك وان كانوا اخوة رجالاً ونساءً فللذكر مثل حظ الانثيين بين الله انكم ان تضلوا والله بكل شيء عليم.» تفاسير شريفه نك بياننه كوره ابوبكر الصديق رضى الله تعالى عنه «كلاله - والدين ايله ولدن ماعداسيدر.» دير ايدى كه صحيح ومختار اولان قول بودر.

عمر «رضي الله عنه» دخي «كلاله - ولدن ماعداسيدر.» دير ايدى.

شوقدر كه بر روايته كوره حضرت عمر وفات ايده جكنه ياقين «بن (كلاله) ولدى اوليان ميتدر اينده ايدم. آنجق ابوبكره مخالفتدن استحي ايدرم. (كلاله) والدو ولدن ماعداسيدر.» ديدى. حضرت عمر دن بر روايت دها وار كه اوده توقدر.

مشاراليهك شو سوزى ده ورد زبان ايتديكي منقولدر:

«اوج شي وار كه رسول الله صلى الله تعالى عليه وسلم افندمن آنلرى بيان بيورمش اولسيدى، عندمده دنيا و مافيهادن زياده سوكيلى اولوردى. كلاله، خلافت، ربا»



قول صديقك صحتہ حجج آتیه ایلہ استدلال ایتشاردر.

حجت اولی

کلاله - لفظنک اشتقاقیه تمسکدرکه بوده بر قاج وجه ایلہ

اولور.

۱ - ایکی کیسه بیننده کی قرابت، متباعد اولنجه «کلت

الرحم بین فلان وفلان» دینیر.

بری دیگرینه حملاه ایتدکدن صکره آندن آریلوب اوزاقلاشجه

آکاده «حمل فلان علی فلان ثم کل عنه» دینیر. ایشته ایراقدن

اولان قرابته بو وجهدن طولای (کلاله) دینیر.

۲ - بر ایشدن یورولوب قوتی کیدن کیسه یه «کل الرجل

یکل کلاً وکلاله» دینیر.

صکره بو کلاله لفظی ولادتک غیری جهتدن حاصل اولان

قرابته استعاره اولندی.

شویله که :

ولادتک غیری جهتدن حاصل اولان قرابت، واسطه غیرایله

حصوله کلدیکندن ضعیفدر.

ایشته شو ایضاح ایلہ ظاهر اولورکه والدین، کلاله یه ادخال

ایدیله مز. زیرا والدینک میته انتسابلری واسطه سزدر.

۳ - کلاله نك معنای اصلی لغویسی احاطه در. (اکلیل)

بوندن مأخوذدر. رأس انسانی محیط اولدینی ایچون تاجه

(اکلیل) دیندی.

بتون معناسنه اولان (کل) لفظی ده بوندن مأخوذدر.

کندی جزلرینی محیط اولدینی ایچون (کل) دیندی.

بلوط هرطرفدن افقی احاطه ایتدکده (تکلیل السحاب) دینیر.

ورثه نك والد و ولدن ماعداسنه نیچون کلاله دیندی؟

زیرا آنلر میتی احاطه ده انسانی محیط اولان دائره یه، رأس

انسانی محیط اولان اکلیله بکزر.

مثالی



قرابت ولادتده ایسه ورثه نسق واحد اوزره تراید ایدن

شیء واحد کی یکدیگرندن متفرع، یکدیگرندن متولد اولور.

بو سبیدن ناشی شاعر،

نسب تتابع کابرأ عن کابر

کالرمح انبواباً علی انبوب

دیوب قرابت ولادتی قارغینک یکدیگرنی ولی وتعقیب ایدن

بو غملرینه تشبیه ایتمشدر.

مثالی

ا ب

...



میت

⋮

بنون و بنات

قرايت ولادته مغاير اولان قرايت، اخوه، اخوات، اعمام،  
و عمامتق قرايتي دركه بالاده كوسترديكي وجه ايله بونلرك نسي  
ايچون منسوب اليه احاطه حاصل اولور.  
ايشته شو وجوه اشتقاقيه ايله تبين ايتدي كه (كلاله) جناب  
صديقك ديديكی كي والدين وولدن ماعداسی اولق لازم كلير.

حجت ثانيه

حضرت عمر، آيت صيف ايله احتجاج ايدوب - (كلاله)  
ولدي اوليان ميتدر. زيرا آيت صيفده (كلاله) ولدي اوليان  
ميتدر ديه تفسير بيورلمشدر - دير ايدی.  
شوقدركه امام فخر رازينك بياننه كوره آيت صيف (كلاله)  
ولدي ووالدي اوليان ميت ايدوكنه دلالت ايدر. زيرا جناب  
حق ميت (كلاله) اولديغي حالده اخوه و اخواتك توريثي ايله  
حكم بيورمشدرد. حال بوكه ابوينك ايکيسي ده موجود ايكن اخوه  
ايله اخواتك وارث اوله ميه جقلري شبهه سزدر. بناء عليه ابوينك  
وجودي حالده ميتك كلاله اولماسی لازم كلير.

حجت ثالثه

جناب حق آيات متقدمه ده (ولد ووالدين) ك حكم ميراثي

بيان بيوردقن صكره (كلاله) يي ده ذكر ايلدي. بو ترتيب ايسه  
كلاله نك والدين وولدن ماعداسی اولمسي اقتضا ايدر.

حجت رابعه

فرزدق نام شاعر مشهور،

ورثم فتاة الملك لاعن كلالة

عن ابني مناف عبد شمس وهاشم

ديمشدر.

ايشته بو بيت، شاعرك ممدوحی اولان ذواته ملك وسلطنت  
كلاله دن موروث اوليوب بابالرندن ميراث قالدیغنه دلالت ايدر كه  
بوده ابك كلاله ده عدم دخولی ايجاب ايلر.

ج

اخوه ايله جدك كيفيت ميراثنده اختلاف اولندي.  
شوييله كه:

حضرت عمر، ابنك وجودی حالنده ميراثدن جده سدس  
حصه ويرردی. ابنك عدم وجودی حالنده كرك اخ واحد  
و كرك اخوين ايله جد ييتنده ميراثي متساویاً تقسيم ايدردي.  
قرداشلر ايکيدن زياده اولديغي وقت جده ثلث حصه چيقاروب  
ثلثانی اخوه ييتنده تقسيم ايلردی.

حضرت علي نك اجتهادی بشقه در.

ابن عباس، جديله آلتی نفر قرداشني ترك ايدرك وفات ايدن



کیمسه نك میراثی نه وجه ايله تقسیم ایدمك لازم کله جکني حضرت علیدن صوردی . اوده « جدی احد اخوه مقامنده طوت ! » ديه جواب ویردی . بر روایت کوره « جده سبع ، حصه ویر ! » دیدی .

ابن مسعودكده اجتهدی بشقه در .

مشارالیه - زوجنی ، آناسنی ، لاب برقداشنی ، جدینی ترك ايله وفات ایدن بر خاتونك میراثی بروجه آتی تقسیم ایلدی .

حصه

زوج - نصف . . . . . ۳

ام - ثلث مابقی و هو السدس من رأس المال ۱

اخ - . . . . . ۱

جد - . . . . . ۱

۶

حضرت ابو بکر ایسه جدی ارئده ( اب ) منزله سنه تنزیل ایدرك ( جد ) وارا یکن اخوه ايله اخواتی میراثه ادخال ایتمزدی که مذهب ابی حنیفه بودر .

زید بن ثابتكده اجتهدی بشقه در .

حصه سی نلشدن نقصان اولماق شرطیله جدی اخوه ايله تقسیمه ادخال ایدردی که امام مالک ايله امام شافعیكده مختارلری بودر .

§

عقل اصابع [۱] و دیات الاسانده [۲] وسائر بو مثللو بعض احکام فرعیده دخی اختلاف اولندی .

ایشته بین الاصحاب وقوع بولان اختلافات مباحثی بوراده نهایت بولدی . بوندن صکرده احکام اصلیه اعتقادییه متعلق خلافتك بیاننه شروع اولور .

## خلافت

### فرق اسلامیه

کبار فرق اسلامیه سکر در .

معتزله ۱ شیعه ۲ خوارج ۳ مرجئه ۴ نجاریه ۵ جبریه ۶

مشبهه ۷ ناجیه ۸

### معتزله

کبار فرق اسلامیه دن برنجیسی ( معتزله ) در .

( معتزله ) ديه واصل بن عطاءك اصحابنه دینیر که ، اصول

اعتقادیاتده اك اول قواعد خلافتی تأسیس ایدن بونلردر .

[۱] عقل ، دیتنه دینیر . بین العرب دیت ویریلن دوه مقتولك خانه سی

اوکنه کوتوریلوب باغلانوردی . آنك ایچون هر دیت ویریلن شیئه دیت دیدیلر .

[۲] اسنان - دیش دیمك اولان سنك جعیدر .



(واصل) اشراف تابعیندن حسن بصری حضرتلرینک  
شاگردی ایدی.

برکون حسن بصری حضرتلری عادت حسنهلری اوزره  
مسجد شریفده تدریس ایله مشغول ایکن خارجدن بر آدم کلوب  
(ای مقتدای دین! زمانزده بر گروه ظهور ایتدی که، اهل  
کیرهی اکفارایدرلر. دیگر بر جماعت دخی پیدا اولدی که، «کفر  
ایله طاعت، نافع اولمادیغی کبی ایمان ایله معصیت دخی مضر دکدر.»  
دیرلر. بونده بزده کونه اعتقاد ایتک لازمدر؟) دیه سؤال ایلدی.

حسن بصری بر آفکرده واروب دهنکشای جواب اولمقسزین  
مومی الیه واصل بن عطا «بن صاحب کیره مطلق مؤمندر، یا  
مطلق کافردر. دیم. اول کفر ایله ایمان آرمسنده بر منزلهدر.  
نه مؤمندر نه کافردر دیرم.» دیدی.

بعده مشارالیه حسن بصرینک مجلس درسندن قالقوب مسجدک  
ستونلرندن برینه آرقه ویردرک حضرت مشارالیهک جماعتندن  
باشنه طویلا نالره شو قول باطلی تقریریه باشلادی دیدی که:

«مومن، اسم مدحدر. فاسق ایسه مدحه مستحق دکدر.  
بناءً علیه فاسق مؤمن دکدر. شو قدرکه شهادتینی اقرارای  
و کندیسنده سائر اعمال خیرک وجودی جهتیله کافرده دکدر.  
بلا توبه وفات ایدرسه مخلص فی النار اولور. چونکه اهل آخرت  
بری - بهشتی و دیگری - دوزخی اوله رق یا لکرایکی فرقهیه منقسمدر.

برفرقه ناله یوقدر. لکن فاسقک درکهسی کفارک درکاتی فوقنده  
اوله جغندن بالنسبه عذابی خفیف اولور.»

بونک اوزرینه حسن بصری حضرتلری (قد اعتزل عنا  
واصل) دیدی که، واصل بزدن آیرلدی دیمکدر. ایشته اوکوندن  
اعتباراً واصل ایله آکا تابع اولانلره معتزله دینلدی.

بونلر قدری نفی ایدرلر و کفر و شر و ظلم و سائر معاصی  
خدانک تقدیریه دکدر. قول فعلانک خالقیدر دیرلر. آنک ایچون  
(قدریه) نامنی ده آلدیلر.

فخر عالم صلی الله تعالی علیه وسلم افندمزایسه کندی امتندن  
بویله بر فرقه نک ظهور ایده جکنی نور نبوتله کشف ایتمش  
اولدیغندن (القدریه مجوس هذه الامة) بیورمشلر ایدی. بناءً  
علیه اهل اعتزال کندیلرینه بو نامی ویرن اهل سنته (بالقدر  
خیره و شره من الله تعالی) دینلر، یعنی قدری اثبات ایدوب  
خیرکده شرکده خالق الله اولدیغنی اعتقاد ایلینلر (قدریه) تسبیحه  
اولنغه اولادر. زیرا قدری اثبات ایدنلر قدره نسبت اولنغه نفی  
ایلینلردن احق و الیقدر دیدیلر.

حال بوکه قدری اثبات ایدوب «خیر و شر هب اللهک  
تقدیریهدر.» دینلره (قدریه) نامی هیچ یاقیشق آماز. چونکه  
حدیث مذکور (قدریه) نامنی آلانلرک ایکی خالق اثباتی خصوصنده  
مجوسه مشارک اولملرینی اقتضا ایدر.

قدری اثبات ایدوب «خیر و شر، خدانک تقدیریهدر.»



دین اهل سنت ایله مجوس بیننده ایسه هیچ بروجه ایله مشارکت و مشابهت یوقدرکه حدیث شریفده مذکور اولان (قدریه) نامنك بونلره حملی صحیح اوله بیلسون.

اما قدری نفی ایدنلر «قول فعلنك خالقیدر، کفر و ظلم و شر و سائر معاصی بشر خدانك تقدیریه دکلدرد.» دیهرك قبایح و شرورك خلق و ایجادینی قوله اسناد ایتدکاری جهته ایکی خالق اثباتی خصوصنده بونلرك مجوسه مشارکت و مشابهتلی بدیهی در. آنك ایچون حدیث شریفده مذکور اولان (قدریه) نامنی بونلره حمل، صحیح اولدیغنده اشتباه یوقدر.

برده صاحب شریعت و واقف هر حقیقت افندمن (قدریه) حقنده (هم خصماء الله فی القدر) بیورمش درکه، آنلر قدر خصوصنده اللهك خصمایدنلر دیمکدر. «خیر و شر، کافه امور، خدانك تقدیریه در.» دینلر ایچون ایسه برکونه خصومت، متصور دکلدرد. حدیث شریفده بیان بیوریلان خصومت آنحق جناب حقك مراد ایتدیکی و بلکه کریه کوردیکی شیلری کندیلری ایجاده قادر اولدقلرینی اعتقاد ایدنلره سزادر.

معتزله نك «عباد حقنده اصلحه مراعات، و مطیعه خیرایله جزا و مکافات، الله تعالی اوزرینه واجبدر.» دیواعتقاد ایدوب بونی (عدل) و قدمای متعدده اثباتدن احترازاً ذات الله ایله قائم اولان صفات حقیقیه قدیمه بی نفی ایله جمله سنی مجرد احکام ذهنیه اوله رق اثبات ایدوب و ذات باریدن غیری قدیم یوقدر دیوب

یونی دخی (توحید) تسمیه ایتدکاری جهته کندی کندیلرینه (اصحاب عدل و توحید) نامنی ویردیله و - (قدم) اخص وصف الله اولوب بووصفده كرك ذات و كرك صفاتدن برصفت، مشارك اوله ماز و صفات، ذات اوزرینه زائد دکلدنلر و كلام الله مخلوق و محدثدر. حروف و اصواتدن مرکبدر و باری تعالی آخرته کوزلرله کورلیه جکدر و حسن ده، قبح ده عقیددر. یعنی ایکیسی ده عقلاییلر شیلردنلر و افعال الهیه سنده حکمت و مصلحته مراعات، مطیع و تابعه مکافات، صاحب کیرمه مجازات ایتك الله اوزرینه واجبدر. - دیدیلر.

ایشته جمهور معتزله، امور مذکوره ده یکران وفاق و متحد القول اتفاق اولدقدن صکره بعض مسائلده اختلاف ایدوب یکرمی فرقهیه منقسم اولدیلرکه بونلردن بعضیلری بعضیلرینی تکفیره قدر چیشمشلردر.

### واصلیه

فرق عشریندن برنجیسی - ابی حذیفه واصل بن عطایه منسوب اولان (واصلیه) فرقه سیدر.

بونلر بالاده ده بیان اولندیغی اوزره «صفات الهی نفی ایدوب ذات باریدن غیری قدیم یوقدر. جناب حق حکیمدر. عادلدر. بناء علیه شرور و قبايحك آکا اضافتی ممتنع در. جناب حقك عبادینه امر ایتدیکی و اوزرلرینه حکم ایلدیکی شيتك خلافتی اراده ایدوب ده



صکره آنک اوزرینه آنلره جزا و یرمسی جائز دکلدر. بناءً علیه خیر و شرک، ایمان و کفرک، طاعت و معصیتک فاعلی عبددر. سبب بودرکه هرکس فعلنه کوره جزا کورر. لکن بو افعالك جمله سنه عبدی اقدارایدن جناب حقدر و کفر ایله ایمان آره سنده بر منزله واردر و اصحاب جملدن، اصحاب صفیندن، حضرت عثمان ایله قاتلارندن احد فریقین لابعینه مخطیدر و حضرت عثمان (حاشا) مؤمن ده دکلدر. کافر ده دکلدر. کندیکنک ناردده مخلص اولمسی جائزدر و وقعه جملدن صکره علی و طلحه و زبیرک برطوتام اوت حقنده بیله شهادتلی متلاعینک [\*] شهادتلی کی مقبول دکلدر. « دیدیلر.

## عمریه

ایکنجیسی - عمرو بن عبید نام شخصه منسوب اولان عمریه فرقه سیدرکه، بونلرکده اصول مذهبیله لری (واصلیه) نک مثیلدر. شوقدرکه (واصلیه) حضرت عثمان ایله حضرت علی قصه لرنده یالکز احد فریقینی لابعینه تفسیق ایتمشلر ایکن بونلر تفسیقی فریقینه ده تمیم ایدوب ضلالتلرینی قترلشدیردیلر. مومی الیه عمرو، رواه حدیثدن زهدایله معروف و موصوف

[\*] متلاعین - زوج و زوجه.

بر کیمسه زوجه سنه نهمت زنا و فجور اسناد ایلدیکنده حاکمک امریله بر برینه لعنت اوقویان زوج و زوجه یه متلاعین دیرلرکه ایکیسندن بری لابعینه فاسق اولق لازم کله جکندن ایکیسندن شهادتلی مقبول دکلدر.

بر ذات اولوب قواعد اعتزالده واصل بن عطایه تابعدر. یالکز بو بر وجه محرر تعمیم تفسیقی آکا علاوه ایلدی.

## هذیلیه

اوچنجیسی - ابو الهذیل بن حمدان العلافه منسوب اولان (هذیلیه) فرقه سیدر.

هذیل، معتزله نك اولوسی و طریق قتلرینک مقرر و پیشواسی ایدی. اعتزالی عثمان بن خالد الطویلدن، او دخی واصل بن عطادن اخذ ایتمشدر.

بونلر سائر اهل اعتزادن مسائل آتیله تمیز و تفرد ایتمشلردر.

۱ - مقدورات خدا فنا بولور [\*]

۲ - کرک اهل جنتک و کرک اهل جهنمک حرکتلری اضطراریدر، غیر اختیاریدر، مخلوق باریدر. زیرا دنیاده کی کی کندی کسبلریله اولسیدی، جنت و جهنمده مکلف اولملری لازم کلیردی. حال بوکه آخرتده تکلیف یوقدر.

۳ - اهل جنتکده، اهل جهنمکده حرکتلری بالآخره منقطع اولسه کرکدر. شویله که: حرکتلری منقطع و کندیلرینه بر بایغیناق عارض اوله رق هر ایکی طاقده اوله خود و سکون

[\*] بو قول، مذهب جهمه قریدر. چونکه (جهنم) جنت و جهنمک بالآخره فنا پذیر اوله جقلرینه ذاهب اولمشدی.



دائم ایچنده قاله جقدر و اوسکون دائم ایچنده دینه اهل جنت —  
متلنذ، اهل جهنم — متالم اوله جقدر. [۱]

۴ — الله تعالى بر علم ايله عالمدرکه، او علم کندی ذاتیدر.  
بر قدرته قادردرکه، او قدرت کندی ذاتیدر. بر حیات ايله حی  
درکه، او حیات کندی ذاتیدر. [۲]

۵ — بر اراده حادثه ايله مریددرکه، آنک محلی یوقدر. [۳]

۶ — جناب حقك بعض کلامی ایچون محل، متصور دکلدر.  
(کن) کبی. زیرا تکوین اشیا (کن) کله سیله واقع اولدیغندن  
بونک ایچون محل، تصور اولنه ماز.

[۱] ابوالهذیل، حدوث عالم مسئله سنده اولی اولیان حوادث ايله  
آخری بولنمیان حوادث بیننده فرق اولمادیغنی التزام ایدرک « بن حرکات  
غیر متناهیته نك وجودینه قائل دکلم. حرکات موجوده البته بر نهایت  
و سکونه منتهی اولور. » دیدی. حرکاتک الی غیرالنهایه دوام واستمرارینه  
لازم کلن فساد، سکون دائمه لازم کلن ظن ایتشده شو قول باطلی آنک  
ایچون ارتکاب ایلشدر. بو سببدن ناشیدرکه معتزله ابوالهذیلی « جهمی  
الآخره » تسمیه ایلش، ابوالهذیل « قدری الاولی جهمی الآخره » دخی  
دینلشدر.

[۲] بو رأی « جناب حق جیع جهاندن واحددر. آنده اصلا تعدد  
یوقدر. صفات و ذات ایکسی بردر. صفات، ذات ايله قائم معانی دکلدر.  
سلوب و اضافاته راجعدر. » دین فلاسفه کلامندن اقتباس ایتشدر.

[۳] بو مقاله بی اک اول، احداث ایدن علاقدر. علاف، هجرت  
نبویه نك یوز اوتوز بشنجی سنه سی وفات ایتشدر. ابویعقوب الشحام آنک  
اصحابندن ایدی.

بعض کلامی دخی (محل) ده در. امر، نهی، استخبار کبی.  
۷ — اراده باری مرادک غیری در. زیرا اراده باری بر  
شیئی یارتمقدن عبارتدر. بر شیئی یارتمق ایسه اوشیئه مغایردر.  
یعنی خلق و ایجاد، مخلوق و موجوده مغایردر. زیرا خلق و ایجاد،  
کندی ایچون محل، متصور اولیان (قول) درکه، اوده (کن)  
امریدر.

۸ — امور غائبه حجت، قائم اولماز، الا یکر می کشینک  
خبریه قائم اولورکه آنلرک بری و یا اکثری اهل جنتدن اوله.

۹ — روی زمین اعلی اللهدن خالی اولماز و آنلر معصوم  
درلر. یالان سویله مزلر و کبائر معاصیدن برشی ارتکاب ایتزلر.  
بناءً علیه شرعه حجت آنلرک قوللریدر. تواتر دکلدر. زیرا  
اولیاء الله اولیان و ایچلرنده هیچ دکلمه بر معصوم بولنمیان جماعتدن  
کذب و دروغک صدوری جائزدر.

#### نظامیه

دردنجیسی — ابرهیم بن سيار بن هانی النظامه منسوب اولان  
(نظامیه) فرقه سیدر.

مومی الیه شیاطین قدریه دندر. کتب فلاسفه بی بالمطالعه آنلرک  
کلامنی معتزله نك کلامنه قاتمش، اصول اعتزalde رفقاسندن مسائل  
آیه ایه منفرد اولمشدر.

۱ — جناب حق دنیا ده قوللرینه صلاحلری اولیان شیئی



ایشلتکه و آخرتده اهل جنت و نارك ثواب و عقابنی چو غالتوب  
اکساتکه قادر دکدر. [۱]

۲ — حقیقتده اراده صفتیه متصف دکدر. کندی فعل  
آلهینسی مرید اولهسی علم شریفه مطابق اولهرق آنک خالق  
اولسندن و فعل عبیدی مرید اولهسی او فعلک آمری بولمئسندن  
عبارتدر.

۳ — انسان، حقیقتده روحدن عبارت اولوب بدن،  
روحک آلتی و قالبی در. [۲]

۴ — الوان، طعموم، رواج و بونلرک امشالی عرضلر  
جسمدرلر. [۳]

۵ — جوهر، اعراض مجتمعه دن مؤلف و مرکبدر.

۶ — تمام ماهیتده علم — جهل مرکبک، ایمان — کفرک  
مثیلدر. [۴]

[۱] کویا جناب حقک شرور و قباچندن کالیه تنزیهی آنجق شرور  
وقباچه قدرتنی سلب ایله اولور دیه توهم ایتدیلر. زوالیلر بیلهمدیلر که  
یاغوردن قاچارکن طلویه طوتلدیلر.

[۲] نظام بوسوزی فلاسفه دن اخذ و اقتباس ایتشددر. شو قدرکه  
نظام، بومسئلهده حکمای الیهونه دکل، فلاسفه طبیعیونه میل ایدوب  
«روح بر جسم لطیفدرکه کل صوینک کله، دهنک سوده سریانکی کبی بدنه  
ساریدر.» دیدی.

[۳] نظام بومسئلهده هشام بن الحکمه متابعت ایتشددر. هشام، کاه  
اعراضک اجسام و کاه اجسامک اعراض اولدقلرینه حکم ایدردی.

[۴] بومقاله بیده فلاسفه دن اخذ و اقتباس ایتشدر. حکماء، هرایکیسنک

۷ — جناب حق، مخلوقاتی الآن بولندقلری حالت اوزره  
دفعه واحدهده خلق ایلدی. تقدم و تأخر کموندن ظهوردهدر.  
حدوث و وجودده دکدر. [۱]

۸ — نظم قرآن (حاشا) معجز دکدر. معجز اولان امور  
سالفه و آتییه دائر بر طاقم مغیباتدن خبر ویرمسیدر. حق تعالی  
آنک معارضه سنه صرف اهتمامدن اقتدار عربی سلب ایتدی. اگر  
آنلری ترک ایتسیدی، قرآنک (حاشا) مثانی و بلکه آندن افصحنی  
کتیرمکه مقتدر اولورلردی. [۲]

۹ — عدد مخبرین لایحصى دخی اولسه تواترکذبى محتملدر.

۱۰ — اجماع ایله قیاس شرع شریفده حجت اوله ماز.  
حجت امام معصومک قولیدر.

۱۱ — امام المسلمین حقنده نصک ثبوتی واجبدر و رسول

حقیقتلری قوه عاقلده حصول صورتدن و امر خارجی ایله بینهمادهکی  
امتیاز دخی اوصورت حاصله نك متعلقنه مطابقت و عدم مطابقتدن عبارتدر.  
دیدیلر.

[۱] بومقاله دخی خلیط و کون و بروزه قائل اولان فلاسفه کلامندن  
مأخوذ و مقتبسدر.

[۲] بوسوز کلام الیهی تکذیب دیمک اولدیغندن نعوذ بالله تعالی  
محض کفر و ضلالدر. زیرا جناب حق (قل لئن اجتمعت الانس والجن علی  
ان یأتوا بمثل هذا القرآن لایأتون بمثله ولو کان بعضهم لبعض ظهیراً)  
بیورمشدر.



اکرم افندمزدن حضرت علینک امامتی حقنده نص، ثابت اولدی.  
لکن اونصی حضرت عمر کتم ایتدی. [۱]

۱۲ — بر کیمسه نصاب زکاتدن آز اولان یوز طقسان  
طقوز درهم کموش، یاخود درت دوه سرقت، و یا بو نسبتده  
آخره ظلم و تعدی ایله خیانت ایلسه فسقه نسبت اولماز. [۲]

### اسواریه

بشنجیسی — اسوار نام شخصه منسوب اولان (اسواریه)

فرقه سیدر.

بونلر مذهب لرنده نظامیه موافقت ایدوب یالکز بر قاج  
مسئله ده آنلردن منفرد اولملر در.

دیدیلرکه:

جناب حق عدمیه خبر ویردیکی، یاخود عدمی بیلدیکی شیئه  
قادر دکلدن. لکن انسان آکا قادر در. زیرا انسانک قدرتی  
علی السویه ضدینه صالحدر. مادامکه انسان، احد ضدینه قادر در،  
ضد آخره ده قادر اولور.

[۱] بوده کذب و اقتدار. امامت علی حقنده بویه بر نص صریح  
اولسیدی، حضرت علی آنکله احتجاج ایدردی.

[۲] هله بوسوز باهر البطلاندر. ظلمک، سرقتک آزیده چوغیده  
عقلاً و شرعاً حرام و منی در. ائمه اربعه بیننده کی اختلاف یالکز مقدار  
وجوب قطع یدده در. عند الحنفیه اون درهمدر.

### اسکافیه

آلتنجیسی — ابو جعفر الاسکافیه منسوب اولان (اسکافیه)  
فرقه سیدر.

بونلر دیدیلرکه:

جناب حق عقلایه ظلم ایتکه قادر دکلدن، لکن صبیان  
و مجانینه ظلم ایده بیلیر. [\*]

### جعفریه

یدنجیسی — «جعفر بن مبشر — و — جعفر بن حرب»  
نام ایکی شخصه منسوب اولان (جعفریه) فرقه سیدر.

بونلر اسکافیه مذهبیه موافقتله برابر سر مذهب لرندن ابن  
مبشره متابعتله دیدیلرکه:

فساق امت ایچنده زناده و محوسدن شر و بدتر کیمهلر  
واردن و حد شرب اوزرینه اجماع امت خطادر. زیرا حدود  
شرعیه ده معتبر اولان نصدر و برجه نکه ده سارقی فاسق و ایماندن  
منخلعدن.

### بشریه

سکزنجیسی — «بشر بن معتمر» نام کسه یه منسوب اولان  
(بشریه) فرقه سیدر.

[۱] جناب حق ظلمدن منزهدن (ومارک بظلام للعبد)



بشر، افاضل علمای معتزله‌دن ایدی. (تولید) سوزینی  
احداث ایدن بودر. سائر فرق معتزله‌دن مسائل آتیه ایله تفرد  
ایتمش در.

شویله‌که :

۱ — الوان، طعوم، رواج و سائر ادراکات مثلاً عرضلک  
سبیلری غیرک فعلندن اولورسه، بو عرضلک فعل غیردن توالد  
صورتیه حاصل اولسی جائدر و قدرت و استطاعت، بدن  
انسانک و جوارحک آفادن صحت و سلامتیدر.

۲ — جناب‌حق طفل نابالغی تعذیبه قادردر. اگر آتی  
تعذیب ایتسه ظالم اولور. لکن حق باریده بویه دیمک مستحسن  
دکدر. بلکه واجب اولان بودرکه، اگر حق تعالی حضرتلری  
او طفله عذاب ایدرسه دیمک که او طفل، حد بلوغه ایرسه ایدی،  
عذابه کسب استحقاق ایده‌جک اعمال سیئه‌ده بولنه جقمش‌ده آنک  
ایچون خدای متعال آتی تعذیب ایلدی دیرز.

مزداریه

طقوزنجیسی — «ابوموسی عیسی بن صبیح‌المزدار» ه منسوب  
اولان (مزداریه) فرقه‌سیدر.  
مزدار، کلمه‌سی افعال بابندن اسم مفعول اولوب زیارتدن  
مأخوذدر.

ابوموسی بشرک شاکردی ایدی. علمی آندن اخذایتمش‌در.  
فرط تره‌دندن (راهب‌المعتزله) نامنی الممش ایدی.

دیگر مذهبداش‌لرندن آتی‌الذکر درت مسئله‌ده منفرد اولمش‌در.  
شویله‌که :

۱ — جناب‌حق (حاشا) یالان سویله‌مکده، ظلم ایتمکده  
قادردر. اگر یالان سویلسه و ظلم ایتسه (حاشا) آله کاذب، آله  
ظالم اولوردی. [۱]

۲ — خلق نظماً و بلاغاً قرآنک مثانی و بلکه آندن  
احسنی آتیانه قادردر. [۲]

۳ — برفعلک مباشرت طریقیه دکل، تولد جهتیله ایکی  
فاعلدن وقوعی جائدر.

۴ — اعمال عباد، خدانک مخلوقیدر دین، رؤیت باری‌یه  
قائل اولان کافردر.

هشامیه

اوننجیسی — «هشام بن عمرو الغوطی» یه منسوب اولان  
(هشامیه) فرقه‌سیدر.

قدرده سائر معتزله‌دن زیاده مبالغه ایدن بودر.  
دیگر اهل اعتزالدن مسائل آتیه ایله تفرد و تمیز ایتمش‌در.

[۱] تعالی الله عما یقوله هذا الظالم علواً کبیراً.

[۲] حدوث قرآنده مبالغه ایله قدم قرآنه قائل اولانی اکفاریلین  
بودر.



شویله که :

۱ — جناب حقہ (وکیل) اطلاق اولماز . چونکہ وکیل، موکلی مستدعیدر . [۱]

۲ — « الف الله بين القلوب » دینلر . [۲]

۳ — اعراض، نه کندیلرینک خالق خدا اولدیغنه دلالت ایدرلر، نه ده رسالت دعوی ایدن ذاتک صدق مدعاسنه دلیل اولمغه صالحدرلر . وجود خالقه و مدعای رسالتک صدقه دال اولان آنجق اجسامدر . [۳]

۴ — قرآن کریمده حلال و حرامه دلالت یوقدر .

۵ — امامت، اختلاف ایله منعقد اولماز . [۴] بلکه اتفاق کل لابد ولازمدر .

[۱] بیله مدیلرکه، اسماء اللهه واقع اولان (وکیل) لفظی (حفیظ) معناسندهر . (وما انت علیهم بوکیل) قول کریمنده اولدیغی کبی .  
[۲] بوايسه (مالغت بين قلوبهم ولكن الله الف بينهم) قول کریمنه مخالف برسوزدر .

[۳] بوقوله کوره دکزی یارمق، عصای حیه یه قلب ایتک، اولولری دیرلتمک کبی امور خارقه العادات، یدمؤیدنده ظهور ایدن ذات جایل القدرک صدق مدعاسنه دلیل اوله مامق لازم کلیر . حال بوکه لازم، وکذا ملزوم باطلدر .

[۴] مقصودلری حضرت ابوبکرک امامتنه طعندر . زیرا امامتی جمیع صحابه نك اتفاقیه منعقد اولمبوب هر طرفه آنک خلاقی اوزره برطائنه قالمشدی . (کذا فی شرح المواقف) .

۶ — جنت وجهنم هنوز یارادلامشدر . زیرا شمديکی حالده بونلرک وجودنده فائده یوقدر .

۷ — حضرت عثمان، رضی الله عنه نه محاصره اولشمش، نه ده قتل ایدلمش ! [\*]

صالحیه

اون برنجیسی — صالح نامنده بر شخصه منسوب اولان (صالحیه) فرقه سیدر .

بو یادکارلر دخی علم، قدرت، اراده، سمع، بصر صفتلرینک میتله قیامنی بالتجويز بوصورتله آرقداشلرندن تمیز و تفرد ایتشلردر . (دیمک که ناس بوصفتلرله متصف اولدقباری حالده کندیلرینک اموات اولملری و جناب حتمک حی اولماسی جائز اولمق لازم کلیر . بو قول ایسه باهر البطالندر .)

حابطیه

اون ایکنجیسی — احمد بن حابطه منسوب اولان (حابطیه) فرقه سیدر .

احمد، نظامک اصحابندن ایدی . مذهب نظامه بدع آتییه یی علاوه ایله تفرد ایتمشدر .

دیمشدرکه : «عالمک (حاشا) ایکی آلهی واردر . بری قدیمدرکه،

[\*] بوده متواترک خلاقیدر .



اول جناب اللهدر. دیگری محدثدرکه، بوده جناب مسیحدر. روز جزاده خلقتک محاسبه سنی بو کوره جکدر. (و جاء ربك و الملك صفاً صفاً) قول کریمله مراد خدا بودر. (ان الله خلق آدم علی صورته) حدیث شریفلهده، (یضع الجبار قدمه فی النار) قوللهده مقصود بودر.

بونک کبی دهبا بعض هذیانلری واردر.

سیف الدین آمدی «بونلر کفار مشرکیندر.» دیدی [\*]

#### حدیه

اون اوچنجیسی — «فضل حدی» یه منسوب اولان (حدیه) فرقه سیدر.

بونلر حابطیه، مذهبنده درلر. یالکز بروجه آتی آکابعض علاوهرلر ایتدیلر.

۱ — تناسخه قائل اولملشر.

۲ — هر حیوان، مکلفدر دیملشر. شویله که:

جناب حق حیواناتی دار دنیادن بشقه بر دارده عاقل، بالغ اولدقلری حالده ابداع، و کندی معرفت و علمنی ذاتلرنده خلق، ونعم الهیه سنی آنلره تماماً ابدال ایلدی. آندن صکره جمله سنی

[\*] سیف الدین آمدینک اسمی علی بن علی بن محمد بن السالم الثعلبی در. ابتداء نشأته حنبلی المذهب ایلدی. صکره مذهب شافعی یه منتقل اولوب ۶۲۱ تاریخنده دمشقده داربقایه ارتحال ایلدی. (تاریخ ابی الفدا)

دوچار ابتلا ایدوب او نعم سنییه شکر ایله مکلف قیلدی. کافه تکالیف الهیه سنی اطاعت و انقیاد ایله، ادای حق شکران ایدنلری بولندقلری دار نعیمده تقریر و ابقا — وهر امرینی ترک ایله عصیان ایدنلری او دار نعیمدن نارجمیدن عبارت اولان دار عذابه اخراج ایلدی. ایکسی اورتیسی حرکت ایدنلری ده دنیایه چیقاردی، و آنلره انسان صورتی کبی، سائر حیوانات صورتلری کبی صور مختلفه اوزره بو اجساد کشفیه بی کیدیروب کناهلری مقدارنجه کندیلرینی باسا وضرا، شدت و رخا، آلام و لذات ایله مبتلا قیلدی. معاصیسی اقل، طاعاتی اکثر اولانک صورتی ده احسن، آلامی ده اقل اولور. بونک عکسی اولانده بالعکس در. ایشته حیوان، کنهکار قالدینی مدتجه دنیاده بر صورتدن دیگر صورته تحول و انقلابدن خالی اولماز.

(بو سوز دخی تناسخک عینی در.)

#### معمریه

اون دردنجیسی — «معمربن عباد السلی» یه منسوب اولان (معمریه) فرقه سیدر.

بونلرده مسائل آتیله آرقداشلرندن تمیز ایتملشردر.

۱ — جناب حق اجسامدن غیری برشی خلق ایتمز. اعراضی اجسام، اختراع ایدیور. یا طبعاً — آتش و کونش کبی که بری احراقی، او بری حرارتی احداث ایلر. یا اختیاراً —



- حیوان کی کہ، حرکت و سکونی، اجتماع و افتراقی احداث ایلم \*
- ۲ — جناب حق قدم ایله وصف اولنماز. زیرا (قدم) تقادم زمانی به دلالت ایدر. وجود باری ایسه زمانی دکلدرد.
- ۳ — جناب حق کندی نفسی بیلز، زیرا بیله جک اولسه عالم ایله معلومک اتحادی لازم کلیر. بو ایسه ممتنع در.
- ۴ — انسانک اراده دن غیری فعلی یوقدر. کرک مباشرت جهتدن اولسون، کرک تولید طریقله اولسون.
- حرکت و سکوندن، خیر و شر دن هر فعلی اراده اختیاریه سنه مستنددر و بو استناد، مباشرت طریقله در. تولید طریقله دکلدرد. [\*]

## ثمامیه

- اون بشنجیسی — «ثمامه بن اشرس النخیری» نام شخصه منسوب اولان (ثمامیه) فرقه سیدر.
- ثمامه، خلفای عباسیه دن (مأمون) ک شرف قرب و حضور یله ممتاز اولان علمادن اولوب سخافت دین ایله خلاعت نفس یننی جامع ایدی.
- فرق سائرهدن مابها الامتیازی بدع آتیهدر.

[\*] معمر، بوقولنی فلاسفه نک حقیقت انسانیه به دائر اولان مذهبیری اوزرینه بنا ایتشدرد. بو مذهبیه ذاهب اولان فلاسفه دیشدر که: «انسان جسد دکلدرد. جسدک غیری بر جوهر در و نفسیله قائمدر. متمکن و متحیر دکلدرد. لکن جسدک مدبریدر و آنک جسد ایله علاقه سی تدبیر و تصرف علاقه سیدر.»

- ۱ — افعال متولده نک فاعلی یوقدر. چونکه افعال متولده یی سینیک فاعلنه اسناد ممکن دکلدرد. زیرا بو اسناد، فعلک میته اسنادینی مستلزمدر. مثلاً بر کیمسه بر شخصه اوق آتسه، اوق او شخصه واصل اولمازدن اول، کندی وفات ایتسه، فوتندن صکره اوق شخص مومی الیه واصل اولسه، بو صورتده فعلی سبیک فاعلنه اسناد، میته اسناد اولمش اولور.
- افعال متولده خدایه ده اسناد اولنه ماز. زیرا بو اسناد، خدادن امر قبیک صدورینی مستلزمدر.
- ۲ — معرفت، نظردن متولدد و بو سائر متولدات کی فاعلسز بر فعلدر.
- ۳ — معرفت، ورود شرعدن مقدم واجبدر.
- ۴ — یهود و نصاری، محوس و زنادقه و کذلک بهائم و اطفال روز جزاده تراب اولوب کیده جک، بونلردن هیچ بری نه جتته، نه ده جهنمه کیرمیه جک.
- ۵ — استطاعت — آلتک آفاددن سلامتی، جوارحک صحتی در و بوده قبل الفعلدر.

## خیاطیه

- اون آلتنجیسی — ابو الحسین بن ابی عمرو خیاطه منسوب اولان (خیاطیه) فرقه سیدر.
- فرق سائرهدن امتیازی مسائل آتیهدر.



- ۱ — خیر و شر، کافه افعال، مخلوق بشر در.
- ۲ — معدوم، حال عدمنده — ثابت و مقرر معناسنه اوله رق — شی، تسیمه اولنور.
- ۳ — ذوات معدومه ثابته، حال عدملرنده صفات اجناس ایله متصفدرلر. بناء علیه جوهر و عرضه حال عدملرنده جوهر و عرض دینیر.
- ۴ — اراده الله، ذات الله ایله قائم، صفت دکدر. اراده باری، جناب حقک غیر مکره و غیر کاره اولمیدر. اراده باری، جناب حقک کندی افعالنده اراده سی آنلری بر وفق مراد یار اتمه سیدر. افعال عبادده دخی آنلر ایله امر اتمه سیدر.
- ۵ — جناب حقک سمیع و بصیر اولمه سی، سمع و بصرک متعلقلرینه — یعنی مسموعات و مبصراته عالمدر دیمک اولوب سمع و بصر صفتلریله اتصافی مشعر دکدر.
- ۶ — جناب حق کندی ذاتی، یا خود غیرینی کورر دیمک آکا عالم دیمکدر.

#### جاحظیه

اون یدنجیسی — عمرو بن بحر الجاحظ نام ذاته منسوب اولان جاحظیه فرقه سیدر.

عمرو، خلفای عباسیه دن معتصم و متوکلک ایام خلافتلرنده شهرت شعار اولان فضلادن، بلغادن بر ذات اولوب کتب فلاسفه یی

- بالمطالعه مقالات فلاسفه دن چوغنی کندی عبارات بلیغه ولطیفه سیله ترویج ایش در. بوده سائر اهل اعتزالدن مسائل آیه ایله تمیز و تفرد ایش در.
- ۱ — معارفک کافه سی ضروری در. هیچ بری افعال عباددن معدود دکدر.
  - ۲ — بزم بریمزده اراده یوقدر. بزم فعلیزی اراده اتمه من عدم سهودن — یعنی او فعلیزه عالم و غیر ساهی اولمه مزدن عبارتدر. غیرک فعلانی اراده اتمه من دخی نفسک آکا میلانی دیمکدر.
  - ۳ — اجسامک طبایع مختلفه سی و آثار مخصوصه سی وارددر. [۱]
  - ۴ — جوهرک انعدامی، فاسی، ممتنع در. متبدل اولان آنجق اعراضدر. جواهر، حالی اوزره باقیدرلر. [۲]
  - ۵ — آتش، اهلنی کندی به جذب ایدر. یوقسه اهل ناری جناب حق ناره ادخال ایده جک دکدر.
  - ۶ — خیر و شر، فعل بشردر.
  - ۷ — قرآن جسددر. کاهی رجه، کاه امرائه به منقلب اولور.

#### کعبیه

اون سکزنجیسی — ابوالقاسم بن محمد الکعبی به منسوب اولان (کعبیه) فرقه سیدر.

- [۱] بو طبیعیون حکما مسلکیدر.
- [۲] هیولی حقنده ده بویه دینلشدر.



ابو القاسم، بغداد معتزله‌سندن و خياطك شاگردانندن ایدی.  
 فرق سائرهدن سبب امتیازی شو ایکی مسئله‌در.  
 ۱ — فعل خدا بغير اراده واقعدر. «حق تعالی افعالنك مریدیدر.» دینلیدیکی وقت مراد، افعالنك خالق دیمك اولوب «غیرینك افعالنی مریددر.» دینلیدیکی وقت دخی «آنلری آمردر.» دیمك اولور.

۲ — جناب حق نه کندیسنی، نه ده غیریسنی کورمز.  
 کورر دیمك، بیلیر دیمکدر. یعنی صفت بصیر علمه راجعدر.

#### جبايه

اون طقوزنجیسی — محمد بن عبد الوهاب الجبائی‌یه منسوب  
 اولان (جبايه) فرقه‌سیدر.

جبائی، بصره معتزله‌سندن ایدی. مدار تمیزی مسائل آتیه‌در.  
 ۱ — اراده باری حادثدر. محله دکدر. جناب باری  
 بو اراده حادثه ایله مرید در و آنکه موصوفدر.

۲ — الله تعالی، فناى عالمی اراده ایتدیکی وقت عالم،  
 محله اولیان بر فنا ایله فانی اولور.

۳ — الله تعالی، حروف و اصواتدن مرکب بر کلام ایله  
 متکلمدرکه آنی جسمده خلق ایدر. او کلامك متکلمی آنی فاعل  
 و خالق اولاندر. صفت کلام، کندیله قائم اولان و کندی‌یه حلول  
 ایلین دکدر.

۴ — حق تعالی، آخرتده کورنمز.

۵ — قول، فعلنك خالقیدر.

۶ — مرتکب کیره نه مؤمن در، نه کافر در. اگر توبه‌سز  
 وفات ایدرسه مخلص فی النار اولور.

۷ — کرامات اولیا ثابت دکدر. زیرا اولیادن کراماتك  
 صدورنده فائده یوقدر.

۸ — مکلفك عقانی اکمال و آنك ایچون اسباب تکلیفی  
 تهیه و استحضار ایتك — یعنی مکلفه لطف، و آکا اصلح اولان  
 شیه رعایت ایتك جناب حقه واجیدر.

۹ — انبیای عظام، علیهم السلام صغار و کبائر ذنوبدن  
 معصومدرلر.

ابو علی الجبائی احکام مذکوره ده اوغلی ابو هاشمه مشارکت  
 ایتشدی. صکره مسائل آتیه ایله آندن متمیز و متفرد اولمش در.  
 ۱ — جناب حق، صفت علمك ایجابیه، و عالمیتی ایجاب  
 ایندر حالت ایله دکل، مجرد ذاتیه علمدر.

۲ — جناب حقك سمیع و بصیر اوله سنك معناسی «حی  
 در، کندیسنده آفت یوقدر.» دیمك اولور.

۳ — عوض ایچون ایلام، جائدر.

#### بهشمیه

یکر منجیسی — جبائی نك اوغلی ابو هاشم عبدالسلامه منسوب  
 اولان (بهشمیه) فرقه‌سیدر.



ابو هاشم، پدرندن مسائل آیه ايله متفرد اولمشد.

۱ — معصیتسنر ذم وعقابہ استحقاق ممکندر [۱].

۲ — قبحی بیلدیکی حالدہ بر کیره اوزرینه مصر اولانک دیگر کیره دن توبه ورجوعی مقبول دکلدرد [۲].

۳ — قدرتک فقدانده توبه قبول اولماز. مثلاً کاذب اولان کیمسه کندینه دیلسزلک طاری اولدقدن صکره یالاندن، زنا ایله مألوف اولان کیمسه آلت تناسلی کسیلوب خادم ایدلدکدن صکره زنادن توبه ایلسه بونلرک توبه لری مقبول اولماز.

۴ — علم واحد، علی التفصیل ایکی معلومه تعلق ایتمز.

۵ — جناب حقک بر طاقم احوالی [۳] واردرکه، او احوال نه معلومدر؛ نه مجهولدر؛ نه قدیمدر؛ نه حادثدر.

سيف الدين آمدی دیدی که :

«ابو هاشمک بوقولنده تناقض واردرد. زیرا برشیءک حادث اولسی، قدیم اولماسندن؛ مجهول اولسی، معلوم اولماسندن بشقه معنایی مفید دکلدرد. همده بر حالت غیر معلومه اثباتنه ده یول یوقدر.»

[۱] بو ایسه هم اجاع امته، همده حکمتنه منافیدرد.

[۲] بوخالده کافرک ادنی بر کنهه اصراری سببیه اسلامی صحیح

اولماق لازم کلیر.

[۳] بواحوالدين مراد، صفاتدر.

شیعه

کبار فرق اسلامیه دن ایکنجیسی، شیعه در.

شیعه، لفظی لسان عربده مطلق بر شخصک اعوان وانصارینه واتباع واصحابنه اطلاق اولنور.

صکره دن ائمه فقها و متکلمینک متقدمین ومتأخرینی بو اسمی عامدن خاصه نقل طریقیه امام علی کرم الله وجهه حضرت تیرینی سائر خلفای راشدینه ترجیح ایدن و حضرت رسول اکرم صلی الله علیه وسلم اقدمزدن صکره نص جلی یاخود نص خفی ایله امام حق اودر دین و «امامت و خلافت آندن، و آنک اولاد کرامندن چیقماز. چیقارسه دیگرلری طرفندن واقع اولان ظلم ایله، یاخود آندن و یا اولادندن تقیه طریقیه چیقار.» دیه اعتقاد ایلین قومه تخصیص ایلدیلر.

شیعه، دخی یکریمی ایکی فرقهیه منقسم اولمشدرکه، بونلرکده بعضیسی بعضیسنی اکفاره قدر چیقشمشدر. اصلاری اوچدر.

غلاة ۱ زیدیه ۲ امامیه ۳

غلاة

اصول ثلاثه دن اولکیسی (غلاة) نامنی آلانلر درکه، بونلر دخی اون سکر فرقهیه منقسم اولمشلردرد.

سبائییه

غلاة شیعه نك منقسم اولدیغی اون سکر فرقه دن برنجیسی



عبد الله بن سبايه منسوب اولان (سبائييه) فرقه سیدر.

بالاده حضرت عثمانك واقعة فاجعة قتلنه سبب اولان احوالك  
نقل و حکایه سی صروده خامه کذار بیان اولدینی اوزره مرقوم  
(عبدالله بن سبا) مشارالیه حضرت عثمانك عهد خلافتنده مسلمان اولمش  
یهودی الاصل بر آدم ایدی که خلق طاعت حضرت مشارالیهدن  
خروج تشویق ایلله ایقادنارۀ فساد سعی ایدن بودر. حرکات سیئه فتنه  
انگیزی محث مذکورده بوندن دهاز یاده جه تفصیل و ایضاح ایدلمش در.  
بر کون حضرت علی یه خطاباً (حاشا) سن اله حقسین !  
دیدى. حضرت علی دخی آنی مداینه نفی و تغریب ایلدى.

یهوددن دونه اولان بو یادکار ملعت شعار اوائل حالنده  
وصی موسی (یوشع بن نون) حقندده بویله بر کفری تقوه  
ایدردى. یعنی «یوشع، اله حقدر.» دیر ایدی.

وجوب امامت علی قولنی اك اول اظهار واحداث ایدن  
بودر. صنوف غلاة بو حریفدن تشعب ایتمش در.

مرقوم دیر ایدی که :

«حضرت علی وفات ایتدی وابن ملجم آنی شهید ایتدی.  
آنك اولدوردیکی امام علی صورتنده بر شیطان ایدی. حضرت  
علی الیوم بلوطلرده در. رعد، آنك آوازی و برق، قامچیسیدر  
و آخر زمانده یره اینوب دنیایی انوار عدل ایلله طولدوره جقدر.»  
بونك مذهب باطلنه سالک اولانلر كوك کورله دجه «علیک

السلام یا امیر المؤمنین» دیرلر ایتمش !

کاملیه

ایکنجیسی - ابو کامله منسوب اولان (کاملیه) فرقه سیدر که  
غلاة شیعه نك اشعارندندر.

ابو کامل، ارتحال نبویدن صکره امام علی یه بیعت ایتدکلی  
ایچون اصحاب کرامك کافه سنی و کندی حتی اولان امامت  
و خلافتی آرامیوب ترك ایتدیکیچون حضرت علی یه تکفیر ایلدى.  
بوخیث، عندالموت تناسخ ارواحده قائل اولدى و «امامت  
بر نوردز؛ بر شخصدن شخص آخره منتقل اولور و او نور بر  
شخصده نبوت و دیگر شخصده امامت اولور و بعضاً دخی نور  
امامت، نور نبوته منقلب اولور.» دیدى.

بنانیه

غلاة شیعه نك اوچنجیسی - «بنان بن سمان التیمی الهدی  
الینى» نام شخصه منسوب اولان (بنانیه) فرقه سیدر.

بونلر «جناب حق (حاشا) انسان صورتنده در و آنك هپسی  
هالك اولور؛ یالکر وجهی باقی قالیر و روح الله حضرت علی یه،  
آندن صکره علینك مخدومی محمد بن حنفیه، آندن صکره اوغلی  
ابی هاشمه، وبعده بنانه حلول ایتمش در.» دیدیلر و بر منوال  
محرر الوهیت جناب علی یه قائل اولدیلر.

مرویدرکه :

مرقوم بنان بن سمان، (امام محمد باقر) رضی الله عنه



حضرت تارینه مکتوب کوندروب امام مشارالیهی کندی اعتقاد باطلنه دعوت ایتمشدی. حضرت امام دخی کتیرن آدمه «شو مکتوبی یوتارمیسین؟» بیوردی و حریف یوتدینی کبی وفات ایدوب بنانک بطلانی و حضرت امامک کرامتی ظاهر اولدی. مرقوم بنانی ده اک صکره (خالد بن عبد الله القسری) نامنده بریسی قتل ایلدی.

حضرت علی کرم الله وجهه زمان خلافتنده کندی حقنده مذهب حلوله ذاهب اولان ملاحده بی سیاسته احراق بالنار ایدردی.

حضرت علیدن صکره مخدوم مکرملری (محمد بن حنفیه) حقنده «مختار بن ابی عیید» دخی حلول و اتحاد اعتقادی اظهاری ایتمدیکی (محمد بن حنفیه) نک مسموعی اولدقده حضرت مشارالیه غضبنک اولوب مختاره نفرین ولغت ایله کندیکنک بولوث تهمتدن برائتی اظهار و اعلان ایلدی.

(محمد بن حنفیه) دن صکره، امام جعفر صادق حضرت تلرینک دخی سمع شریفلرینه بو خبر ضلالت اثر واصل اولدقده اوده مرتکب و مخترعنه لغت ایله اظهار برائت ذمت بیوردیلر.

مغیریه

غلاة شیعه نك دردنجیسی - «مغیره بن سعید العجلی» یه منسوب اولان (مغیریه) فرقه سیدر.

بونلر «جناب حق نوردن بر رجل صورتنده در. باشنده نوردن بر تاج وار. قلبی منبع حکمتدر. وقتا که مخلوقات یاراتمی مراد ایتدی، اسم اعظم ایله تکلم بیوردی. متعاقباً اوچوب باشنه بر تاج قوندی که (سبح اسم ربك الاعلی الذی خلق فسوی) نظم جلیلی بو معنایی مشعردر. بعده انه اعمال عبادی یازدی و آنلرک عصیاننه مطاع اولوب غضبه کلمکه ترلهدی. ترندن بری طاتلی و نورانی، و دیگری طوزلی و ظلمانی ایکی دکر حاصل اولدی و بحر نیره نظر ایتدکده کندی کولکه سنی کوروب او کولکه دن بر مقدار آلهرق مهر و ماهی آندن یاراتدی و «بنله برابر اله آخر کرکز.» دیهرک کولکه نک باقیسنی نفیاً للشریک افنا ایلدی.»

«صکره ذکر اولنان طاتلی دکردن مؤمنلری، و طوزلی دکردن کافرلری یاراتدی و ناسک کمکرده راه نجات اولدینی بر زمانده حضرت محمد علیه السلام افندمزی بعث و ارسال بیوردی و اماتی - یعنی حضرت علی بی امامتدن منع خصوصنی - کوکله، یرلره، طاغلره، طاشلره عرض ایتدکده جمله سی ابا ایدوب انسان - یعنی حضرت عمرک تشویقیله و کندیدن صکره خلافتی آکا وصیت ایتک شرطیله حضرت ابو بکر قبول ایلدی و (کمل الشیطان اذ قال للانسان اکفر فلما کفر قال انی برئ منک) آیت جلیله سی ابو بکر ایله عمر حقنده نازل اولدی و امام منتظر، زکریا بن محمد بن علی بن الحسین بن علیدر و خروجه مأمور



اولنجیه قدر بر حیات اوله رق (جبل حاجر) ده مقیدر. «دیدیلر»  
(مغیره) بالآخره قتل اولندی. قتلندن صکره کندی اصحابی  
اختلافه دوشوب کیمی امام منتظر، مغیره در! کیمی - مغیره نك  
دیدیکی کبی - زکریادر دیهرک هرایکی طاقم ده ضالانده قالدیلر.  
«نعوذ بالله تعالی منهم».

## جناحیه

غلاة شیعه نك بشنجیسی - «عبد الله بن معاوية بن عبد الله  
بن جعفر ذی الجناحین» نام شخصه منسوب اولان (جناحیه) فرقه سیدر.  
بونلر دخی تناسخ ارواحه قائل اولوب دیدیلر که:  
«روح الله ابتدا بدن جناب ابوالبشره، آندن صکره بدن  
حضرت شیثه، آندن دخی حضرت علی ایله اوچ نفر ولد مکرمنه  
منتهی اولنجیه قدر ابدان انبیا وائمیه واک صکره ده عبد الله بن  
معاویه به منتقل اولدی».

بو طائفه مردوده رئیس مذهببری مرقوم عبد اللهک الیوم  
بر حیات اولوب اصفهانده کائن بر طاغده مقیم ایدوکنی و قریباً  
خروج ایده جکنی اعتقاد و یوم قیامتی انکار و خرومیتیه و زنا  
مثالو محرماتی استحال ایدر.

## منصوریه

غلاة شیعه نك آلتنجیسی - «ابو منصور عجل» یه منسوب  
اولان (منصوریه) فرقه سیدر.

ابو منصور (امام محمد بن علی الباقر) حضرتلرینه ادعای  
نسبت ایدردی. حضرت امام عقائد باطله سنه مطلع اولنجیه آتی  
حضورندن طرد ایله کنديسنندن تبری ایلدی. اوده حضرت  
امامك وفاتنه قدر سکوت ایدوب بعده کندی نامنه اعلان امامته  
جراتنه «امام محمد باقر حضرتلرینك دارعقبایه ارتحانده امامت  
بکا منتقل اولدی» دیدی.

ملوك امویهدن (هشام بن عبد الملك) زماننده والی عراق  
مشهور (حجاج ظالم) ابو منصورك خبث دعوتنه واقف اوله رق  
آتی اخذ ایله صلباً اعدام ایلدی.

ایشته بونلر دخی «امام محمد باقر بن علی بن حسیندن صکره  
نوبت امامت ابو منصوره منتقل اولدی. ابو منصور سحایه  
خیقدی! جناب حق ایله منصورك باشنی صیغادی!! و آکا! او غلم!  
یره این! بندن تبلیغ ایت!» دیدی. صکره آتی یره ایندیردی.  
(وان یروا کسفاً من السماء ساقطاً یقولوا سحاب مرکوم)  
قول کریمنده مذکور اولان (کسف ساقط) ابو منصور در [\*]  
ورسل و رسالت، ابدأ منقطع اولماز و جنت، حب و موالاتیه  
مأمور اولدیغمز بر کیسه نك اسیدرکه اوده امام حقدر. جهنم  
دخی بغض و معاداتیه مأمور اولدیغمز دیگر بر کیسه نك اسیدرکه

[\*] ابو منصور دعوای امامته قانعیشمازدن اول (کسف) ایله مراد  
علیدر دیر ایدی.



اوده (حاشا ابوبکر و عمر کبی) امام حقک ضدی و خصمی در .  
فرائض و محرمات دخی موالات و معاداتلریله مأمور اولدیغمز  
بر طاقم رجالک اسملریدر . دیدیلر . بوتأویلدن مقصودلری شو  
درکه : موالاتیله مأمورز دیدکلری کیمیه ظفریاب اولانلر  
اعتقادلرنجه جنته واصل و داخل اولمش صاییه جغندن اهل جنتدن  
تکلیف و خطاب، ساقط اولدیغی کبی، آنلردن ده تکلیف و خطاب  
قالقار .

## خطابه

غلاة شیعه نك یدنجیسی - « ابو الخطاب محمد بن زینب  
الاسدی » یه منسوب اولان (خطابه) فرقه سیدر .

ابو الخطاب، ابتداری (ابی عبد الله امام جعفر صادق)  
حضر تلرینه منتسب ایدی . صکره امام مشارالیه مرقومک کندی  
حق عالیرنده کی غلوباطنه واقف اولدقه آندن اعراض و تبری  
بیوردیلر . حضرت امام بووجه ایله کندیسندن اعراض و تبری  
بیوردقدن صکره، اوده کندی نامنه ادعا و اعلان امامته قیام ایتدی .  
بونلر «ائمه، انیادر و ابو الخطاب دخی نبی در . آندن اول  
کلن انیا ابو الخطاب طاعت و عبادت، فرض اولدیغی بیان ایتمشلردر  
وائمه معصومین یا لکر انیاده دکلدرلر . (حاشا) الهدرلر .  
حسنین افتدیلر من ابن الله درلر . جعفر صادق دخی الهدر .  
لکن ابو الخطاب آندن ده، امام علیدن ده افضلدر . » دیه زعم

ایدرلر و کندیلرینه موافقت ایدنلرک مخالفلری علیه یالان  
شاهدلکی ایتلرینی حلال بیایرلردی .

ابو الخطاب قتلندن صکره اصحابندن بر جماعت (معمربک  
امامتته ذاهب اولوب حال خیانتده ابو الخطاب عبادت ایده کلدکلری  
کبی، معمردده عبادت ایدر اولدیلر و «جنت - نعيم دنیادن،  
جهنم - آلام دنیادن عبارتدر . دنیا فانی دکلدر . » دیدیلر و جمیع  
محرماتی مباح درجه سنه تنزیل و فرائضی ترک ایلدیلر .

دیگر بر جماعت دخی ابو الخطاب قتلندن صکره (بزینغ) ک  
امامتته ذاهب اولوب «هر مؤمنه وحی الهی نازل اولور . » دیدیلر  
و یوبابده (وما کان لنفس ان تموت الا باذن الله) قول کریمیه تمسک  
ایدرک (باذن الله) ی (بو حی الله) ایله تفسیر ایلدیلر .

برده «بزینغک اصحابی ایچنده جبریل و میکائیل علیهما السلامدن  
بیله دها خیرلو کیمسلر وارددر و بونلر ابدأ اولزلر . نهایت عمره  
و اصل اولدقلرنده عالم ملکوتیه رفع اولنورلر . » زعم باطلنده ده  
بولنورلر .

اوچنجی بر جماعت دخی، ابو الخطاب قتلندن صکره امامت  
(عمرو بن بنان الجلی) یه منتقل اولدیغنه ذاهب اولوب شو قدرکه  
بوتلر اولومه قائل اولمشلر !

## غراییه

غلاة شیعه نك سکننجیسی (غراییه) فرقه سیدر .



بونلر دیدیلرکه :

« حضرت محمد علیه السلام، حضرت علی رضی الله عنه  
ضرباك غرابه، ذبابك ذبابه مشابهندن زیاده مشابه ایدی .  
بناءً علیه جناب حق جبریل علیه السلامی علیه به بعث و ارسال  
بیورمشیکن، جبریل یا کیلوب رسالتی حضرت محمد تبلیغ ایلدی! »  
بو سبیدن ناشی (صاحب الریش) ه لغت ایدوب طوررلر .  
(صاحب الریش) ایله ده جبریل امینی مراد ایدرلر . بونلرک  
شاعرلری :

« غلط الامین فجازها عن حیدره »

دیمشدر . الله عقل ویرسون !

ذمیه

غلاة شیعه نك طقوزنجیسی (ذمیه) فرقه سیدر .  
بونلر حضرت محمد، صلی الله علیه وسلم افندمزلی ذم ایدر  
اولدقلرچون (ذمیه) نامنی آلدیلر .  
دیرلرکه :

« حضرت علی اله اولوب ناسی کندی به دعوت ایتک اوزره  
حضرت محمدی بغت وارسال ایدن اودر . حضرت محمد ایسه  
ناسی کندی نامنه دعوت ایلدی . آنکچون ذمه مستحق اولدی . »  
حاشا وکلا .

بونلردن برطائفه دخی حضرت محمدکده، حضرت علی نك ده

الوهیتلرینه قائل اولدیلر . شوقدرکه برینی او برینه تقدیمده  
اختلاف ایدوب احکام الیهتده کیمی حضرت علی بی، کیمی حضرت  
محمدی تقدیم ایلدی . بعضیلری ده (اصحاب عبا) تسمیه اولنان  
حضرت محمد، حضرت علی، حضرت فاطمه، حضرت حسن،  
حضرت حسین افندیلر مژك بشی ده آلهدر و جمله سی شیء واحددر .  
روح الله بشنه ده مساوات اوزره حلول ایتشدر . هیچ برینک  
دیگرلری اوزرینه برکونه فضل و مزیتی یوقدر دیهرک اعلان  
ضلال ایلدیلر .

بونلر کویا تأنیث، عینندن احترازاً حضرت فاطمهیه (فاطمه)  
دیمزلر .

هشامیه

غلاة شیعه نك اونجیسی - « هشام بن الحکم وهشام بن السالم  
الجو الیقى » نام ایکی شخصه منسوب اولان (هشامیه) فرقه سیدر .  
هشام بن الحکم شیعه نك متکلملرندن ایدی . بونک معتزله دن  
ابو الهذیل ایله علم کلامده مناظره سی مشهوردر .

بو خیشلرک ایکسی ده الله تعالانک جسد اولدیغنده یکران  
وفاق اولدقدن صکره اختلاف ایدوب ابن حکم «الله تعالی طویل،  
عریض، عمیقدر و آنک طولی، عرضی، عمقی مساویدر . بیاض  
وصافی کموش کولچه سی کبی در ! هر جانب دن پارل پارلار !  
و آنک لونی، طعمی، رایحه سی، نبضی ده وار ! و بوصفتلر ذات



پاکنک غیری دکادر والله تعالی قالقار! اوطورر! متحرک و ساکن اولور. اجسامه مشاهددر. اجسامه مشابه اولمسه ایدی، وجود اجسام، وجود خدایه دلالت ایتزدی. کندیدن منفصل اولان برشعاع، واسطه سیله تحت الثری اولانی ده بیلیر و کندی قاریشیه ایدی قاریشدر و لاتفاوت عرشه مماسدر. یعنی نه کندی عرشیدن، نه ده عرش کندیدن فضله کلیر و اراده باری بر حرکتدر که کندیدنک نه عینی در، نه غیری در و جناب حق اشیایی وجوده کلدکن صکره قدیم ده حادث ده اولیان بر علم ایله بیلیر، زیرا علم، صفتدر. صفت ایسه بشقه برشیه وصف اولنماز و کلامی بر صفتدر که نه مخلوقدر، نه غیر مخلوقدر وائمه، معصوم و انبیا غیر معصومدر لر. زیرا نبی به وحی اولنورده آنکه الله تقرب ایدر. امام ایسه کندی به وحی اولنادیغندن آنامدن معصوم اولمق لازم کلیر و اعراض، وجود باری به دلالت ایتمز. وجود باری به دلالت ایدن آنحق اجسامدر.» دیدی.

ابن حکمک آرقداشی اولان (سالم) دخی «حق تعالی انسان صورتندهدر. کندیدنک الی، آیاغی، برونی، قولاغی، کوزی، آغزی، حواس خمس و اردر. چوق سیاهددر. نصف اعلاسی مجوفدر. نصف اسفلی مصمتدر. شوقدر که لحم و دم دکادر.» دین ایدی. «تعالی الله عن ذلك علواً کیراً» (مصمت، جوفی اولیان شیئه دینیر.)

## زراریه

غلاة شیعه نك اون برنجیسی «زرارة بن اعین» نام شخصه منسوب اولان (زراریه) فرقه سیدر.

بونلر صفات اللهك حدوشنه قائل اولوب «صفاتك حدوث و حصولندن مقدم جناب حق حیات، صفتیه متصف دکل ایدی. اول وقت حی ده دکل ایدی. عالم و قادرده دکل ایدی. سمیع و بصیرده دکل ایدی.» دیدیلر.

## یونسیه

غلاة شیعه نك اون ایکنجیسی - «یونس بن عبد الرحمن القمی» نام شخصه منسوب اولان (یونسیه) فرقه سیدر. یونس، مشهه شیعه دن اولوب مسائل مذهبییه سنی مبین کتابلر تألیف ایتمش در.

بونلر «جناب حق عرشك اوستندهدر. آنی ملکار طاشیر وهرنه قدر ملائکه نك محمولی ایسه ده ینه آنلردن دها قوی در. طورنه قوشی کی که وجودی آیاقلردن اقوی ایکن آنی ایکی اینجه وضعیف آیاغی طاشیر.» دیدیلر.

## شیطانیه

اون اوچنجیسی - «شیطان الطاق» نامیه معروف اولان محمد بن نعمانه منسوب اولان (شیطانیه) فرقه سیدر.

بو دیر ایدی که :



«جناب حق، غیر جسمانی بر نورد بر و مع ذلك انسان، صورتند در و اشیا بی آنجی وجوده کلدکن صکره بیلر.»

## رزامیه

اون دردنجیسی — «رزام بن شاقو» نام شخصه منسوب اولان (رزامیه) فرقه سیدر.

بونلر «امامت، حضرت علیدن صکره محمد بن حنیفه یه، آندن اوغلی ابی هاشم عبد الله، آندن ده وصیت ایله علی بن عبد الله بن عباسه، آندن صکره محمد بن علی یه منتقل اولوب محمد بن علی دخی اوغلی ابراهیمه وصیت ایلدی. ابراهیمدن ده منصوره کچدی. صکره جناب حق، ابو مسلم خراسانی یه حلول ایلدی و ابو مسلمی منصور خلیفه قتل اتمدی.» دیدیلر و محارمی استحلال، فرائضی ترک ایلدیلر.

بونلردن بعضیلری ده (مقنع) نام شخصک الوهیتنه قائل اولدیلر. «خذ لهم الله»

## مفوضه

اون بشنجیسی — (مفوضه) فرقه سیدر.

بونلر «جناب حق حضرت محمدی یاراتدقندن صکره دنیا و مافیها نك خلق و ایجادینی آکا تقویض بیورمغله خلاق جهان، نبی آخر الزماندر.» دیرلر.

بعضیلری ده جناب حق کائناتک امر ایجادینی حضرت علی یه تقویض بیورمش؛ اوده دنیا بی یاراتمش دیه اعتقاد ایدرلر.

## بدائییه

اون آلتنجیسی (بدائییه) فرقه سیدر.

بونلر «جناب حق برشیئی اراده بیورر. صکره اوشی کندیسنه ظاهر اولور. یعنی جناب حقه ظاهر اولیان شیئک صکره دن کندیسنه ظاهر اولمسی جائزدر.» دیدیلر. بوحالده جناب حقک عواقب اموره عالم اولمامسی لازم کلیر.

## نصیرییه — اسحقاقیه

اون یدنجیسی (نصیرییه) و اون سکنزنجیسی (اسحقاقیه) فرقه لریدر. بونلر «جناب حق علی یه و آنک اولادینه حلول ایلدی. روحانی نك جسد جسمانی ده ظهوری ایسه نصل انکار اولنه بیلیرکه، جانب خیرده جبریلک صورت بشرده، جانب شرده شیطانک صورت انسانده ظهوری بونک امکانه مثالدر. مادام که کرك حضرت علی و کرك آنک اولاد کرامی غیریلرندن افضل ایدیلر، مادام که بونلر باطن اسراره متعلق تأییدات ایله مؤید ایدیلر، بزده حق تعالی آنلرک صورتلرنده ظاهر اولدی. آنلرک لسانلریله نطق ایتدی دیدک.»

ایشته بوجهته درکه، ائمه یه آلهه اطلاق ایتدک. کورمز میسین که، حضرت نبی اکرمک مقاتلات و محارباتی مشرک لره، حضرت



علینک منافقارله ایدی . زیرا پیغمبرک حکمی ظاهره در . اللهک کی سرأثره در . دیدیلر .

### اسماعیلیه

اون طقوزنجیسی (اسماعیلیه) فرقه سیدر .

بونلر آتی الذکر یدی لقب ایله ملقب اولدیلر .

باطنیه ۱ قرامطه ۲ حرمیه ۳ سبعیه ۴ بابکیه ۵ محمره ۶ اسماعیلیه ۷

باطنیه، تلقیب اولدیلر . چونکه بونلر «نص قرآنک معنای ظاهری ده معنای باطنی ده وارد و مقصود معنای ظاهری دکل، معنای باطنیدر . باطنک ظاهره نسبتی، لبک قشره نسبتی کی در ظاهر قرآن ایله متمسک اولان کیسه مشقت اکتساب ایله معذبدر . باطن قرآن، ظاهر قرآن ایله عملی ترکه مؤیددر» دیدیلر و بو مسئله ده (فضر بینههم بسورله باب باطنه فیة الرحمة و ظاهره من قبله العذاب) قولیه تمسک ایلدیلر .

بو قولی منصوریه و جناحیه فرقه لرینک کلامندن اخذ ایتشلردر .

§

قرامطه نامنی ده آلدیلر .

چونکه ناسی اک اول بو مذهبه دعوت ایدن شخصک اسمی (حمدان قرمط) ایدی .

قرمط، لفظنده موزخلرک اقوالی مختلفدر .

برروایت کوره قرمطیلرک رئیس مذهبیری اولان (حمدان) خلقی مذهب باطننه دعوت ایچون کوفه حوالیسنه کیدوب اوراده خسته لنمکله لغت نبطیه ده «قرمزی کوزلی» معناسنه اولان (کرمیته) نامنده برحریفک خانه سنده یاتمش واوراده بالتداوی کسب عافیت ایتمش اولدیغندن خانه صاحبک اسمیه ملقب اوله رق بعده تعریب و تخفیف ایله (قرمط) دیمشالر .

دیگر روایت کوره عظمای قرامطه دن بریسی «کرفت یازو» معناسنه اولان (خط مقرمط) تحریریه مشغول اولدیغندن بوکا نسبتله طائفة مرقومه یه (قرمطی) تسمیه ایتشلردر .

کرك شرح مواقفده و كرك شهرستانك ملل و نحلنده (قرمط) بغداد ایله بصره آرمسند کائن بلاد قدیمه مشهوره دن (واسط) نام بلده یه ملحق برقریه نک اسمیدردیه قید و تصریح اولمشدر . قرامطه نک ابتدای ظهوری علی اختلاف الروایتین خلفای عباسیه دن یا (هارون الرشید) یا خود (مأمون) وقتلرینه مصادف ایسه ده آتش شر و مفسدتلری زیر خاکستر ملعنتده پنهان ایدی . کیده رک توسیع دائره دعوت و استحصال اسباب قوت و شوکتله محال کثیریه شراره فشان اولدی .

تفصیلی آتیده کله جکدر .

§

حرمیه، تسمیه اولدیلر . چونکه محرمات و محارمی اباحه ایتدیلر .



§

سبعیه، نامنی ده آلدیلر . چونکه شرایع ایله ناطق اولانلرک،  
مرسلین دیمکدر ؛ یدی نفر اولدیغنی زعم ایلدیلر . نطقای سبعة  
بونلردر . آدم ۱ نوح ۲ ابراهیم ۳ موسی ۴ عیسی ۵ محمد  
مصطفی ۶ محمد مهدی ۷

اشبو نطقای سبعة دن هر ایکسینک آره سنده ده یدیشر امام  
واردرکه، اول کان پیغمبرک شریعتی آنلر تئیم و اکال ایدرلر  
ایمش و هر عصرده همه حال یدی امامک وجودی لابد و لازم  
ایمش که آنلره اقتدا و دینده آنلره اهتدا اولنسون و بوائمه  
سبعة نک .... لری متفاوت و القابی مختلف ایمش .

شویله که :

- ۱ — امام،
- ۲ — حجت،
- ۳ — ذومصه،
- ۴ — ابواب،
- ۵ — داعی مأذون،
- ۶ — مکتب،
- ۷ — مؤمن .

بونلرک برنجیسی اولان (امام) جناب حقن مؤدی و دین  
خداده ادله نک غایتی در .

ایکنجیسی اولان (حجت) امامدن مؤدی، و علم امامی حامل  
اولوب او علم ایله احتجاج ایدر .  
او چنجیسی اولان (ذومصه) علمی (حجت) دن امر، یعنی طفل  
شیرخوار، غدای وجود اولان سودی آناسنک ممه سندن امیدی  
کبی بوده علمی اول وجهه ایله حجتدن اخذ ایده کلدیکچون  
(ذومصه) نامنی آلمشدر .

دردنجیسی اولان (ابواب) دعوته مأمور اولان داعیلردر .  
بورتبهیی احراز ایدنه (داعی اکبر) دینیرکه مؤمنلرک درجاتی  
ترفع ایدر .

بشنجیسی اولان (مأذون) اهل ظاهر دن بومذهب ناپاکه سلوک  
و ذهابه طالب اولانلرک عهد و میثاقلرینی اخذ ایله کندیلرینی  
ذمت امامه ادخال، و آنلره علم و معرفت بابی کشاد ایلر .

آلتنجیسی اولان مکتبک دخی کرچه دین و مذهبه درجه سی  
عالیدر، لکن کندی طوغریدن طوغری به خلقی دعوت و ارشاده  
مأذون دکلددر . مأذونیتی یالکز ناس اوزرینه احتجاجه منحصردر .  
شویله که :

آوچینک کوپکی چالیلقلر آره سنه صوقیلوب آو آراشدیردینی  
کبی، بوده اهل ظاهر آره سنه صوقیلهرق قابل دعوت اولان  
ساده دلانی بر طاقم کلمات ابلهفریبانه ایله قانديروب — عهد  
و پیمانلرینی آلق و ذمت امامه ادخال ایتک ایچون — داعی  
مأذونه ایصال ایدر .



سيف الدين آمدی دیدی که :

« بونك كيسنه (مكلب) ديملى آو ايچون صيادلرك بسله -  
دكلرى (جارحه) يه - يعنى آو قوشنه - بکزه دیکچوندر. نصل که  
قرآن کریمده (وما علمتم من الجوارح مکلین) بیورلمش در.»  
جوارح - آئمه جه وطوغان مثللو آو قوشی معناسنه اولان  
جارحه نك جمعیدر.

جارحه - ال، آياق و سائر اعضا معناسنه مستعملدر. لکن  
بوراده مقصود معنای اولدر.

مکلب - میمک ضمی، کافک فتحی، لام مشدده نك کسریله  
کلبه تعلیم صید ایدن آدمه دینیر.

یدنجیسی اولان (مؤمن) داعییه تابعدرکه، عهد و پیمانی  
آلتمش، مذهب قرامطیه ایمان ایدوب اینانمش، ذمت امامه  
کیرمش، آنک جماعتندن معدود اولمش اولان کیمسه در.

بونلر «ائمه نك عددی یدیدن اکسک وزیاده اوله ماز. چونکه  
کوکلر، یرلر، دکزلر، هفتته کونلری، مشهوره کوره مدبرات  
امر اولان کواکب سیاره دخی هپ یدیشردر. آنکچون ائمه نك ده  
عددی یدی اولمق لازم کلیر.» دیدیلر.

§

بابکده تسمیه اولندیلر.

چونکه بونلردن برطائقه (آذربایجان) دیارنده (بابک حزمی)  
نام خارجییه خروجده اتباع ایتمشلردی.

§

محمره نامنی ده آلدیلر. چونکه بابکک کوننده قرمزی اثواب  
اکتسا ایدرلردی.

بونلر مخالف مذهبلی اولان مسلمینی (حمیر) تسمیه ایدرلردی.  
(محمره) نامنی آلملرینک بروجهی ده بودر دینلیدی.

§

اسماعیلیه دیه نامور اولدیلر.

چونکه جعفر صادق رضی الله عنه حضرت تلرینک اکبر  
اولادی اسماعیلک امامته قائل اولدیلر.  
شویله که :

جعفر صادقدن صکره امامت و خلافت امری، مقتضای نص  
و وصیت اوزره مشارالیهک اکبر اولادی امام اسماعیلیه نقل ایتدی  
ذیدیلر و امام اسماعیل هر نه قدر پدرلرندن مقدم وفات ایتمکه  
حائر منصب خلافت اولمق مقدر اولمادی ایسه ده سلسله امامتک  
سلاله ذریترلرنده بقاسنی ثمره نص و وصیت عد ایتدیلر.


نته کیم حضرت موسادن مقدم حضرت هارون وفات ایتمش  
ایسه ده مقتضای نص اوزره سلسله خلافت اولاد هارونه نقل  
ایلدی.

بناء علیه طائفه اسماعیلیه عندنده امام جعفر صادق حضرت تلرندن  
صکره منصب جلیل امامت، امام اسماعیلک ولد مکرملری محمد  
مکتومه نقل ایلدی. لکن شوکت وسطوتی اولمامله مستور



و مخفی ایدی. بوجهتله اسماعیلیه به کوره محمد مکتوم ائمه مستورینک  
اولی عد اولنور .

زیرا بونلر، رأی باطللری اوزره امامک امر خلافتده عجز  
وقصوری امامت و خلافته استحقاقه مانع دکلدر. شوکت وسط، تی  
اولماغله کندی مستور اولدینی حالده اطرافده داعیلری ظهور  
ایدوب اقامت دلیل و حجتله خلقی امام حقک اطاعتنه سوق  
ودعوت ایدرلر . بعده امامک شوکت وسطوتی، واقامه مراسم  
خلافته مکننت و قدرتی درجه کفایه به واصل اولدقده کندی بنفسه  
خروج و ظهور ایدوب حقنی دعوی، ودعوتی ناسه اظهار ایدردیو  
زعم ایتدیلر .



بونلرک اصل اصول مذهبه لری ابطال احکام شرایع ایله  
تمهید مبانی فسق و الحاد و نشر آثار اهانت و فساد ایدی .  
بو مذهب باطلک سبب ظهوری اولق اوزه کتب کلامیه ده  
مذکور اولان روایات تاریخیه دندر که :

دیار شرقیه ده متوطن طوائف مجوسدن (غیاریه) نام طائفه  
خیئه رئیس لری اولان (حمدان قریط) یاخود (میمون بن القداح)  
نام شخصک تحت ریاستده عقد انجمن مشورت ایدرک «مسلمانلر  
ممالکمزى ضبط و استیلا، حکومتزى محو و افنا ایتدیلر . آرتق  
حرباً آنلره غلبه ممکن دکلدر . بو بایده اعمال لطائف الحیلدن

بشقه چاره من یوقدر . کلیکز ! شریعت اسلامیه بی تأویله قالدیشه لم .  
ضعفای مسلمینی بوصورتله اله آلیرز . کیده کیده جمعیتز بیور .  
بوصورت، بین المسلمین حصول اختلافه بادی، و بالآخره بزم  
قواعد مذهبیه نك عودتی مؤدی اولور . « دیدیلر و بو قرار  
شیطان پسند اوزرینه شو مذهب ابلسانه بی احداث ایتدیلر .  
ساده دلانك جلب قلوب چون طوتدقلری مسلكه دقت  
اولنورسه «جزویت» پاپاسلرینك اغفال ناس ایچون قولاندقلری  
حیل و دسایس بونلرک تسویلات شیطانیه سنه نسبتله عادتاً هیچ  
حکمنده قالیر .

بو بدیهیدرکه، عمومك اعتقادینه مخالف بر دین و مذهبه  
خلقی آچیقدن آچیغه دعوت ایده بیلک قولای برشی دکلدر .  
باخصوص باطنیلرکی یالانچیلرک ایسه بردن بره هرکسه آچیله ماملری،  
بناء علیه تکثیر اعوان و انصار ایدنجیه قدر غایت کیزلی و اوسته لقلی  
حرکت ایتملری طبعییدر .

ایشته بو ایمانسزلرک امر دعوتده طوتدقلری یوله باقکز !  
مراتب دعوتك برنجیسی (ذوق) در دیدیلر .  
ذوق - قابل دعوتی دکلکی دیه مدعوك حالنی تفرس دیمکدر .  
برده (سنجه) ده بذر القا اولماز . (سراج) اولان خانه ده  
تکلم ایدلر دیدیلر .


(سنجه) زمین شوره زار (بذر) تخم معناسنه اولوب زمین  
شوره زاره تخم افشان اولمقده فائده اولمادینی کی، قابل دعوت



اولیان کیمسه بی ده دعوتده فائده یوق دیمکدر . آنکچون قابل دعوت اولوب اولمادیغی آکلامقسزین کیمسه بی دعوته قیام ایتمز لر . سراج - فقیه و متکلمدن کنایه در .

علمای دین بونلرک اقوال باطله سنی ادله عقلیه و شرعیه ایله ابطاله مقتدر اولدقلرندن علما بولنان محلامده امر دعوته دائر اصلا سوز آچازلر .

ایشته بوکا اشارت اولمق اوزره «سراج اولان خانه ده تکلم ایدلز .» دیدیلر .



ایکنجیسی (تائیس) در .

شویله که: داعی، مدعوک هوا وهوسنی، فکر و آرزوسنی، الحاصل هر حالی اوکره نیر . مدعو، زهد مائل ایسه داعی آنک قارشیسنده پارسای مجسم کیلیر . فاسق ایسه داعی زهد و تقوادن یان چیزمه ده شیطان جارق کیدیرر . دینسز ایسه داعی ادیانک عمومنی بردن باتیرر . طبیعی درکه، داعینک بوموافقت و مماشاتندن مدعو ایله ییننده مؤانست حاصل، آرهدن وحشت زائل اولور .

بو مؤانست ایسه بالآخره سبب حصول موافقت اوله رق داعی بوضورتله مطلوبنه واصل اولور .

## استطراد

بوخیثلرک احوال و اطواری جزویتلرک احوال و اطوارینه تمامیه مشابه اولدیغی بالاده بالمناسبه بیان ایتشدک . ادیب حکیم سعادتلو احمد مدحت افندی حضرتلری (مدافعه) نام اثر معتبرلرنده جزویتلرک حالی پک کوزل تصویر بیورمش اولدقلرندن دعاة باطنیه نک حالیه جزویتلرک حالی مقایسه یه مدار اولمق اوزره بروجه آتی عیناً نقل ایلرز .

مشارالیه دیور که:

«بر جزویتک تمامیه جزویتلرک حالی کورمک ایسترایسه کز شو اوصافه دقت ایدیکز! دینلیور که:

«سز کندیکزی تسخیره مأمور اولان جزویتی هنوز طانیه دن او سزک احوالکزی، اطوارکزی، افکارکزی او کزنوب حضورکرده اول وجه ایله اثبات وجود ایلر . خیشک هر حال و قال و فکرینی کندیلرککیه تمامیه موافق بولورسکز . اول صورتده که کویا سز کندیکز جزویت اونیفورمه سنه کیرمشسکرده یینه کندی حضورکره کلشسکر . متعصب ایسه کز جزویت برتعصب مجسمدر . دینسز ایسه کز جزویتده دینه دائر شمه بوله مازسکر . دینه دائر اولان قیوداتک هپسی یالان و جمله سی افکار جهلایی آلماتق ایچون ترتیب اولنمش برطاقم طولابلر اولدیغندن بحث



ایدر. حکومت طرفداری ایسه کز جزویتی قرالک اوزقنداشندن دها یقین اقرباسی ظن ایدرسکز. جمهوریت فکرینه مالک ایسه کز حریت مجسمه جزویت اولور. اهل عرض بر آدم ایسه کز جزویت دخی ملکدر. سفاهت مشربکز وار ایسه عالمده اک بیوک اک ظریف خوارده بی جزویتده بولورسکز. الحاصل جزویت سزک هیچ برفکرکره اعتراض ایتمز. حتی دینی، ناموسنی، جاتی بیله سزه موافقتده فدا ایدر.

«بوراده ناموسی اک صکره ذکر ایتمدیکمزه وجاتی فدا ایدوب ده ناموسنی صکره فدا ایتمش اولمق ایچون محافظه ایلدیکنی عرض ایلمدیکمزه اعتراض ایتمکز! واقعا ارباب ناموس ایچون اک صکره فدا ایدیله جک ناموسدر. فقط جزویت ایچون اک اول فدا ایدیله جک بر شی وار ایسه آنکده ناموس اولمسنده هیچ بر باس یوقدر. زیرا کندیسنده بولنخیان بر شیئی فدا ایده جک دیمکدر.

«شمدی سز سؤال ایدرسکزکه، جزویت هرشیئی بنم ایچون فدا ایده جک اولدیغی حالد بنم یوزمدن استیفا ایده جکی نه امل قاله بیلور؟

«هاه! ایشته جزویتک براملی وار ایسه اوده سزه بولقردی بی سویلته بیله جک قدر اعتمادکزی قزانمش اولمقدر. زیرا سز کیمسکز بیلورمیسکز؟ یا سرای قرالیده غایت صاحب نفوذ بر آدم، یا بویله برصاحب نفوذک محرم اسراری، یا بر والی، یا بروالینک

کتخداسی و محرمی، یا بر بیوک عسکر قوماندانی، یا ارباب معارفدن، یا بر بیوک محرر، یا هر صورتله نفوذینی یوروته بیله جک برقارینک دوستی، الحاصل سز او یله بر آدمسکزکه سزکله اولان محبتده هیچ بر غرض و عوضی اولیان جزویت بیچاره سنک لهنده سوز سویلیانلره و آنلرک ینه سزک کبی وسزک قدر دوستاری میاننده دوران ایدن بر مذاکره ایدنا بر یاردمکز سایه سننده بر «سن بارتلمی» قتل عامی وقوع بولور. آلتمش بیک پروتستانک باشی کسیلور. بوندن سزجه بر ضرر وارمی؟ .... و یاخود آغزندن آغزه تابر آلمانیا ایمپراطورینه قدر واصل اولان حسن شهادتکز اوزرینه بر «محاربه سی ساله» چیقار. سز بویله آلمانیا نفوسنی تنصیف ایده جک اولان بر محاربه بی نظر نفرتله کورمک شویله طورسون، بالعکس پروتستانلر کبی افکار مفرطه اربابنک بودنیادن وجودلری قالمسینی لازم کوررسکز. چونکه یانکزده قاتولیک تراکتک بر مثال مجسمی واردرکه هر حالنه حیران اولمقده و اول مذهبی دخی طبقی افکارکره موافق بولمقده سکز.

مدافعه نك عبارده سی بوراده بتدی.

نصل، باطنیلرک هر حالی جزویتلره بکزه مزمی؟ باطنیلرکده شو سایه ده وجوده کتیردکلری وقایع عظیمه بی انشاء الله آشاغیده کوررسکز.

ایشته تفصیلات مبسوطه ارباب دفته کوره بیوک بر درس انتباهدر.



باطل همیشه باطل و بیهوده در ولی ،

مشکل اودر که صورت حقندن ظهور ایده .

جناب حق بالجمله امت محمدی صورت حقندن ظهور ایدن  
بو مثالو شیاطین انسکده شرنندن محافظه بیورسون آمین . تم  
الاستطراد .

§

مراتب دعوتك او چنجیسی ارکان دینده تشکیکدر .

شویله که : مدعو ایله مؤانست حاصل اولدقده آنی ارکان  
دینده شك وشبههیه دوشوررلر . مثلاً دیرلر که ، «اوائل سور  
قرآنیهدده کی حروف مقطعهك معناسی نه در ؟ » اورج ، نماز بونك  
ایکیسیده فرضدر . « دینله یور . اولیله ایسه حائضه صومك قضاسی  
واجب اولوبده صلاتك قضاسی واجب اولماقده حکمت نه در ؟  
منیك خروچندن غسل ، واجب اولورده متبوله نیچون غسل ،  
واجب اولماز ؟ بش وقت نمازده کی رکعتلرك کیی درت ، کیی اوچ ،  
کیی ایکی اولمسنده سبب نه در ؟ »

ایشته بوکا مماثل سؤالار ایراد ایدرک و فقط جوابلرینی  
ویرمیهرك مدعو مأنوسی شك وشبههیه براقیرلر و «بونلرك حکمتی  
آکلایه حق زمان دها کلدی ! » دیرلر که حل مشکل ، مراقیله  
مدعوك کندیلرینه مراجعته مجبوریت وانهاکی زیادهلشسون .

§

دردنجیسی ربطدر .

ربط ، ایکی امردن عبارتدر .

۱ — مدعودن کندی اعتقادینه کوره عهد وميثاق آلمقدر .

شویله که : آکا «حق تعالی »واذ اخذنا من النبیین ميثاقهم»  
بیورمدیمی ؟ ایشته سنت خدا اخذ عهد وموایق ایله جاری  
اوله کلمش در . بناءً علیه آخره افشای راز ایتیه جککه یمین  
ایتملیسین . « دیرلر ومدعوك اعتقادینه کوره کندیسنندن عهد  
وميثاق آلیرلر .

۲ — کندینه القا اولنان امورك اشکالاتی حل ایچون  
مدعوی امامه حواله ایتمکدر .

آکا دیرلر که : بواسرار خفیهیه امامدن بشقهسی واقف  
دکدر . بونلری آکلامق ایسترسهك ، امامه مراجعت ایتملیسین که  
حضیض تقلیددن ، اوج تحقیقه ارتقا ایلیهسین .

§

بشنجیسی تدلیسدر .

اکابر دین ودنیانك کندیلریله متحد ومتفق اولدقلرینی ادعا  
ایدرك ، یعنی مدعوینك دین ودنیالرنجه بیوك کورمش ، بیوك  
طانیمش اولدقلری ذواتك هپسی بو مذهب و مشربده اولدیغندن  
بحث آچهرق دها زیاده جلب قلوبه چالیشمقدر .

§

آلتنجیسی — تأسیسدر .



بو دخی مدعوك قبول وتسليم ايدہ جکی و کندينی دعوت  
اولندينی امر باطله سوق ايليه بيله جکی مقدماتك تمهيديدر.

§

يدنجیسی - خلعدر.

بوده اعمال بدنيهی اسقاطدر.

§

سکزنجیسی - سلخدر.

حيوانك دريسنی فصل يوزرلرده چيقارلر سه مدعوی دخی  
حق اولان اعتقادات دينيه دن صيروب چيقارمغه سلخ، تعبير  
ايتديلر.

ايشته مدعوك حالی بودرجهيه واردقده آرتق بوندن دونمك  
و «سرويرمك وار، سرويرمك يوق.» مثلنجه افشای راز ايتمك  
احتمالی قالميه جغندن بوندن صكره هرشی ئی اباحه ايله استعمال  
لذاته، تأویل شرایعه باشلارلر.

ديرلر که :

آبدست - امامه موالاتدن عبارتدر.

تیم - امامك غیابی حالنده (حجت) دینیلن مأذوندن اخذ  
علم ایتمکدن کنایتدر.

نماز - رسول، وتعیر دیگرله ناطقندن عبارتدر. بوكاده  
(ان الصلاة تنهى عن الفحشاء والمنکر) قول کریمی دلیلدر.

احتلام - نا اهله بغیر قصد افشای راز ایدی، ویرمکدر.

غسل - تجدید عهد وميثاق ایلکدر.

زکات - تزکیه نفسدر.

کعبه - } نجي دن کنایتدر.  
صفا - }

باب - } علی دن عبارتدر.  
مروه - }

میقات - ایناس دیمکدر.

تلبیه - اجابت دعوتدر.

یدی کره بیت شریفی طواف - ائمه سبعهیه موالاتدر.

جنت - ابدانك تکالیفدن راحت قالمسیدر.

جهنم - مزاوله تکالیف ايله ابدانك مشقتده اولمسیدر.

(مزاوله، برشی ئی میدانه کتیرمك ایچون چالشمق معناسنه در)

«الی غیر ذلک من خرافاتهم خذلهم الله»

جمله معتقداتلرنندن بری ده بودر که :

«جناب حق نه موجوددر، نه معدومدر؛ نه عالمدر، نه جاهلدر؛

نه قادردر، نه عاجزدر.» دیوب صفات الهمیهنك کافه سنی بویله

تشکیک ایدرلر. زیرا «اثبات حقیقی واجب الوجود ايله سائر

موجودات آراسنده مشارکتی اقتضا ایدر. بو ایسه تشبیه در.

نفی مطلق دخی آنک معدوماته مشارکتی مقتضیدر که بوده تعطیله

نتیجه ویرر. جناب واجب الوجود بو صفتلرک واهی و امور

متقابله ومتضادهنك ربی در.» دیرلر.



بعض کرده کلامی فی فلاسفه کلامیه خلط ایدرک  
دیرلر که :

« حق تعالی (امر) ایله بالفعل تام اولان عقلی و بو عقل تام  
واسطه سیله غیر تام اولان نفسی ابداع ایلدی و نفس ، عقلک  
کالنه مشتاق اولوب ، بناءً علیه نقصاندن کماله وصول ایچون  
حرکته محتاج اولدی .

بو حرکتک حصولی ایسه آلتسز ممکن اوله مدیغندن اتمام  
وامکان حرکت نفس ایچون اجرام فلکیه حادث ، و بونلرده  
تدبیر نفس ایله حرکت دوریه ایله متحرک اوله رق طبایع بسیطه  
عنصریه او حرکتک ، معادن و نباتات و انواع حیواناتدن اولان  
مرکبات دخی او بسائطک توسطیه وجوده کلدی و انواع  
حیواناتک افضلی انساندر . زیرا انسان فیض انوار قدسیه  
مستعد و عالم علوییه متصلدر و چونکه (عالم علوی) عقل کامل  
کلی بی ، برده بمصدر کائنات اولان نفس ناقصه کلیه بی مشتمل  
اولدینی کی ، عالم سفلیده و سیله نجات اولور بر عقل کاملک ،  
برده نفس ناقصه نک وجودی واجبدر . (عقل کامل) رسول ناطقدن  
عبارتدر . نفس ناقصه نک دخی طرق نجاتی تعریفده ، ناطقه نسبتی  
ایجاد کائناته راجع اولان اموره نفس اولانک عقل اوله نسبتی  
کیدر و بو نفس ناقصه دخی ناطقک و صیسی اولان امامدر  
و افلاک حرکتی نصل که عقل و نفسک تحریکیله حصول پذیر  
اولیورسه ، کذلک نفسک سمت نجاته طوغری حرکتی ناطق

و وصینک تحریکیله متیسر اولور و هر عصر وزمانده حال بومنوال  
اوزره جاریدر . « بتدی .

سیف الدین آمدی دیدی که :

باطنیة اسماعیلیه نک قدماسی بو عقائد باطله اوزرینه تأسیس  
مذهب ایتشلردی .

صکره حسن بن محمد صباح ، ظهور ایدوب دعوتی تجدید  
ایتدی ؛ و ( بن زمانک کنديسندن خاوی جائر اولیان حجت )  
دیدی . بونکده حاصل کلامی معلمه احتیاج خصوصنه دائر ذکر  
مرور ایدن سفسطه دن عبارت ایدی . صکره کندی فضیحه لرینه  
خاقلک طریق اطلاعی سد ایچون عوامی تحصیل علومدن ،  
خواصی ده مطالعه کتب متقدمه دن منع ایلدی .

بعده فلسفه ایله مشغول اوله رق نوامیس دینی و امور شرعیه  
ایله استیزادن خالی قالمادیلر . ارواح خبیثه کی ضمائر ناسه حاول  
ایله تکثیر اعوان و انصار ، متین قلعه لره محصن ایله کسب مکنت  
و اقتدار ایلدیلر . شوکت و سطوت قاهره صاحبی اولوب اطرافده کی  
ملوک و امرایی سنه لرجه تترتیدیلر . تکالیف شرعیه بی علناً اسقاط ،  
محرماتی اباحه ایدوب عادتاً بهائم کی ضابط دینی و وازع شرعیسر  
قالدیلر . « نعوذ بالله من الشیطان و اتباعه »



«باطنية اسماعيليه نك احوال تاريخيه سندن بر نبذه»

و

حسن صباحك ترجمه حالي

بالاده بيان اولنديني اوزره مختلف نامرله شهرت شعار اولوب  
عالم اسلاميت و انسانيتي هرج و مرج ايدرجه سنده نيجه زمانلر  
اورتلاني تارمار ايدن بو فرقه خيشه دن اك اول ، خروج ايله  
حكومت مشروعه يه قارشى رفع لواي عصيان ايدن (ابو سعيد  
خجاني) نامنده بررئيس اشقيادر . بونك ابتدائى ظهورى بنى  
عباسدن (معتضد) خليفه زماننده (۲۹۶) سنه هجريه سنه طوغريدر .  
(۴۸۳) سنه هجريه سنه طوغرى شهرت بولمش اولان حسن  
بن محمد صباح (۴۳۰) له (۴۴۰) سنه لرى آره سنده دنيايه كلدى .  
حسن بن محمد صباحك سلسله نسي (صباح حميرى) يه منتهى  
و پدرى يمندن كوفه يه و كوفه دن ايرانه هجرت ايدوب حسنك  
(رى) بلده سنده تولد ايلديكنى كندى روايتسندن اخذ ايله بعض  
مورخين نقل ايتمش ايسه ده اكثر اقواله كوره كنديسى خراسانى  
الاصل اولوب پدرى فاسد الاعتقاد بر شخص مرتد بدنهاد ايدى .  
حسن بن صباح ، بدايت حالنده (خواجه نظام الدين طوسى)  
(حكيم عمر الحيام نيشابورى) ايله برلكده كبار علمائى خراساندن  
(امام موفق نيشابورى) نك درسنه حاضر اولوب بونلرك اوچى  
دخى حدت ذهن ، فرط دها و ذكا اصحابندن بولندقلرى جهته

آز زمانده تحصيل علوم عقليه و نقليه ايله مشار بالبنان اولورلر .  
هر كيم امام موفقك زانوزده حلقه تدريسى اولور ايسه  
مطلقا برر صورته رفعت و دولت دنويه نائل اولمق اوزره  
مشهور اولديغندن بركون (حسن بن صباح) نظام الملك ايله عمر  
الحيامه خطاب ايله «افاده سندن استفاده ايتمكه اولديغمنز امام  
موفقك خاصه فيوضات علميه سندن اوله رق شاگردانندن كافه سى  
نيل مناصب جليله ايله فيضيات اوله كلكلارى مشهوردر . بزلردن  
دخى هر هانكيز ابتدا دولت و اقباله نائل اولور ايسه يكديكرمز  
حقنده قاعده اخوت و مهربانيه رعايت ايتمنى موافق قويه يه  
ربط ايدلم .» ديدى .

(نظام الملك) عهد و پيمانك تعيين و تقريرنى حسنك رايته

حواله ايلر .

بونك اوزرينه حسن ، ايچلرندن هر هانكيسنه دولت ميسر  
اولور ايسه بونك تمتعنى نفسنه حصر ايتيوب مساوات مشتركه  
اوزره فائده مند اولمق و اول دولته نفسنى ديكرينه مرجع  
طوتماق شرطيله عهد و ميثاق اولنمنى تكليف ايلدى و بوكا نظام  
الملك ده ، عمر الحيام ده بالموافق آره لرنده عقد رابطه پيمانه قرار  
ويرلدى .

(نظام الملك) بر آز زمان صكره منصب وزارت نائل اولوب

ملوك سلجوقيه دن (الب ارسلان) ك مدير مهم ديوانى اولدينى

اثناده (حكيم عمر خيام) چيجه كلدى .



(نظام الملك) درس شریکی (عمر الحیام) حقنده اظهار معامله توقیریه ایله کندیسنی هروجه ایله تلطیف، وعهود سابقه یی درمیان ایدرك منصب وزارتدن حصه مند اشتراك اولق اوزره علم وفضیلتی سریر سلطنته عرض ایله مناصب دیوانیه یه ادخالی تکلیف ایلدی.

(حکیم خیام) کننیده خدمت وزارتیه لیاقت واققدار کورم دیکندن بشقه بویله برامل و آرزوده بیله اولمادیغنی سویلیدی.  
(نظام الملك) دخی کندیسنه مملکتی اولان نیشابورده بر اعلی چفتلك احسانیه سنوی ایکی بيك آلتون دخی تخصیص ایلدیکندن (عمر الحیام) ایام زندکانیسنی عیش و صفا ایله کچیردی.

(نظام الملك) ملکشاھ سلجوقینک مهمساز صدر وزارتی اولدیغنی و نیشابورده بولندیغنی ائنده (حسن بن صباح) دخی چیقہ کلوب (نظام الملك) بونی کوردیکی کبی وفای عهدیه مسارعت ایلدیه ده (حسن) کندیسنده اولان خبث سیرت وفساد عقیدتی جهتیه چوق کچمکسزین ولی نعمتی اولان نظام الملكی استرقاب ایله ملکشاھک نظر التفاتندن دوشوروب بلا مانع نائل اقبال واستقلال اولق سوداسنه دوشر و نصلسه دم فاسد کبی، عروق ملکشاھه حلول ایدر و منوی ضمیرنی هان اجراه فرصتیاب اولق راده سنده کلیر. آنجق آز وقت ایچنده تنظیمی درعهده ایتدیکی بر موازنه واردات و مصارف دولت، دفترنی

بجره مامسندن طولای ملکشاھک وثوق و توجهی منسلب اولغله قراری فراره تبدیل ایلر.

(حسن) ابتدا (ری) مملکتیه کیدوب اوراده اسماعیلیه طائفه سی طرفندن مأمور دعوت اولان (عبد الملك بن عطاشه) ملاقات ایله اسماعیلیه مذهبه کیردی. صکره اصفهانه واورادن عراق و آذربجان طرفلرینه عزیمت و بر مدت صکره مصره نقل بورای ثقات ایدرك اول وقت دیار مصریه ده مسند نشین حکومت اولان (مستنصر علوی) نك منظور نظر اعتباری اولمشدی.

(حسن) اوراده دخی تك طوره میوب ولایت عهد ماده سندن طولای مستنصر ایله اوغلاری بیننده بر تفرقه دوشورمکه چالشدیغندن (دمیاط) قلعه سنده حبسی قرارلشدیرلمشیکن نصلسه مظهر غفو اوله رق مغرب طرفه کتمک اوزره بولنان بر فرنك کمیسنه آیلوب کتدی.

ائهای راهده مخالف هوا کمی بی برکناره القا ایتدیکندن اورادن تکرار دیکر برسفینه یه راکباً سوریه سواحله کلوب حلب طریقیه عراقه، اورادن دخی آذربجان و اصفهانه عزیمت و اوغرا دیغنی محالرده خفياً خلقی (اسماعیلیه) مذهبه دعوت ایدرك آز زمانده پك چوق آدمک جلب قلوبنه موفق اولدی.  
حسن بن صباحک مرام اصلیمی اولان خروج علی السلطان اسباب و مقدماتی کرکی کبی حاضر لادقندن و بلاد رودبار و قهستانه صالیدیغنی فسدنك سعی و غیرت لر یله مذهبداشری چوغالوب



بونلرك امداديله اجرای مافی الضميره مقتدر اوله بيله جكنى  
آكلادقن صكره دعوت علنيه قیام ايله (آلوت) نواحيسندن  
برقصبه نزول ایلدی .

اوراده دخی عادت مخصوصه سی اولان ریا كارلق یولنده  
اظهار زهد و تقوی ايله جماعت كثره بی دائرة بیعت و مطاوعته  
ادخال ایلدی و (آشیانه عقاب) معناسنه اولان و (قزوين) آیالتك  
غرب طرفنده (سین) نهریله (سلطانیه) آره سنده اولوب (اله  
اموت) دن مخفف ایدوکی مروی بولنان (آلوت) ك عدد حروفی  
ابجد حسابيله (حسن بن صباح) ك قلعه آلوته تاریخ صعودینی  
مخبر اولدیغی اشاعه ایدرك بوصورتله دخی خلقی اضلال و اغفال  
ایلدیكندن (۴۸۳) سنه هجریه سی حسن بن صباحی هوادارلری  
استحصاب ايله قلعه آلوته نقل و اقامه ایدرلر .

(ملكشاه سلجوقی) جانبندن مذکور قلعه نك محافظی و اول  
حوالینك والیسی بولنان (مهدی علوی) اسماعیلیه مذهبنه مائل  
و حد ذاتنده ساده دل بر آدم اولمغله حسن بن صباحك رنك  
تقواده كوستردیكى ریایه آلدانوب نصلسه قلعه بی تسلیم ایدی  
و یردی .

حسن بن صباح، قلعه آلوتی اله كچیردكن صكره كوندن  
كونه تزیید قوت و اقتدار و پك آز مدتده ولایات رودبار  
وقهستانی كاملاً فتح و تسخیر ايله كسب اشتهار ایدرك تام اوتوز  
بش سنه اجرای حكومت ایلدی و كندیسندن صكره اتباع

مخصوصه دن یدی كشی صرهمسیله پوست نشین زندقه و الحاد  
واطراف و اكنافه آتش انداز فسق و فساد اوله رق جمله سنك  
مدت حكومتلری (۱۶۱) سنه امتداد ایلدی .

حسن بن صباحك ترجمه حالنه دائر یازدیغمز شو صحیفه لر  
(قرمزی بایراق) نام رساله دن ملخص و مقتبس اولوب دهات  
ادبای عصر دن سعادتلو احمد مدحت افندی حضرت تلرینك تألیفمز  
اثناسنده (ترجمان حقیقت) غزیه سیله نشر بیورمقده اولدقلری  
«مفصلك حاشیه لری» نام اثر معتبرلرندن ده بر وجه آتی اقتباس  
ایلرز :

«حسن بن صباحك مذهبی او لا شیعه مذهبنه یقین بر شی  
ایكن یواش یواش بالكلیه دوچار ضلال اوله رق (باطنیه) مذهبنی  
تشکیل ایتشدر كه اولور اولمز كفردن اشع بولنان بو مسلكه  
مذهب اطلاق بيله جائز اوله مز .

«ابتدای خروجی مصر دن عربستان و ایران جهتلرینه عودتی  
اولوب كویا علویلردن (مستنصر) نام ذاتك خلافتی ایچون خلقی  
تشویق ایتمكه مأمور ایدیسه ده بو مأموریت كندیسنجه بر وسیله  
سیر و سیاحت اولوب اصل خدمتی ایسه خلقی كندی طریق  
باطلنه تشویق و ادخال ایتك ایدی .

«آلوت، قلعه سی جوارنده بولنان و جهالتلری و وحشت  
درجه سینه واران اهالی مرقوم حسن بن صباحه ده قولا ی  
قاندیغندن بونلری كندیسنه جلب ایدرك شاهینلرك بيله كوچ



واصل اوله بيله جكي. (آلوت) قلعه سنی تصلسه اله كچوره بيلش  
و آندن صكره آرتق شقاوتی اعلاندن دخی چكنامش در .  
"او زمان (نظام الملك) سلاطين سلجوقيه طرفدن بغدادده  
وزارت ايلديكندن (قلعه آلوت) اوزرينه برعظيم اردو سوق  
ايتك تداركنه قيام ايلنجه، حسن بن صباح كنديسنه على العميا  
مطيع و منقاد اولان آدملردن برفداي كوندركه بچاره نظام  
الملكي قتل ايتديرمش در .

"حسن بن صباح كندی آدملرینی او قدر قانديرمش ایدی که  
آنك امريله برايش كورمه كيدن فدایي شايد اوله جك اولور  
ايسه طوغری جته كيدوب حوريلره ذوق و صفاده بولنه جغی  
و شیخ ایستر ايسه كنديسنی ديرلتمكه مقتدر بولنديغی جداً اعتقاد  
ايدر و بناءً عليه اولومدن فلاندين قورقيه رق اجراسنه مأمور  
اولديغی ایشی مطلقا ایفا ایلر ایدی .

"كنديسنه شیخ عنواتی و یرن مرقوم حسن حقیقه جربزه  
عليه صاحبي بر آدم اولوب حاشا "قرآنك معنای ظاهریسی مراد  
دكلدر؛ معنای باطنیسی مراددر . " ديه درلو تاویلات سفسطه  
كارانه ايله فرائض شرعیه بی قانديرمش ونه قدر محرمات وار ايسه  
هپسك اباحتیه فتوا و یرمش؛ حتی جنت و جهنمهده كنديسی  
مالکیت ادعاسنده بولنوب شمدیلک دنیایه مخصوص بر جنت اولمق  
اوزره وجوده كتوردیکی غایت كوزل بر باغچه دروننه اك كوزل  
قزلری طولديرمش واسرار اشرايیه صیزديرديغی آدملری بو

باغچه یه صوقوب حریف اویانه رق حوریلره بش اون کون عیش  
و عشرتدن صكره ینه مست لایعقل ایکن طیشاری چیقارلديغی  
زمان شیخدن "صداقت و اطاعت یولنده جان فدا ايدر ايسهك،  
بعد الوفات ینه او جته كيررسك." سوزینی ایشیدنجه کمال صدق  
ایله اینانمقده بولمخ ایدی .

.....  
.....

"ابتدای تأسیسلرنده اشبو باطنیلر ایران ایچنده واقع جبال  
متسلسله تپه لرنده برطاقم متین و منیع قلعه لر پیداسیله محصن ایتشار  
ایسهده مؤخرأ تسلط و محکمیری بر درجه لره وارمش ایدی که  
برطاقم امرا و وزرا و حتی ملوک و سلاطين بيله بوخیشلرك شرندن  
اوركهرك تملق و مدارایه مجبوریت كورمشلر ایدی . زیرا آنلر  
طرفدن اولومه محكوم اولوبده خنجر غدرلرندن قورتلق  
حقیقه ممکن دكل ایدی .

"بعض کره بولر اوزرینه کلیتی عسکر چکلدیکی واقع ایسهده  
عساكر مرقومه ایچنده بولنان باطنیلر اردونك سرعسکرینی و حتی  
اردو صاحبی بولنان حکمداری بيله تهدید ایدرك اردونك حرکتی  
منعه مقتدر اولمشلردر .

"بر کیاروق سلجوقی) نك بر چوق سردارلری بو یولده قتل  
ایدلمشدر . (ملکشاه سلجوقی) بولرله مجاهدهده بالاصرار (قلعه  
شاهدر) ی فتح ایله اوراده حسن بن صباحك خواجه زاده سی



(احمد) ی طوته رق دیری ایکن درینسی یوزدیکی حالده ملعونك  
سنی بیله چیقارمیش اولسی بونلرك درجه تعذنی موازنه یه  
مدار اولور .

«سلجوقیلر، بونلره پك چوق اوغراشهرق (سلطان محمد)  
و (سلطان سنجر) هان او جاقلرینی سوندیرمك درجه لرینه کلمشیکن،  
باطنیلر از جمله (سنجر) ك یتاغی یانه برخنجر صاپلایه رق «ایشته بو  
خنجری یتاغك باشنه صاپلایان کوکسکزه دخی صاپلیه بیلور .  
بزدن ال چکمز ایسه کز بر کون اوده اولور . سزك سینه کز  
او خنجرك صاپلانیدی یردن دها قاتی دکلدر . « دیه تهدید  
ایتدکارندن هیچ بریسی باطنیلر علینه موفق اوله مامشدر .

«(۵۱۸) سنه هجریه سنده (حسن بن صباح) کبر دکده (کیا بزرک  
امین) اشبو باطنیه فرقه سنه رئیس اولمش ایدی . ایلک ملعتی  
باطنیلر اوزرینه اردو سوق ایدن وزیر سلاجقه (ابو نصر) ی  
بز قاج فدایی ارسالیله خنجر لٹك اولمشدر . (سلطان سلجوق)  
کندی وزیرینك انتقامی ایچون باطنیلر اوزرینه عظیم عسکر  
چکهرک اون بیک قدرینك قفاسنی کسدرمش وشامده دخی آلتی  
بیک قدری کبرمش ایسه ده یه کوکلری کسلماشدر .

«کیا بزرک امین) دن صکره (۵۳۲) سنه هجریه سنده اوغلی  
(کیا محمد) و آندن صکره (۵۵۷) سنه سنده اوغلی (خواجه  
حسن) رئیس اولدیلر . بونلرك ملعتی اسلافنه دخی فائق اولوب  
خلقی قهرراً و جبراً کندیلرینه تابع ایدرلر ایدی .

«اشبو خواجه حسن (بنی دابویه) طائفه سندن ینه حسن،  
نامنده بر قاتلك یدیه کبر دکده یرینه کلان اوغلی (خواند محمد)  
قاتل مرقومی اولاد و عیالیه کاملاً اعدام ایشدر .

«(۵۶۲) سنه سنده مرقومك دخی اسفل سافلین جهنمه کتسی  
اوزرینه اوغلی (خواند جلال الدین) داعی کیر و شیخ الجیل  
اولوب فقط بو آدم حسب الانصاف منسوب اولدینی طریقك  
بطلانی آکلایه رق اگر تحت اداره سنده بولنان مملکتاره کندیس  
والی نصب اولنور ایسه مذهب اهل سنتی قبول ایلجه کتی  
(ناصر) خلیفه یه عرض ایش ایدی . خلیفه بوکا مساعده ایلدکده  
مرقوم دخی تعهدنی ایفا ایتمکله (حسن بن صباح) ك تألیف  
کرده سی اولان کتابلر یاقیله رق شقاوت او جانی سوندیرمش ایسه ده  
خواند جلال الدیندن صکره اوغلی (خواند علاء الدین) داعی  
کیر اولدقده اجدادندن اشنع برکافر دین چیقوب باطنیه مذهبنی  
اولکیدن اشنع بر درجه ده مجید ایشدر .

«اوتوز بش سنه اجرای ملعتدن صکره بر ید انتقام ایله  
قتل اولندقده یرینه کچن اوغلی (رکن الدوله) دخی (هلاکو)  
معیتنده بولنان تاتارلر شرینه اوغرایه رق قلاع و بقاعلری تاتارلر  
النده تارومار اولمشدر .

«واقعا شامده و حلبده و یمنده اشبو اسماعیلیه جمعیت کریهه سنك  
بر طاقم فروعی ظهور ایش ایسه ده آنلر (آلوتیه) اشقیاسی قدر  
حکم و اهمیت پیدا ایده مامشاردر .»



مدحت افندی حضرتلرینک تفصیلاتی ده بوراده ختام بولدی.

§

زیدیه

شیعیلرک اصول ثلاثه سندن ایکنجیسی (زیدیه) در.

بونلر «زید بن علی زین العابدین بن حسین بن علی» حضرتلرینه منسوب و تابع اولوب مذهب زیدی قبول ایتلریله (زیدیه) نامنی آدیله.

زید حضرتلری امام زین العابدینک فرزند ارجمندی و محمد باقر حضرتلرینک برادر مکرملری در. لکن (زید) کندی مذهبنده امام حقه خروجی شرط اولغله دائماً قرداشی محمد باقر حضرتلرینی «سن بوکون امامته جمله دن احق والیق اولدیغک حالده نیچون حقه دعوی ایتیمورسین؟» دیه خروجیه تشویق ایدرمش!

محمد باقر دخی «پدرمز زید العابدین حضرتلری حال حیاتنده امامته جمله دن احق واولی ایکن قطعاً دعوای امامت ایله خروج و ظهوره تصدی ایتدی.» دیهرک شرط خروجی ردایله زیدی الزام بیوررمش.

ایشته زیدیلر بوذات بزرگواره ادعای نسبت ایدرلر. لکن اصح اقواله کوره حضرت زید کندیسنه نسبت ایدیلن اعتقاد

اهل ضلالدن بریدر. کندیسی برامام جلیل وعالم نبیل ایدی. حق عالیلرنده هر نه دینلش ایسه آکا ادعای نسبت ایدنلرک مفتریاتندن عبارتدر.

بوطائفه دخی مذهبیلرنده اوج فرقهیه منقسم اولملشاردر.

جارودیه

برنجیسی — «ابو جارود» نام شخصه منسوب اولان (جارودیه) فرقه سیدر.

امام محمد باقر حضرتلری ابو جارودی (سرحوب) یاخود (سرخاب) تسمیه ایتمش و بو لفظی «دکرده ساکن اولور شیطان» ایله تفسیر بیورمش ایدی.

بونلر امامت علی حقه طرف اشرف نبویدن تسمیه دکل وصفاً نص وارد اولمش؛ یعنی نصوص وادله واردهده حضرت علی باسعه و شخصه مذکور اولیوب بلکه حلیه جمال و فضل وکاللرینه دال اولان اوصاف جلیه و اخلاق مرضیهلری مصرح بولتمش ایسهده عهد نبوتدن صکره صفت ایله موصوف بیتنده مطابقته رعایتی ترک و اهمال ایتدیلر دیو صحابه تقصیر ایتدیلر بلکه «حاشا» کافر اولدیلر دیرلر.

بونلرک مذهبجه منصب جلیل خلافت، (امام حسن و امام



حسین) رضی الله تعالی عنهما دن صکره ایکسینک اولاد کرامنه منتقل اولوب لیکن تعین و تقدیمی سادات اهل بیتدن اهل حل و عقدک رأی و اختیارلرینه منوط و اولاد مشارالیهمدن امامت و خلافتیه اهلیت بر قاج شرط ایله مشروطدر.

اولاً - علم و فضیلت،

ثانیاً - زهد و طاعت،

ثالثاً - جود و سماحت،

رابعاً - شجاعت و جلالت،

خامساً - دعوائی امامت ایله خروج و ظهور و خلقی اجابت و اطاعتیه دعوتدر .

یالکر امام منتظر، حقنده اختلاف ایشلاردر . کیمی (محمد بن عبد الله بن الحسین بن علی) در . کیمی (محمد بن قاسم بن علی بن حسین) در . کیمی ده (زید بن علی) احفادن (یحیی بن عمیر) در دیدیلر و (محمد بن عبد الله) ایله (یحیی) مقتولاً و (محمد بن قاسم) مسجوناً وفات ایشلر ایکن قتل و وفاتلرینی انکار ایتدیلر . محمد بن عبد الله (نفس زکیه) لقیله ملقب اولوب (مهدی زمان) عنوانیله ارض حجازده خروج ایله تمهید مبائی خلافتیه شروع ایتدکده خلفای بنی عباسدن ابو جعفر منصورک سرعسکری یدنده وفات ایتدی .

(محمد بن قاسم) زید بن زین العابدینک قرداشی عمرک احفادن اولوب (طالقان) نام محله متصدی امر خروج ایکن

(معتصم بالله) خلیفه زماننده اخذ اولوب تنکنای حبسده مسجوناً وفات ایلدی .

(یحیی) زیدییه ، طائفه سنک سر مذهبلی اولان امام زین العابدینک محل یحیی زید حضرتلرینک اوغلی اولوب (مستعین بالله) خلیفه زماننده بلاد خراسانده دعوائی امامت صددهنده ایکن نوش کلجام شهادت ایله قضای محب ایلدی .

#### سلیمانیه

فرق زیدییه نک ایکنجیسی - (سلیمان بن جریر) نامنده بریسنه منسوب اولان (سلیمانیه) فرقه سیدر .

بونلر «امامت، ارثاً کیمسه یه منتقل اولوب اهل حل و عقدک ترجیح و اختیارینه مفوضدر و خیار مسلمیندن یالکر ایکی ذاتک ترجیحیله ده امامت، منعقد اولور و امامته احق والیق اولان ذاتک وجودیله مفضول و مرجوحک امامت و خلافتی جائزدر و حضرت علی وار ایکن شیخین مکرمینه (ابو بکر و عمره) بیعتده امت خطا ایشدر . لکن شیخین مکرمینک امامت و خلافتلری اختیار امتله منعقد اولدییچون صحیحدر و امتک بوبابده کی خطاسی ده فسق درجه سنه منتهی دکدر .» دیدیلر .

طائفه مرقومه، امامت و خلافت مسئله سنده فی الجمله معتدل بر یول طوتمشدر ایسه ده کبار اصحابدن حضرت عثمان و طلحه



وزیری، وام المؤمنین حضرت عایشه بی «رضوان الله علیهم اجمعین»  
اکفار ابتدکارندن زمره فسقه مبتدعهیه ملحق اولدیلر.

بتیریه

فرق زیدیه نك اوچنجیسی - «بتیر الثوس» نام شخصه منسوب  
اولان (بتیریه) فرقه سیدر.

بونلره حسن بن صالحه نسبتله (صالحیه) ده دینیر.  
بو فرقه ضاله دخی مذهبه (سلیمانیه) فرقه سنه موافقت،  
ویالکر حضرت عثمانی اکفاره توقف ایلدیلر.  
علامه بیدانی سید شریف جرجانی دیر که :

- «ایشته فرق زیدیه بونلردر. زمانزده کندیلرینی (زیدی)  
عد ایدنلرک اکثری مقلد درلر. اصولده رای اعتزاله، فروعهده  
مذهب ابی حنیفهیه مائلدرلر. یالکر بعض مسائلده امام شافعییه  
موافقت ایتشلردر.»

امامیه

شیعیلرک اصول ثلاثه سندن اوچنجیسی امامیه فرقه سیدر.  
بونلر صکرملری برقاق قسمه منقسم اولوب جمله سنکده مجت  
امامتده خلاصه اعتقادی بودرکه :

«طرف اشرف رسالتپناهیدن امامت علی حقنده نص جلی  
صادر اولدی - یعنی حضرت علی وصیت نبویه ایله خلیفه

منصوص اولوب آندن صکره امام حسن، بوندن صکرده امام  
حسین حسب الوصیه خلیفه رسول الله در و امام حسیندن صکره  
نوبت خلافت، فرزند ارجمندلری علی زین العابدینه، آندن ولد  
مکرملری محمد باقره نقل ایدوب آنلردن مخدوم محترمملری امام  
جعفر صادق حضر تدرینه منتقل اولدی.» دیدیلر.

جعفر صادق صکره شیعه امامیه، منصوص علیه اولان  
خلیفه خصوصنده اختلاف ایتدیلر. شویله که :

«جعفر صادق صکره امامت و خلافت اوغلی موسی  
الکاظم، آندن علی بن موسی الرضا، بعده محمد بن علی التقی،  
آندن علی بن محمد التقی، آندن حسن بن علی الزکی، آندن ده  
محمد بن الحسن حضر تدرینه منتقل اولدی و امام منتظر، آخر ائمه  
اولان محمد بن الحسن در.» دیدیلر.

شیعه امامیه نك متأخری (معتزله) و (اخباریه) ناملریله ایکی  
شعبهیه منشعب، (اخباریه) شعبه سی دخی (مشبهه) و (سلفیه) ناملریله  
ایکی فرقهیه منقسم اولدیلر.

مشبهه، طائفه سی آیات متشابهاتی تأویل ایتیوب «مراد معنای  
ظاهر لریدر.» دیدیلر.

سلفیه، طائفه سی «آیات متشابهات ایله مراد الهی نه ایسه  
بلا تشبیه حقدردر. نته کیم سلف صالح دخی بو اعتقادده ایدیلر.»  
دیدیلر.

دها برفرقه وارکه بو فرق ضالهیه ملحق اولمش در.



صاحب مواقف ایله شارحی سید شریف بوجہ ایله تصریح  
 «ایدوب مقدمه این خلدونده بوجہ آتی مذکوردرکه :  
 » جعفر صادق صکره شیعه امامیه، ایکی فرقه اولوب  
 ایچلرندن اسماعیلیه فرقه سی عندندہ حق خلافت (امام) عنوانیله  
 معروف اولان اسماعیلیه نقل ایتدی. « دیدیلر وشیعه امامیه دن  
 {اثنا عشریه} فرقه سی جعفر صادق صکره اوغلی موسی الکاظم  
 حضرت تیرینک خلافتنه ذاهب اولوب سلسله امامت اون ایکنجی  
 امامه واصل اولدقده آندہ توقف ایدوب آخر زمانه ک غیبت  
 واختفاسنه ذاهب اولملریله بونلر (اثنا عشریه) عنوانیله معروف  
 اولدیلر .

§

امامیه نك نص جلی حقنده کی استدلالی

- ۱ — «من كنت مولاه فعليّ مولاه»
- ۲ — «من كنت وليه فعليّ وليه»
- ۳ — «اقضاكم عليّ»

دیدیلر که :

« ایشته شو اوج حدیث نبوی، امامت و خلافت علی حقنده  
 نص جلیدر. حتی اولکی ایکی حدیث شریفی ایشته کدن صکره  
 حضرت عمر، حضرت علی یه خطاباً «طوبی لك یا علی اصبحت

مولی کل مؤمن و مؤمنه» دیدی. دیمک که حضرت عمر دخی  
 بو حدیثلرده کی تولیه دن بزم آکلادیغمز معنایی استخراج ایلدی.  
 « اوچنچی حدیث دخی (نص جلی) در. زیرا امامتک  
 معنایی امامک اقصی القضاة و هر واقعه ده متخاصمینہ حاکم  
 اوله یلیسیدر. (اطیعوا الله واطیعوا الرسول و اولی الامر منکم)  
 قول کریمی دخی بومعنایی مشعر در. »





## خوارج

کبار فرق اسلامیه نك او چنجیسی «خوارج» در .

ائمه دین و خلفای سید المرسلین اوزرینه خروج ایله رفع  
لوای بنی و طغیان ایدنلره خارجی دینیر .  
بوراده خوارجدن مراد، اهل حل و عقدك اتفافیله امام  
المسلمین اولان حضرت علی کرم الله وجهه اوزرینه خروج ایدنلر  
درکه یدی فرقهیه منقسمدر .

## محکمه

اولکیسی - (محکمه) نامنی آلانلردرکه اهل صلاة و صیامدن  
اون ایکی بیک کشیدن عبارت اولوب تحکیم، اثناسنده حضرت  
علی اوزرینه خروج ایله فصل مدعی خلافت ایچون (حکم)  
نصب و تعییننه موافقت بیوردقلرندن طولای حضرت مشارالیه  
اکفار ایلدیلر . مقصد لایقیه آکلاشیله بئلك ایچون تفصیله و بناء  
علیه (تاریخ اسلام) ه مراجعته مجبور اولدق .

تاریخ مذکورده بوجه آتی محرردر :

صفین وقعه سنده (معاویه) اردوسنك قدمی هر جانبده

متزلزل اولمغله رؤسای عساكر معاویه دن مشهور (عمرو بن العاص)  
بو حالی کورنجه معاویهیه «عسکر مصاحف شریفه بی قارغیلرك  
اوجنه باغلا یوب رفع ایللرینی، و محاربه بی تعطیل ایدوب «کتاب  
الله ینغزی بولسون!» دیو باغرملرینی امر ایله ! قبول اولنورسه  
بو ورطه دن قورتولورز؛ ینلرنده اختلاف وقوع بولورسه  
تفرقهیه سبب اولوز .» دیدی .

معاویه، عسکره بویله جه امر ایتدی . عسکرده او یله یاپدی .  
علی کرم الله وجهه طرفنده اولان اکثر رجال محاربه دن دستکش  
فراغ اولوب «کتاب الله اطاعت ایدرز .» دیدیلر .

حضرت علی، ناسه خطاب ایدوب «معاویه و عمرو بن العاص  
وحیب وابن ابی سرح و ضحاک کتاب الله اطاعت ایدنلردن  
دکلدر . بن آنلری طفولیتلرندن رجولیتلرینه دک بیلیرم . طفل ایکن  
اشر اطفال، رجولیتلرنده اشر رجال ایدیلر . مغلوب اولدقلری  
ایچون بویله برخدعهیه تشبث ایتدیلر . سزی آلداتق ایستلر .  
حربی اکمال ایدلم . نصرت، تعین ایلدی . بزم آنلره محاربه من  
اوامر الهیهیه اطاعت ایتلر ایچون دکلیدی؟» دیدی .

(مسعر بن فدك تمیمی) و (زید بن حصین طائی) و آنلره  
موافقت ایدن قرادن بر طاقم رجال «بزی حکم کتابه دعوت  
ایدنلره ! اجابت ایتما مک اوله ماز . سن ده کتابه اطاعت ایت !  
ایتمدیکک خالده سنی آنلره تسلیم ایدرز ! یاخود عثمانه ایتدیکمزی  
سکاده ایدرز !» دیدیلر .



حضرت علی «بکا اطاعت ایدرسه کر، محاربه ایدکر ! ایتدیککر حلاله نه ایسترسه کر آنی ایشلیکر !» دیدی . ۱۶۰  
 «اشتره خبر کوندر ! محاربه بی ترک ایلسون .» دیدیلر .  
 حضرت علی (یزید بن هانی) بی اشتره کوندروب ترک محاربه ایلسنی امر ایلدی . اشتر، «حصول مقصد رونما اولمش ایکن محاربه بی ترک ایدم .» دیو جواب ویروب یزیدی اعاده ایلدی .  
 بونلر بوخبردن دهها زیاده منفعل اولوب تهدیدی تشدید ایتدیلرله ومعسکر علی ده آثار اختلاف وفساد کورنمکله اشتره کیدن ایکنجی خبر اوزرینه خلیفه قتل اولنور خوفیه ترک خصام ایدرک علی نک نزدینه کلدی وایشه دوام اولنغی مصرانه مراد ایلدیسه ده کارکر اولیوب آرالرنده منازعه و مشاطه وقوعیه کورلتی بیودی .  
 حضرت علی بو حالی کورنجه باغروب خلقی صوصدردی . بعده (اشعث) «ایشته ناس، دعوته اجابت ایتدیلر . ایسترسه ک، معاویه کیدوب اخبار ایدم .» دیدی . حضرت علی راضی اولوب (اشعث) معاویه کتدی . ملاقی اولدقده «مصحفلی نه یه رفع ایتدیکر؟» دیدی . «سزی کتاب الله دعوت ایچوندر؛ طرفیندن ایکی کشی نصب ایدم؛ کتاب الله حکمیه آرامزی بولسونلر .» دیدی . (اشعث) رای معاویه بی تصویب و عودت ایدوب تبلیغ ایلدی . جمله سی اظهار رضا ایدنجه معاویه (عمرو بن العاص) ی انتخاب ایلدی . علی طرفنده اولان قراء دخی (ابو موسی) بی ایستدیلر . علی (ابو موسی) نک بوخصوصه کفایتی

اولمدیغنی بیان ایله بشقه سنک انتخابی مراد و الحاح ایلدیسه ده رؤسا «ابو موسی بی طرف آدمدر . آندن غیری اولماز .» دیدیلر .  
 علی (ابو موسی) نک سوابق احوال و مخالفتی بیان ایله امنیت ایدمه جگنی هر نه قدر مکرراً بیان و ایراد ایلدیسه ده صکره دن (خوارج) ه ملتی اولان قراء ورؤسا ابرامیه (ابو موسی) علی طرفندن خواه و ناخواه (حکم) نصب اولنوب طرفین نصب حکمی توثیق ایلدی و عمرو ایله ابو موسی، صدور ایدم جک حکمدن طولانی نه کندیلری ونه متعلقات و اولادلری مسئول اولما ملرینه طرفین رجالندن سوز آلوب حکم ایچون رمضانده ک مخیر و مراد ایدرلرسه رمضاندن صکره یه قدر تأخیرینه دخی مرخص اولدیلر و محل حکم (کوفه) ایله (عراق) بیننده متوسط اولنغه قرار ویریلوب طرفین رجالندن وثیقه شهادر یازلدیلر . فقط (اشتر) امتناع ایتمکله (اشعث) ابرام ایلدی . (اشتر) اشعثی تهدید و تحویف ایلیوب عزیمتده ثابت قالدی .  
 وثیقه، هجرت سنیه نک اوتوز یدنجی سنه سی صفرینک اون اوچنجی کوننده یازلمشدی .  
 آندن صکره حکمین (یعنی عمرو) ایله (ابو موسی) محل حکم، (اذرح) ده (دومة الجندل) نام موقع اولسنه اتفاق ایدوب حربه نهایت ویرلدی .  
 بوندن صکره بعض رجال حضرت علی رضی الله عنهمک



نزدینه کیدوب حربك اعاده سنی ایستدیلر .

«رضا وقراردن صکره رجوع و تبدیل ای اولماز .» دیوب عهدنده ثابت اولدی .

بونك اوزرینه (حرورا) قریه سی رجالی تحکیمی تصدیق ایلیوب محارینه عودت، وایکی طرف رجالی رمضاندهك مفارقت ایلدی .

ایشته بالاده بیان اولندیغی اوزره (محکمه) فرقه سنی تشکیل ایدن (خوارج) مذکور (حرورا) قریه سی رجالی دینیلن کسان درکه اون ایکی بیک کشی اولدقلری حالده حضرت علی دن آریلوب قریه مذکوره یه ایندیلر .

(شیث بن عمر) ی حربیه و (عبید الله بن الکوا) بی صلاته امیر نصب ایدوب «بیعت، الله تعالیه در و طریق حق امر بالمعروف، ونهی عن المنکر، واداره مملکت شوری.» در دیدیلر و خلافت وامامتی انکار و دم مسلمینی اباحه ایدن (عمرو بن العاص) ك (حکم) نصبنی کنه عظیم عد ایلدیلر .

بو حالده اسلام، اوچ فرقه یه متفرق اولغله حضرت علی بو خصوصی اعظام ایدوب (عبد الله بن عباس) ی (حرورا) یه کوندردی و «اهل خروجك ضالته اولدقلرینی بیان ایله! آنحق بن کلنجیه دک بو خصوصده مباحثه ایتمه!» دیدی .

ابن عباس (حرورا) قریه سنه کیدوب خوارجه ملاقی اولدقده صبر ایتیوب بحث و مناظره یه کیرشدی .

عبد الله، خوارجه «سز نیچون حکم، نصبنی تجویز ایتیوب بزدن آیرلدیکز؟ الله تعالی حضرتلری قرآن شریفده زوجین بیننده حکم نصبنی امر ایتمدی؟ اختلاف امتده دخی اولویتله جائز دکلیدر؟» دیوب آیت کریمه یی اوقودی .

آنلرده «واقعاً الله تعالی (حکم) نصبنی زوجین بیننده اختلافده و حرث و صید اختلافلرنده امر ایلدی . لکن دماء مسلمین کی، امر عظیمده ایکی کشینك حکمی کافی اولمادیغندن ماعدا (عمرو بن العاص) کی بر آدمك (حکم) نصبی هیچ جائز دکلدر . زیرا (حکم) عدل اولمی؛ (عمرو) عدل ایسه بز آنکله نیچون محاربه ایتدك؟ صفینده ایتدیگمز محاربه بو آدملری کتاب اللهك حکمنه اطاعت ایتدیرمك ایچون دکلیدر؟ برده بینکرده مواده سندی یازدیکز . اسلام بیننده مواده اولحق حکم کتابه مخالف دکلیدر؟» دیرکن حضرت علی کرم الله وجهه کلوب مجلسلرینه کیردی . (حکم) بحثی درمیان اولنش اولدیغندن (عبد الله) امره مخالفت ایتدیکنه حضرت علینك جانی صیقلدی .

بعده حضاره خطاب ایدوب «يك ای بیلیرسکزرکه حکم نصبی بنم رأیمله اولمادی. جهوورك میلله اولدی و کتاب الله قولنجه حکم ایملری شرط اولندی؛ دیمك اولدی که بن رجالی (حکم) نصب ایتمدم؛ کتاب حکمنی قبول ایلدم؛ زیرا کتاب نطق ایتمز؛ رجال آنکله نطق ایدر . مخالف امر آلهی اولان حکملرینه اتباعه مجبور دکلز . مواده ایسه دم مسلمینی صیانت ایچون قبول



اولندی. شاید تعیین اولنان مدت آراسنده مخالفت، مسالته مبدل اولور. ایشته حقیقت حال بودر. هایدی کوفیه کیدهلم! « دیدی.

جمله سی نطق علی به مفتون اولوب برابر کوفیه عودت و سبق ایدن مخالفتدن اظهار ندامت ایلوب انقضای مدته منتظر اولدیلم.

تاریخ اسلامدن منقول اولان کلام بوراده بتدی. مدت معینه نك انقضاسندن صکره ده خارجیلرک اولولری نزد جناب علی به کلوب، معاویه طاغیله معاملات حربیه نك اعاده سنی مصرانه طلب ایتیشلر ایسه ده حضرت امام «اول کرک ایدی. بن سزه شاملیلرک خدعه و دسیسه لرینی بیان ایله حربه دوام اولمسنی اخطار ایتیش ایکن سز آنلرک تکلیفلرینی قبوله اصرار ایتدیکز. شمعی آرتق ویریلن سوزدن دونه میز.» دیدیلر. بو بابده حضرت امام ایله خارجیلر بیتنده جریان ایدن محاورات و مکاتباتی و اخیراً آنلرله ایدیلن محارباتی تفصیلاً نقل و حکایه ایتمه مز لازم کلسه بیوجک برکتاب اولور. بو ایسه بزم صدد بمختردن خارجدر. یالکر لسان شرعده (خوارج) تعبیر ایدیلن طائفه نك سبب ظهور و خروجیله خلاصه عقائد باطله لرینی بیان ایله اکتفا ایلرز.

ایشته بو یادکارلر حضرت علی بی ده، حضرت عثمانی ده، دها بر چوق اصحاب کرامی ده اکفار ایله برابر «امامت و خلافت قبیله قریشه ده، غیر یسنده مخصوص دکلدز؛ بین الناس اقامه مراسم

عدل و داد و احقاق حقوق عباد ایده بیان ذات هر هانکی قبیله دن اولورسه اولسون، امام و خلیفه اوله بیلیر؛ شاید تغییر سیرت و میل جور و اهانت ایلر ایسه عزل و قتلی واجب اولور. «دیدیلر. و» نصب امام اهم مهم اولیوب امام هیچ اولمسه ده جائزدر. «دیه زعم ایلدیلم.

### بیهسیه

ایکنجیسی - (بیهس بن الهیصم بن جابر) نام شخصه منسوب اولان (بیهسیه) فرقه سیدر.

بونلر «ایمان، لسان ایله اقراردن و خدایی و رسولک کتیردیکی احکام مولایی بیلکدن عبارتدر. بناء علیه برشیده عجا حلال می حرام می دیه شبهه دوشن کیمسه کافر در. زیرا هر مسلم اوزرینه حق بیلک و اوکر نك ایچون تفحص واجبدر. «دیدیلر. کیمی ده «حد شرعی بی مستلزم اولیان شیده شک واقع اولور سه بو، کفری موجب دکلدز. «کیمی «حرام آنجق (قل لا جد فیما اوحی الی محرماً...) قول کریمنده مذکور اولاندر. «کیمی «امام المسلمین (خدا نکرده) کافر اولورسه حاضر و غائب اولان رعیتی ده کافر اولور و اطفال، کفر ایله ایمانده بابالری کبی در. «کیمی «شراب حلالدن! سرخوش اولان کیمسه قول و فعلیله مؤاخذه اولتماز. لکن شراب حرامدن سرخوش اولان آدم قولیله ده، فعلیله ده مؤاخذه اولنور. «کیمی «کیره ایله سکر، کفر در. «دیدیلر



و افعال عبادى كنديلرينه اسنادده (قدریه) به موافقت ايتديلر .  
بونلرك رئيسى اولان (بيهس)ى عراق واليسى مشهور (حجاج)  
كتوردوب اللرينى و آياقلىرىنى قطع ايله اعدام ايلدى .

### ازارقه

اوچنجيسى - (نافع بن الازرق) نام شخصه منسوب اولان  
(ازارقه) فرقه سيدر .

بونلر دخى «حضرت على تحكيم، سبيله - يعنى فصل مدعاى  
خلافت ايچون طرفيندن (حكم) نصبنى تجويز ايتمسيه (حاشا)  
كافر اولدى و (ومن الناس من يعجبك قوله فى الحياة الدنيا  
ويشهد الله على ما فى قلبه و هو الد الخصام) آيت كريمه سى كويا  
آنك حقنده نازل اولدى وابن ملجم، حضرت على بنى اولدورمكه  
(حاشا) محق ومصيب ايدى و (ومن الناس من يشرى نفسه  
ابتغاء مرضاة الله) قول كريمى آنك شاننده نازل اولدى .  
ديديلر .

خوارجك مفتيلرى، زاهدلىرى (عمران بن حطان) ابن  
ملجمك فعل كريمى تصويباً شو ايكي بيتى انشاد ايلدى . لعنهم الله .

### شعر

يا ضربة من تقى ما اراد بها، الاليلغ من ذى العرش رضواناً  
انى لا ذكره يوماً فاحسبه، اوفى البرية عند الله ميزاناً

سزاوارلغن ونقرين اولان خذله مرقومه حضرت عثمانك،  
طلحه نك، زبيرك، ام المؤمنين عايشة صديقه نك، عبدالله بن عباسك  
و آنلرله برابر سائر مسلمينك كفرلرينه و مخلص فى النار اولدقلىرينه  
قائل اولوب بو صورتله ده تزويد كفر و ضلال ايلديلر .

برده «ولو كه مذهب ازارقه دن اولسون، ترك قتال ايله  
اختيار قعود ايدنلر كافر در و قولده ده، عملده ده تقيه حرامدر  
و مذهب ازارقه به مخالف اولانلرك اولادىنى، خاتونلرىنى اولدورمك  
جائر در و زانى محصن، رجم اولنماز؛ چونكه قرآنده مذكور  
دكلدر و نسايى قذف ايدن يعنى اهل عرض خاتونلره اسناد همت  
زنا ايله بهتان ايلين - اكر اودخى قادين ايسه - حقنده حد  
قذف اجرا اولنماز. زيرا مستحق حد قذف اولانلر قرآنده  
ذكوره مخصوص اولان (الذين) صيغه سيلاه ذكر اولنمشلاردر  
و اطفال مشركين بابالريله برابر جهنمده درلر و مرتكب كبره  
كافر در .» ديديلر . «خذلهم الله»

### نجدات

دردنجيسى (نجدة بن عامر النجفى) نام شخصه منسوب  
اولان (نجدات) فرقه سيدر .  
(عاذريه) نامنى آلانلر دخى بونلردندر .  
زيرا فروع مسائلده جاهل اولانلرى معذور طوتمشلاردر .



سبی شودرکه :

رئیس مذهبیری (نجده) اوغلنی بر مقدار عسکرله اهل  
(قطیف) اوزرینه کوندرمشدی. عسکر اهل قطیفی اوروب  
الترینه کچن قادینلری قبل القسمة نکاح ایلدیلر و آلدقلى اموال  
غنیتی ده کذلک قبل القسمة یدیلر.

وقتاکه (نجده) نك نژدینه عودتله ایشلدکلى ایشلردن آتی  
خبردار ایتدیلر، (نجده) آنره «بو ایشلدیککز ایشلر سزه  
جائز دکلدی.» دیدی. «بز عدم جوازینی بیلزدک.» یولنده  
عرض معذرت ایتدیلر. اوده جهلاری سببیه آنلری معذور  
طوتدی. ایشه بو سیدن ناشی آنره (عاذریه) دینلدی.

بووقعه دن صکره (نجده) نك اصحاب و اتباعی اختلاف ایدوب  
برطاقی (نجده) یه تبعیتله دیدیلرکه: «دین، ایکی امردن عبارتدر.  
«اولکیسی - اللهی بر، پیغمبری حق طانیق، (نجدات)  
مذهبنده اولانلرک دملرینی حرام بیلک، پیغمبرک کتیردیکی شیلری  
جملة اقرار ایلکدرکه، بونده جهل عذر اوله ماز، و جاهل معذور  
طوتماز.»

ایکنجیسی - مسائل اصلیه مذکوره نك غیریدر، بو مسائل  
فرعیه ده جهل، عذردر، جاهل معذوردر.

(نجدات) فرقه سنک کرک بو (عاذریه) طاقی و کرک دیگر  
مذهبداشلری یکربان وفاق اوله رق «خلقک امامه احتیاجی  
یوقدر. خلقه واجب اولان آرالرنده عدل و نصفته رعایت ایتمکدر.

شاید امامسنز اجرای لوازم عدالت، ممکن اوله میه جغنی تیقن  
ایدرلرسه، اول وقت نصب امام جائز اولور. «دیدیلر  
و (ازارقه) یه یالکز تکفیرده موافقت و احکام باقیه ده مخالفت  
ایلدیلر.

اصفریه

بشجیسی - «زیادبن الاصفر» نام شخصه منسوب اولوب  
(اصفریه) نامنی آلانلردر.

بونلر بر وجه آتی (ازارقه) یه مخالفت ایتملردر.

۱ - حرب اعدایه حقیقیوب ده اختیار قعود ایدنلری  
اگر کندى مذهبداشلری ایسه اکفار ایتزلر.

۲ - رجی اسقاط ایتزلر.

۳ - اطفال کفارک کفرینه و ناردنه تخلیه دینه قائل  
اولمازلر.

۴ - تقیه نك قولده جوازینه، فعلده عدم جوازینه ذاهب  
اولدیلر. برده حد شرعی بی موجب اولان معصیتک صاحب  
و مرتکبی اول معصیتک اسمیه تسمیه اولنور. مثلاً: زنا ایدنه  
(زانی) سرقه ایدنه (سارق) قذف ایلینه (قاذف) دینیر اما  
(کافر) دینیز.

ترك صلاة، ترك صوم کبی - عظم شانی جهتیله مرتکبه  
حد شرعی تعیین اولنمیان معاصی صاحبنده (کافر) دینیر و کندى



مذهبداش لرندن اولان خاتونك دار التقيهده مخالف مذهبلىرى  
اولان كافرله تزوجى جائز ايسهده دار العلانيهده جائز دكلدر  
ديديلر.

## اباضيه

آلتنجيسى - طرابلس غرب بربرلرندن (عبدالله بن اباض  
المري) نام شخصه منسوب اولان (اباضيه) فرقه سيدر.  
بونلر اهل قبله دن مخالف مذهبلىرى اولانلره (كافر)  
ديرلر سده (مشرک) ديمزلر و مخالفلرينك مناكله لرني تجويز ايدرلر  
و يالكز وقت حربده اسلحه و مواشى كي ماللرينك اغتنامنى حلال  
صيارلر سده حربدن بشقه وقت ماللريني آلهي حرام اعتقاد  
ايلرلر و ينه اهل اسلامدن اولان مخالفلرينك دارلريني دار اسلام  
بيلوب يالكز پادشاهلرينك اردوگاهنى دار اسلام عد ايتزلر  
و مخالفلرينك كندى عايهلرينه شهادتلريني قبول ايدرلر و مرتكب  
كيره كرچه موحددر، فقط مؤمن دكلدر. زيرا اعمال، حقيقت  
ايمانده داخلدر صانيرلر و استطاعت قبل الفعلدر و قولك فعلى  
خدانك مخلوقيدر و اهل تكليف كاملاً فنا پذير اولدقه دنيا  
دخى فنا بولسه كر كدر و مرتكب كيره كافر نعمتدر؛ كافر ملت  
دكلدر ديرلر. مسائل آتیهده دخى توقف ايدرلر. اولاد صغار  
كفار دخى كافر ميدرلر (۱) نفاق، شرکيدر (۲) معجزه سز  
پيغمبر بعثي جائز ميدر (۳) معجزه سى اولميان پيغمبره وحى اولنان  
امور جائز الاتباع ميدر؟ (۴)

برده حضرت على ايله اكثر اصحابي تكفيره جرأت ايلديلر  
و بونكله برابر بونلرده مذهبلرنده درت فرقه يه متفرق اولديلر.  
۱ - حفصه .

بونلر (ابى حفصه بن ابى المقدام) نام شخصه منسوب اولوب  
آتى الذكر بدعتلى علاوه ايله آرقداشلرندن آيرلمشلردر.  
ديمشلكه :

ايمان ايله شرك آراسنده بر خصات متوسطه واردركه اوده  
معرفه اللهدر. بناءً عليه اللهى بيلوبده ماسوى اللهى - يعنى  
انبيا و احوال عقبى كي بيلنمىسى واجب و لازم اولان سائر معتقدات  
دينه يي انكار و كباير ذنوبى ارتكاب ايدن كيمسه كافردير؛ لکن  
مشرک دكلدر.

## ۲ - يزديه .

بونلر «يزيد بن انيسه» نام شخصك اصحابي اولان (يزديه)  
فرقه سيدرکه بونلر دخى علاوات آتیه ايله سائر آرقداشلرندن  
تفرد و تميز ايتمشلردر.  
ديمشلكه :

«حق تعالى ياقينده عجمدن بر پيغمبر كوندره جك و او  
پيغمبرك كتابى سماءه يازيلوب دفعه واحده نازل اوله جق و شريعت  
محمدية يي ترك ايدوب قرآن عظيمده مذکور اولان (صائبه) ملت  
ميل ايله جكدر و اصحاب حدودكه حد شرعى يي موجب اولان  
معصيتى ارتكاب ايدنلر ديمكدر؛ كندى مذهبداشز اولسون



اولسون مشرکدرلر. وکړک کیر، کړک صغیر اولسون هر ذنب،  
شرکدر. «

سنجار طاغنده ساکن اولان یزیدیلر دخی (ملک طاوس)  
نامیه شیطان علیه اللعنه حرمت وپرستش ایدرلر و «شیطان بر  
کون سمایه چیقوببتون ملائکه نکهینه رئیس اوله جقدر.» دیرلر.  
۳ — حارثیه.

بونلر «ابو الحارث الاباضی» یه منسوب اولوب قدرده  
واستطاعت مسئله سنده (اباضیه) یه مخالفت ایلدیلر.

۴ — عبد، مأمور به اولدینی طاعتی ادا ایتسه، فقط حین  
اداده جناب حق قصد واراده ایتسه او، ینه طاعتدر دین —  
یعنی عبادتک صحته نیتی شرط ایتیلردر. [\*]

[\*] «وما امروا الا ليعبدوا الله مخلصين له الدين» قول کریمنده  
مذکور اولان اخلاص ايله مراد نیتدر. (الاعمال بالنیات، ولکل امرئ  
مانوی، ونية المؤمن خير من عمله) حدیث شریفلری دخی صحت اعمالده  
نیتک شرط اولدینی موضحدرلر. اعمال اوچه منقسمدر. طاعت ۱ معصیت  
۲ مباح ۳

طاعتک اصل صحتی وتضاعیف فضلی نیته مربوطدر. طاعت، نیته  
مقرون اولورسه صحیح وصاحبی مأجور اولور.

معصیت، موضوعندن نیتله متغیر اولماز. بناءً علیه معصیت اولان  
شی نیتله طاعته تحول ایتز ومباحدن بر شی بوقدرکه نیته احتمالی اولویده  
مباح ایکن طاعت اولیه. مثلاً تطیب، حد ذاتنده مباحدر. لکن آکا نیت  
حسنه مقارن اولورسه او نیت سببیه طاعت اولور و فاعلی مثاب اولور.

## استطراد

شو فرقه ضاله اباضیه (۱۵۳) تاریخنده افریقیه ولایتیه  
بالهجوم خلیفه (منصور) طرفندن اوراده والی بولنان ذاته غلبه  
ایتدکن صکره جمعیتلری بیویوب اوچ شعبهیه منقسم اولدیلر.  
بو شعبهلردن یالکز (ابو حاتم) اداره سنده اولان بر شعبهده  
(۸۰,۰۰۰) سواری وار ایمش! دیگر ایکی شعبه (ابوعاد) و  
(ابوقره) نام شخصلرک تحت اداره سنده ایدی. صوک.

## عجارد

فرق سبعة خوارجدن یدنجیسی «عبد الله بن عجرد» نام  
شخصه منسوب اولان (عجارد) فرقه سیدر.  
بونلر (مجدات) فرقه سنک مذهبنی قبول ايله برابر آکا بعض  
علاوهلر ایتدیلر.  
دیدیلر که:

بعد البلوغ ادعای اسلام ایدنجیه دک طفلدن تبری، وبالغ  
اولدقده طفلی اسلامه دعوت ایتک واجیدر واطفال مشرکین  
بابالریله برابر نادرده درلر وکباری ارتکاب ایدنلر کافر  
اولورلر. «



بونلر - یعنی (عجاردہ) نام عمومی آلتندہ اولان خارجیلر  
دخی اون فرقیہ منقسم اولدیلر .

### ۱ - میونیه .

بونلر (میون بن عمران) نام شخصه منسوب اولوب بدع  
آتیہ ایله آرقداشلرندن متفرد اولمشلردر . اولاً قدره قائل اولوب  
افعال عبادی خلقاً وابداعاً عبادہ نسبت ایلدیلر . ثانیاً - استطاعت  
قبل الفعلدر . ثالثاً - جناب حق خیری اراده ایدر؛ شری  
و معاصی بی اراده ایتمز . رابعاً - اطفال مشرکین جنتده درلر .  
خامساً - بر آدم کړک اوغللرینک وکړک قزلرینک کرکسه ارکک  
وقزقارداشلرینک قزلرینی نکاح ایدمیلیر . دیدیلر و «سورۃ یوسف»  
حکایاتدن بر حکایه اولوب قصه الفسق ایسه قرآن اوله ماز . «  
دیهرک سورۃ مذکورہ بی انکار ایلدیلر .

### ۲ - حمزیه .

بونلر «حمزة بن ادرك» نام شخصه منسوب اولوب امور  
مذهبیہ ده (میونیه) ایله همدست وفاق ایسه لرده یالکز «اطفال  
کفار، نادرده درلر .» دیمکله آنلردن تمیز ایتمشلردر .

### ۳ - شعبیه .

بونلر (شعیب بن محمد) منسوب اولوب بدعتلرنده (میونیه)  
کیدرلر . یالکز قدرده آنلره مخالفت ایتمشلردر .

### ۴ - حازمیه .

بونلر (حازم بن عاصم) منسوب اولوب اعتقادده (شعیبیه)  
فرقه سنه موافقدرلر .

محکیدرکه، بونلر حضرت علی خصوصنده متوقف ایتمشلرده  
حضرت علینک غیریسندن تصریح برائت ایتدکلی کبی امام  
مشارالیهدن صراحة تبری ایتمزلر ایش .  
۵ - خلفیه .

بونلر (خلف) نام خارجینک اصحابیدرلر . کرمان، و مکران،  
طرفلرنده بولنورلردی .

بونلر خیر و شری جناب حقه اسناد ایتدیلر و اطفال مشرکین  
عملسز و شرکسز جهنمه کیرسه لر کرکدر دیدیلر .  
۶ - اطرافیه .

بونلر (حمزیه) نک اعتقادنده ایدیلر . رئیسلی سنجستان  
اهالیسندن (غالب) نامنده بر شخص ایدی .

شو قدرکه بونلر «برکیمسه شریعتده بیلدیکی شیئی ترک ایلسه،  
وعقل جهتندن لزومنی بیلدیکی شیئی ایلسه معذوردر .» دیهرک  
اطرافده کی خالق بوبایدہ معذور طوتدیلر و اصوللرنده ونفی  
قدرده - یعنی افعال عبادی قدرت عبادہ عدم اسنادده اهل سنته  
موافقت ایلدیلر .

### ۷ - معلومیه .

بونلر اعتقادده (حازمیه) کبی درلر . شو قدرکه بونلرک عندنده  
مؤمن، جناب حق جمیع اسما و صفاتیله بیلن در . بویله بیلین



جاهلدر؛ مؤمن دکلدر. برده «قولك فعلى جناب حقل مخلوقيدر.»  
ديديلر.

### ۸ — مجهوليه.

بونلر كده مذهبلرى (حازميه) مذهبي كي در.  
شوقدر كه بونلر «مؤمن اولغه جناب حق بعض اسماسيله  
بيلك كافى در و جناب حق يالكز بعض اسماسيله بيلن ده عارف  
باللهدر. مؤمندر. برده قولك فعلى كندينك مخلوقيدر.» ديديلر.

### ۹ — صلتيه.

بونلر «عثمان بن ابى الصلت» يا خود «صلى بن صامت»  
نام شخصك اصحابيدر كه بدع آيه نك علاوه سيله سائر (عجاردده)  
فرقه لرندن تميز ايتملر در.

شويله كه: «اسلامه كلوب ده بزم تحت حمايه مزه كيرن كيمسه يي  
دوسب ايدينيرز. فقط حد بلوغه ايروب ده اسلامه دعوت برله  
او دعوته اجابت ايدنجيه قدر او كيمسه نك اطفالندن اعراض  
ايدرز.» ديديلر.

مرويدر كه: (صلتيه) دن بعضيلرى «كرك اطفال مسلمين  
و كرك اطفال مشركين اولسون، حد بلوغه ايروب ده اسلامه  
دعوت برله او دعوتى قبول ويا رد ايدنجيه قدر اطفاله موالات  
و معادات جائز دكلدر.» ديديلر.

### ۱۰ — ثعلبيه.

بونلر «ثعلبة بن عامر» نام شخصه منسوب اولوب اطفالك

ولايتنه قائل اولملر در. شويله كه: بر طفل كرك كوچك و كرك  
بيوك اولسون، حد بلوغه رسیده اولوب ده آندن صكره كنديسندن  
انكار حق ظاهر اولمادجه آنى ولايتدن اسقاط ايتملر.

ينه بونلردن منقولدر كه: «تايويوب دينه دعوت اولنجيه قدر  
اطفال ايچون ولايت وعداوتدن بر حكم ثابت اولماز.» ديديلر،  
و «قول جنسندن — غنالى حالده — زكات آله يي و فقرلرى  
جالنده كنديلرينه زكات ويرمه يي تجويز ايلديلر، و بو فرقه  
ثعلابه، دخى درت فرقه يه متفرق اولديلر.

### ۱ — اخنسيه.

بونلر «اخنس بن قيس» نام شخصك اصحابيدر لركه ثعلابه دن  
مسائل آيه ايله ممتاز اولديلر.

«اهل قبله دن دار تقيه ده اولان كيمسه حقنده توقف ايدوب  
آنك ايمانيله ده، كفريله ده حكم ايتملر. مكر حالوشانى يعنى كفر  
وايمانى معلوم اوله.

«مخالف مذهبلرى اولانلر ك قلى ده، مالارينك اخذى ده  
حرامدر.

«كندى قوملرينك مشركلرينه مسلملرى تزويج ايتلك جائزدر.»  
ديديلر.

### ب — معبديه.

بونلر «معبد بن عبدالرحمن» نام شخصك اتباعى اولوب



مشرکینه تجویز تزویج مسلمانده (اخنسیه) یه، وعیددن زکات آلوب ویرمهده (ثعالیه) یه مخالفت ایلدیلر.

ج — شیبانیه.

بونلر «شیبان بن سلمه» نام شخصه منسوب اولوب جبرده ونفی قدرت حادهده «جهنم بن صفوان» ه موافقت ایتشلردر. د — مکرمیه.

بونلر «مکرم العجلی» نام شخصک اصحابی اولوب امور آتیهدم (ثعالیه) یه مخالفت ایتشلردر.

۱ — تارك صلات، کافر در وبونك کفری نمازی ترکندن ناشی دکلدر. بلکه اللهی بیلدیکی ایچوندر. زیرا الله تعالی آنک کیزلی و آشکاره هر حاله مطلع اولدیغنی، طاعت وعصیاننه کوره مجازات ایده جکنی بیلسه، ترك صلاته اقدامی متصور دکلدر. دیمک که بونی بیلورده نمازی آنک ایچون ترك ایدیور. ایشته کفرینه سبب بودر.

۲ — «هر معصیت کیره نك مرتکبی کافر در. زیرا معصیت کیره نك مستلزم اولدیغنی عقابه جناب حق کندیغنی دوچار ایده جکنی بیلسه آنی ارتکاب ایتزدی. دیمک که بیلدیکی ایچون ارتکاب ایدیور. آنکچون کفرینه حکم اولنور. حتی سبب بودر که، اول فخر عالم صلی الله علیه وسلم اقدمز (لایزنی الزانی حین یزنی وهو مؤمن ولا یسرق السارق حین یسرق وهو مؤمن) بیور مشدر.»

۳ — «جناب حقك عبادینه موالات و معاداتی عاقبت اعتباریله در. یعنی بر کیمسه آخرته حین انتقالنده نه حالده ایسه جناب حقك ده آکا موالات و معاداتی احوال اعتباریله در. حال حاضر اعتباریله دکلدر. زیرا حال حاضرک دوامنه وثوق و اعتماد یوقدر. ایشته بزده بویله یز. بزدن حالت موته واصل اولان کیمسه اگر او حالتده مؤمن ایسه آکا محبت ایدرز. اگر کافر ایسه «نعوذ بالله تعالی» آکا عداوت ایلرز.» دیدیلر.

مرجه

کبار فرق اسلامیه دن دردنجیسی (مرجه) در.

(ارجا) ایکی معنایه کلیر: بری — تأخیر و امهال، دیکری — اعطای رجا.

بونلر «عمل، بحسب الرتبه نیتدن، اعتقاددن مؤخر در.» دیدکلر ایچون (مرجه) نامنی آلدیلر.

یاخود «کفر ایله طاعت فائده ویرمدیکی کبی ایمان ایله معصیت دخی ضرر ویرمر.» دیه رجا ویردکلر ایچون (مرجه) لقبیه تلقیب اولندیلر.

(ارجا) حقنده ده ایکی روایت واردر.

۱ — ارجا، کیره صاحبك حکمنی قیامت کوننه تأخیر



ایدوب « بو، اهل جنت یاخود اهل جهنمدر . » دیو دنیاده بر حکم ویرمامکدر.

۲ — ارجا، حضرت علی بی درجه اولادن درجه رابعیه تأخیردر .

روایت اولایه کوره (مرجه) ایله (وعیدیه) ایکی فرقه متقابلله اولمش اولورلر .

روایت ثانییه کوره (مرجه) ایله (شیعه) فرقتین متقابلتین اولمش اولورلر .

(مرجه) نام عمومیی آلتیده اولانلر دخی مذهبیلرنده درت فرقهیه متفرق اولملردر.

#### یونسیه

اولکیسی — « یونس النخیری » نام شخصه منسوب اولان (یونسیه) فرقه سیدر .

بونلر «ایمان، الهی بیلک، الله خضوع و انقیاد ایله برابر قلباً محبت الیکدر . ایشته بوصفتلر ذاتنده مجتمع اولان کیمسه مؤمندر . بوصفتلرک اجتماعی حالنده ترک طاعات، ارتکاب معاصی ایمانه ضرر ویرمز و ترک طاعات، ارتکاب معاصیدن طولایی عذاب و عقاب اولغاز و قول، جتنه عمل و طاعتیله دکل، اخلاص و محبتیله داخل اولور و ابلیس لعین عارف ایدی؛ استکبارندن و جناب حقه خضوع و انقیادی ترکندن طولایی کافر .

اولدی . نته کیم (ابی واستکبر وکان من الکافرین) قول کریمی بوکا دلالت ایدر . دیدیلر .

#### عیدیه

ایکنجیسی «عید المکذب» نام شخصه منسوب اولان (عیدیه) فرقه سیدر .

بونلر یونسیه، مذهبیه امور آتییه علاوه ایتدیلر . «جناب حقه علمی ذاتندن غیری دکلدر و سائر صفتلری دخی بویله در و جناب حق انسان صورتنده در و رسالتپناه اقدمن (ان الله خلق آدم علی صورة الرحمن) حدیث شریفیله بوکا اشارت بیورمش در . دیدیلر .

#### غسانیه

اوچنجیسی «غسان کوفی» نام شخصک اصحابی اولان (غسانیه) فرقه سیدر .

بونلر «ایمان، جناب حق و آنک رسوایی و آنلردن کانی اجمالاً بیلکدر؛ تفصیلاً بیلک شرط دکلدر و ایمان، آرتار، اکسیلنز؛ معرفت اجمالیه دخی بودرکه؛ مثلاً (الله تعالی حجی بزه فرض ایتدی؛ لکن کعبه زده در؛ بیللم؛ احتمال که مکّه مکرمه نك غیری یرده اوله؛ جناب حق حضرت محمدی بعث بیوردی؛ لکن مدینه منوره ده اولان اومیدر؛ یاخود بشقه سمیدر؟



بیلیم! لحم خنزیری حرام ایتدی؛ لکن خنزیر شو حیوان معهودمیدر؟ یاخود قیونمیدر؟ بیلیم! (دینیله .  
«ایشته بومقالاتی قائل اولان کیمسه دخی مؤمندر.» دیدیلر.  
بونلرک معرفت اجمالیله بی بوجه ایله تعریفدن مقصودلری «امور مذکوره نك حقیقت ایمانده داخل اولمادیغنی بیاندن عبارتدر .  
یوقسه بومورده عاقل اولان شك ایتمز. غریبدرکه بونلرک رئیس مذهبیری (غسان) کویا امام اعظم ابو حنیفه الکوفی حضرتلرینك ده مذهبی بودر دیر و آئی ده مرجئه دن عد ایدردی . بو ایسه حضرت امام حقنده بهتان و افترا در . (غسان) ك بوندن مرادی حضرت امام کبی، اکابر مشاهیر امتدن برذات عالیقدرک موافقتیه کندی مذهب باطلنه رواج ویرمکدن عبارت اولوب، یوقسه حضرت امام بومثلاو اباطیلدن بری در .

آمدی دیدی که :

«ومع هذا اصحاب مقالاتدن چوغی ابو حنیفه بی ده، آنك اصحابی ده مرجئه اهل سنتدن عد ایلدی .  
بونك سببنده ایکی وجه بیان ایدیورلر .

۱ — امام اعظم حضرتلری صدر اولده ظهور ایدن معتزله یه قدرده مخالفت ایدردی . معتزله ایسه کندیلرینه مخالفت ایدنه (مرجی) دیرلردی . بناءً علیه حضرت امامه واصحابنه بو نامی قدمای معتزله ویرمش اولسه لر کرکدر .

۲ — حضرت امام، «ایمان، لسان ایله اقرار، قلب ایله تصدیق معناسنه در .» دیر ایدی؛ «جوار حله عمل معناسنه در .» دیمزدی و «ایمانك آرتمق اکسیلك احتمالی اولمادیغنه ذاهب اولمشدی .  
ایشته بوندن ظن اولمش که حضرت امام عملی ایماندن تأخیر ایدیور . آنکچون آکا (مرجی) دیمشلر . حال بوکه اوله دکلدرد .  
بو ظن بر ظن فاسددر . زیرا حضرت امامك عملده مبالغه سی و آنده کمال اجتهادی معروف و مشهوردر .

توبانیه

دردنجیسی «توبان المرجی» نام شخصه منسوب اولان (توبانیه) فرقه سیدر .

بونلر «ایمان، بیلک واللهی، رسول اللهی وعقلاً ایشلمسی جائز اولیان هرشیئی اقرار ایلکدر . عقلاً ایشلمسی جائز اولان شیئه اعتقاد، ایماندن دکلدرد .» دیدیلر و عملك هپسنی ایماندن تأخیر ایتدیلر .

(مروان بن غیلان) وبر روایت کوره (ابو مروان غیلان الدمشقی) و (ابو شمر) و (یونس بن عمران) و (فضل رقاشی) دخی بونلره موافقت ایتمشلردر .

بونلرک کافه سی «جناب حق یوم قیامتده بر عاصی بی عفو ایدرسه، حالی آنك حالنه بکزه بن سائر عصاة مؤمنینی دخی عفو



ایلك و جهنمندن برینی چیقاره جق اولورسه، سائر امثالنی ده  
چیقارمق لازم کایر. «دیدیلر مؤمنینک جهنمدن خروجنی  
جزم ایتدیلر و غیلانک اوغلی، یاخود غیلانک کندیسی  
«قدر و خروج» ایله یعنی ارجا ایله افعالی عبادہ اسناد بیننی جمع  
ایدرك «امامک قرشی اولماسی ده جائزدر». دیمکه آرقداشلرندن  
متمیز و متفرد اولمش در.

ثومنیه

بشجیسی «ابو معاذ الثومنی» نام شخصه منسوب اولان (ثومنیه)

فرقه سیدر.

بونلر «ایمان، معرفت و تصدیق و محبت و اخلاص و اقراردر.  
بونلرک جمله سنی، یاخود بعضیسنی ترك ایتمک کفردر و بونلرک  
یالکز بعضیسی ایمان تام دکلدر. ایمانک بعضی ده دکلدر. یعنی نه  
تام ایماندر؛ نه ده جزء ایماندر و هر معصیت که کفر اولدیغنده  
اجماع امت واقع اولمامشدر؛ آنک صاحب و مرتکبه صیغه ماضی  
ایله «فسق و عصی» دینیر، یعنی کندیسی فسق و عصیانہ نسبت  
ایدیلیرسه ده (فاسقدر) دینلر و هرکیم نمازک ترکی استحلال ایدهرک  
ادای صلات ایتزسه - رسول اللهک تبلیغ ایتدیکی احکام الهیه بی  
تکذیب دیمک اولدیغیچون - کافر اولور. فقط نمازی بعده قضا  
ایتمک نیتیه ترك ایدرسه کافر اولماز و هرکیم برپیغمبری اولدورر،  
یاخود دوکرسه - اولدوردیکی یاخود دوکدیکی ایچون دکل،

بلکه تکذیب و بغضه دلیل اولدینی ایچون کافر اولور. «  
دیدیلر.

«ابن راوندی» و «بشر المریسی» دخی بوقولی التزام ایله  
دیمشلرکه:

«بته سجده ایتمک کفر دکلدر! بلکه علامت کفردر.»  
ایشته (مرجئه خالصه) بونلر اولوب ایچلرندن (صالحی)  
و (ابی شمر) و (محمد بن شیب) و (غیلان) کی بعضاری ده (ارجا)  
ایله (قدر) ی جمع ایتشلردر.

استطراد

اهل سنت و جماعت، عندنده اعمال، حقیقت ایمانده  
داخل دکلدر. فقط اعمال مفروضه نك فرضیتلرینی انکار ایدن  
کافر اولور. فرضیتلرینی اعتقاد ایله برابر کسلدن ناشی ترك ایدنه  
فاسق دینیر. بونده جمیع اهل سنت متفقدر. یالکز ترك صلات،  
مسئله سی تحت اختلافده در. شویله که: نمازی وقت ادا چیقنجه یه قدر  
عمداً ترك ایدنی کیمی - کفره نسبت ایلدی. کیمی ایتدی. امام  
اعظم، امام مالک، امام شافعی و بر روایتده امام احمد بن حنبل  
شق ثانی بی اختیار ایدنلردندر. بر روایتده امام احمد بن  
حنبل، شق اولی اختیار ایتمش در.



## نجاریه

کبار فرق اسلامیهدن بشنجیسی (نجاریه) فرقه سیدر .

بونلر (محمد بن الحسین النجار) ك اصحابی اولوب «افعال، مخلوق اللهدر؛ استطاعت مع الفعل در؛ قول فعلی اکتساب ایدر.» مسئله لرنده اهل سنته — و صفات وجودیه بی نفی ده، حدوث کلام ده، ابصار ایله رؤیة الهی نفی ده معتزله یه موافقت ایلدیلر . (ضرار بن عمرو) و (حفص الفرد) دخی بو مسئله ده آنلره اتباع ایتمشلردر .

ایشته (نجاریه) عنوان عمومیسى آلتنده بولنانلر دخی اوج فرقه یه آیرلدیلر .

۱ — برغوئییه .

بونلر «کلام الله حین قرائته عرضدر؛ حین کتابته جسمدر.» دیدیلر .

۲ — زعفرانیه .

بونلر «کلام الله، غیر اللهدر . غیر الله ایسه مخلوقدر . و — کلام الله مخلوق دکلدر — دین کافردر.» دیدیلر .

۳ — مستدرکه .

بونلر زعفرانیه اوزرینه استدراك ایدوب «کلام الله مطلقا

مخلوقدر ! لكن رسول الله صلى الله عليه وسلم افندمن (کلام الله غیر مخلوق) بیورمش اولدیغندن بوسنته، برده کلام اللهک مخلوقیتی نفی اوزرینه منعقد اولان اجماع امته موافقت ایلر زده حضرت پیغمبرك بوقولنی «شوصورت کلام اللهک حکایه سیدر .» دیه تاویل ایلرز . یعنی بونظم وترتیب اوزره حروف واصواتدن مرکب اولان کلام الله مخلوق دکلدر . بلکه بو حروفک غیرى اولان کلام، مخلوق اولوب بو حروف او حروفک حکایه سیدر .» دیدیلر .

## جبرییه

کبار فرق اسلامیهدن آلتنجیسی (جبرییه) فرقه سیدر .

جبر، فعل عبدی جناب حقه اسناد دیمکدر .

بو فرقه ضالیه (جبرییه خالصه) دینیرکه (معتزله) نك ضدتامی اولوب جبر محضه قائل اولمشلر؛ انسانی جمادات منزله سنه تنزیل ایتمشلردر . بونلر ملوک امویه نك آخر زمان سلطنتلرنده (مرو) بلده سنده (سالم بن احوز المازنی) الیه قتل ایدیلن مشهور (جهنم بن صفوان ترمذی) نام شخصك اصحابی اولوب «عبدك هیچ بر فعلی — نه مؤثر، نه کاسب — هیچ بر فعله قدرتی یوقدر . عبد، جمادات منزله سنده اولوب آندن صدور ایدن کافه افعال و حرکات



اضطراریدر والله تعالی بر شیئی وقوعندن اول بیلز . علم خدا محلسز اوله رق حادثدر . جناب حق ( علم و قدرت - و بر قوله کوره - حیات کبی ) خلقک وصف اولندقلری صفتلرله وصف اولنماز . زیرا بو وصف ، تشبیهی مقتضیدر و اهل جنت ، جنته اهل جهنم ، جهنمه داخل اولدقدن صکره جمله سنک حرکتلری منقطع اوله رق جنت و جهنم ، فنا بولور . شویله که ، جناب حقندن غیری بر موجود باقی قالمسه کرکدر . اهل جنت و جهنم حقننده وارد اولان ( خالدين فيها ) قول شریفی مبالغهیه محمولدر . معنای حقیقی بی متضمن دکلدرد . « دیدیلر .

یالکز نفی رؤیتده [۱] اثبات خلق کلامده [۲] شرعک ورودندن اول عقل ایله ایجاب معرفتده [۳] معتزلهیه موافقت ایتدیلر .

### مشبهه

کبار فرق اسلامیه دن یدنجیسی ( مشبهه ) فرقه سیدر .

بونلر جناب حق مخلوقات و حادثاته بکرتدکلرنندن ( مشبهه ) نامنی آلمشلدردر .

[۱] معتزله ، آخرتده ده جناب حق کوزله کورلمز دیدیلر .

[۲] معتزله ، کلام الله مخلوقدر دیدیلر .

[۳] معتزله ، معرفه الله ورود شرعه متوقف دکلدرد . واسطه عقل

ایله ده حصول معرفت قابل و واجبدر دیدیلر .

اهل تشبیه ، جناب حق مخلوقاتیه تشبیهده متفق اولوب یالکز طریق تشبیهده اختلاف ایتمشلدردر .

سبائییه ، بنائییه ، مغیرییه و سائره کبی جناب حقک جسم ، متحرک ، منتقل ، اجسامه حال اولدیغنه قائل اولان ( غلاة شیعه ) ایله مضر ، همس ، احمد الهجیمی کبی « جناب حق جسمدر ؛ لکن سائر جسملر کبی دکلدرد . لحم و دمدن مرکبدر ؛ لکن سائر لحم و دم کبی دکلدرد و آنکده اعضاسی ، جوارحی وارد و دنیاده کنندینی زیارت ایلین مخلصین ایله ملامسه ، مصافحه ، معانقه ایدر . « دین - حتی « لویه و فرجندن بنی عفو ایدکرده آندن ماعداسندن صورکر . » کبی برادبسنز لکه قدر چیقیشان ( مشبهه حشویه ) ده « ابو عبدالله محمد بن کرام » ک [\*] اصحابی اولان ( مشبهه کرامیه ) ده بونلردندر . مشبهه نام عمومی آلتنده اولانلرک تشبیهده اقوالی متعدد و مختلفدر . شوقدرکه بو اقوال مختلفه سوزینه اعتبار و اعتماد اولنور بر کیسهیه منتهی اولمادیغنی جهته آنلری نقل و بیانه علمای کلام تصدی ایتیوب یالکز رئیسارینک آتی الذکر اقوال باطله سنی ایراد ایله اکتفا ایتمشلدردر .

رئیس اهل تشبیه دیمش که :

[\*] کرام ، کافک کسری ، رانک تخفیفیه مضبوطدر . بونی کوسنرمک

ایچون شرح موافقه بیت آتی ایراد اولمشدر :

الفقه فقه ابی حنیفه وحده

و الدین دین محمد بن کرام



« جناب حق عرش اوزرنده مستقر در . صفحه علیاسندن  
عرشه محاسن و آکا حرکت و نزول جائز در . »  
ایشته اهل تشبیهك اسالاس اعتقاد لری بواولوب صکره  
بعضی لری « جناب حق عجا عرشی بویدن بویه طول دوریور می ؟  
یوقسه عرشك یالکر بر قسمی می اشغال ایدیور ؟ » بو باید  
اختلاف ایتشادر .

کیمی ده « جناب حق عرش اوزرنده مستقر دکادر ؛ عرشه  
محاذی در . دیدی ؛ شوقدرکه « بعد متاهی ایله می ؟ یاخود بعد غیر  
متاهی ایله می محاذی در ؟ » دیو بونده ده اختلاف اولندی .  
کیمی ده « جناب حق جسمدر . » دیدکن صکره « عجا کافه  
جهاتد نمی ؟ یوقسه یالکر جهت تحتد نمی متاهیدر ؟ یاخود جمیع  
جهاتده غیر متاهیمیدر ؟ » دیو اختلاف اولندی .

برده « ذات باریده حوادث حلول ایدر . » دیدیلر و « جناب  
حق یالکر ذاتنه حلول ایلین حواده قادر اولور ؛ ذاتندن خارج  
اولان حواده قادر اولماز وایلك مخلوق حی اولق الله اوزرینه  
واجبدرکه آندن استدلال صحیح اولسون ، ( وحی ) تبلیغه دائر  
اولان امر آلهی ، معجزه ، عصمتدن بشقه اوله رق ( نبوت و رسالت )  
رسول اللهك ذاتیه قائم ایکی صفتدرکه بو صفتلرک صاحبی -  
کندینک بو صفتلرله اتصافی سببیه - من غیر ارسال رسولدر ،  
و جناب حق بو صفتلرله متصف اولانی ارساله مجبور اولوب  
آندن بشقه سنی ارسال ایده مز ، و اور رسول ارسال اولدقد

مرسل اولور ، و هر مرسل رسولدر . لکن هر رسول مرسل  
دکادر ، و مرسل مرسل اولمقدن عزل ، جائزدر . لکن رسولك  
رسوللکدن عزلی جائز دکادر ، و رسول واحدی ، ارسال ایله  
اکتفا مقتضای حکمت اولیوب بلکه متعدد رسوللرک ارسالی لابد  
ولازمدر ، وعصر واحده ایکی امامك وجود واجتماعی جائزدر .  
( حضرت علی ایله معاویهك اجتماعی کبی ! ) شوقدرکه امامت  
علی وفق سنت اوزره منعقد اولوب معاویهك امامتی وفق  
سنت اوزره منعقد دکل ایدی . لکن معاویهده رعیتك  
اطاعت و انقیادی واجب ایدی ، و ( ایمان ) ازله جناب حقك  
( الست بر بکم ) خطاب عزتی وارد اولدقد ( بلی ) قولیه وقوع  
بولان اقراردر ، و بو ایمان ازلی - مرتدلردن بشقه - هر کسده  
مساویدر ، و - کفریه برابر - منافقك ایمانی انبیانك ایمانی  
کبی در . چونکه ایمان ازلیده جمله سی مساویدر . » دیدیلر .

ایشته خلاصه مفادی زیور صدر کتاب اولان حدیث مشهور  
نبویده « کلهم فی النار » قولیه مأل و عاقبت حاللری بیان بیوریلان  
فرق ضاله بونلردر .

« اللهم ارنا الحق حقاً تتبعه وارنا الباطل باطلاً نجتبه »



## فرقة ناجیه

کبار فرق اسلامیه نك سکن نجیسی (فرقة ناجیه) در.

حدیث شریف نبویده «هم الذين على ما انا عليه واصحابي» امتیاز فاخریله ممتاز و مستثنی اولان (فرقة ناجیه) که مذهب پاکری سالف الذکر فرق ضالنه نك بدعتلرندن خالی اولان اهل سنت و جماعتدر، (شیخ ابومنصور ماتریدی) و (شیخ ابو الحسن الاشعری) حضرتلرینك اتباعیدر.

ابومنصور، اصول وفروعده امام اعظم حضرتلرینك مذهب شریفلری اوزره اولدیغندن حنفیلر، عقائده حضرت ابومنصوره تابع اولمشلر. مالکیلر، شافعیلر، حنبیلر دخی (ابو الحسن الاشعری) حضرتلرینك رأینی اختیار ایتشلردر.

لکن حضرت امام اشعرینك مذهبنده اختلاف اولمشدر. اکثر علما امام اشعری شافعیدر؛ بعض علما دخی مالکیدر دیدیلر.

حضرت ابومنصورك اتباعنه (ماتریدی) و حضرت اشعرینك اتباعنه (اشاعره) دینیلر و هر ایکسنهده علی سبیل التغلیب (اشعری) تسمیه اولنور.

(اشاعره) ماتریدی، مقابلی ذکر اولندقدده امام اشعرینك اصحابی مراد اولور. بعضاً دخی اهل بدعت مقابلی اوله رق مذکور اولوب عمومأ اهل سنت دیمك اولور. بو صورتده (اشاعره) ماتریدییه دخی شامل اولور.

بویکی امام همام، اهل سنت و جماعتك عینك عینین هدایتی اولوب اگرچه بعض جزئیات مسائل کلامیهده اختلافلری وار ایسهده اصول اعتقادیاتده متفقدرلر. اختلاف ایتدکاری مسائلك اکثرندهده بینلرینی توفیق قابل اولدیغندن بربرندن آریله جق، و یکدیگری بدعت و ضالته نسبت ایده جك قدر بینلرنده اختلاف یوقدر.

باشلوجه اختلافلرندن بریسی اراده جزئییه بحیدر. شویله که:

معتزله، قول فعلنك خالق اوله رق بو چراکاه عالمده مطلق العنان اولوب کیف مایشا حرکت ایدر دیدیلر. بوسورتده ایسه خالقك تعددی لازم کایر.

جبرییه، دخی بونلرک ضدتامی اوله رق قولدن بتون بتون اراده و اختیاری سلب ایدوب انسان، کافه حرکات و سکناتنده مجبور و مضطردر دیرلر. بونلره کوردهده تکالیف الهیه عبث اولمق لازم کایر. برده انسانك آشاغیدن یوقاری طوغری چیقیشییه دوشوب ده بالاضطرار آشاغه طوغری اینشنده فرق، بدیهی



اولمغله « انسانده اصلا اراده و اختیار یوقدر . » دیمک بداهته قارشی در .

ایشته بونک ایکی اوجی افراط و تفریط اولدیغندن اهل سنت بین الامرین توسط ایدوب هرشیئی خلق ایدن واجب الوجود تعالیٰ حضر تدریدر؛ لکن افعال اختیاریه ده انسانک اراده جزئییه سی واردر دیدیلر .

اراده جزئییه ایکی طرفدن — یعنی فعل و ترکدن برینی ترجیح دیمک اولوب آنجق مخلوقیدر دکلیدر دیو اشاعره ایله ماتریدییه، بیننده اختلاف واقع اوله رق اشاعره «مخلوقدر» ماتریرییه «مخلوق دکلدر» دیدیلر. بوجهته اشاعره عندنده هر شیئی جناب حق بیلدیکی ایچون اولور.

اما ماتریرییه عندنده علم، معلومه تابع اوله رق جناب حق هر آئی بی اوله جغندن طولایی بیلیر. مقلدین حنفیه ایچون احق واصوب اولان ماتریدییه مساکیدر .

زیرا اراده جزئییه، مخلوق اولدیغی حالدده انسان کنیدی قدرتی صرفده مجبور اولمغله بو دخی خبره وارر . بناءً علیه ینه تکالیف الهیه عبث اولمق لازم کلیر .

فقط اشعریه نك «اراده جزئییه مخلوقدر» دیملری «اسبابی اولان شوق و آرزولر مخلوق، و من طرف الله وارد» دیمکدر دیهرک بینلری توفیق اولنه بیلیر .

اگر اشعریه، طرفندن اعتراض اوله رق دینیلیرسه که، اراده

جزئییه مخلوق الهی اولمیوبده، قولک صنعیه ایسه قول، آئی خالق اولمق لازم کلوب مذهب اعتزاله وارر . و اگر قول دخی خالق دکلدر دینیلیر ایسه، خالقسن مخلوق بولمق لازم کلیر؛ و هر حالده — معتزله کی — ماتریدییه کوره دخی جناب حق هرشیئی خالق اولماق لازم کلیر .

بوکا شو وجه ایله جواب ویریلیرکه، هرشیئک خالق جناب حقدر. لکن اراده جزئییه (شی) دکلدر. زیرا (شی) امر موجود معناسنه اولوب اراده جزئییه ایسه (زمانی) اولمیه رق و بلکه آن واجدده دفعی اوله رق انساندن منبعث بر حال اولدیغندن امور اعتباریه قیلندن اولوب امر موجود دکلدر . تاکه خالقه محتاج اولسونده خالق، فعلی آکا تعلق ایلسون .

واکر «بوجه افعال اختیاریه نك منشی، وسعادات دارینک مداری اولان اراده جزئییه امر اعتباریدر دیمک درجه قبول و اعتباردن بعیددر .» دینیرسه جواب ویریلیرکه امور اعتباریه نك ایکی معناسی واردر . بری — نفس الامرده موجود اولوب آنجق خارجده برزمانده وجود ایله متصف دکلدر . ایشته «اراده جزئییه امر اعتباریدر» دیدیکمز بو معناه در . (مقتبس و منقول، ج . پ)

§

مذاهب اهل سنت

عملده مذاهب معتد علیها درتدر .



حنفی ۱ شافعی ۲ مالکی ۳ حنبلی ۴

مذهب اول

امام اعظم ابو حنیفه الکوفی حضرت تریک مذهبیدر .

حضرت امامک اسم شریفی (نعمان بن ثابت) مسقط رأس  
عالیاری کوفه در . نسب سعادتری ملوک ایرانیه دن نوشروانه  
موصولدر .

حضرت مشارالیه ابتدای حالده اختیار ازوا، و نشر  
و تدریس ایله اکتفا بیوروب صکره عالم معناده شرفصادر اولان  
امر و فرمان جناب نبوی موجب عالیسی اوزره اجتهاده باشلادی،  
و علم و عرفان و کمالی هر طرفه منتشر اولدیغندن درسنه یک چوق  
منتهی ذاتر کلدی، و ابراهیم بن ادهم، بشر حافی، داود طائی،  
امام ابی یوسف، امام محمد، امام زفر، عبد الله بن المبارک کبی  
ذاتر یتشیدردی. شاگردانندن یمش ذات ستوده سمات قدرتیاب  
اجتهاد اولدی .

خليفة (ابو جعفر المنصور) ابتداری حضرت امامه فوق  
الغایه حرمت و رعایت ایدوب بر آراق بغداد انشا آتتهده مأمور  
ایتمشدی. مؤخرأ کندیسنه تکلیف ایتدیکی قاضی القضاة منصبی  
قبول ایتدیکنندن، و یاخود دیگر بعض اسباب سیاسیة ملکیه دن  
طولایی حدتنوب آتی زندانه آتدی، و کونده اوزر قامچی آرتیرلمق  
اوزره هر کون ضرب اولمسنی امر ایلدی؛ قامچینک عددی یوزمه

بالغ اولدقدده یک چوق بکا ایدوب یمش یاشینده ایکن متأثراً  
وفات ایلدی .

ولادتی سنه (۸۰) ارمحالی سنه (۱۵۰)

بوندن اول بنی امیه حکومتی زماننده «یزید بن عمرو بن  
هییره» نک کوفه و الیلکننده تکلیف اولنان کوفه قاضیکنی دخی  
قبول ایتدیکنندن ضرب اولمسن ایدی. زهی عدالت!

جنازه سنده (۵۰,۰۰۰) کشی بولندیغنی تواتراً مرویدر.

زمان تابعینده علم و فضل و تقوی و اجتهاد ایله شهره آفاق  
اولوب قولیلله عمل اولمسن در .

بعد العشا صباحه قدر نوافل قیلارلر، و هر یکرمی درت  
ساعتده بر کره ختم قرآن ایدرلر، و کچهلری خشیه اللهدن  
آغلادجه قومشولری آجیرلر ایدی. (مقتبس . ر.)

حق سعادترنده حدیث شریف نبوی وارد اولدیغنی مرویدر.  
امام اعظم و مجتهد اقدم، عنوان جلیل الشانی ذات بی مدانیلریله  
شرف اختصاص بولمش در .

مذهب حنفیده تلامیزک بعض اختلافی سببیلله بعض مسائلده  
اختلاف، واقع اولمش ایسه ده ینه جمله سنک اصولی بر در .  
جزئیات فروعهده ایسه اختلاف جائدر. [\*]

[۵] امام شافعی، امام اعظم حقنده شو بیقی انشاد بیورمشدر .

اعد ذکر نعمان لنا ان ذکره

هو المسک ما کررتنه يتضوع



امام ثانی - امام ابو یوسف حضرت تلریدر. اسم شریفی یعقوب بن ابراهیمدر. مولدی کوفه در.

امام اعظم حضرت تلرینک کبار اصحابندن اولوب خلفای عباسیه دن «هارون الرشید» ک قاضی القضااتی ایدی. (۶۹) سنه معمر اولوب (۱۸۲) تاریخنده آخرته ارتحال ایلدی. کتاب وسنته، ناسخ و منسوخه، محکمت و متشابهاته عالم و عارف اولانلرک اعلم و اعرفی در.

امام ثالث - محمد بن حسن شیبانی حضرت تلریدر. امام اعظم حضرت تلرینک اجله اصحابندن بر علامه جلیل القدر اولوب پک چوق تألیفاتی واردر. «مبسوط، جامع الصغیر، کتاب الزیادات، سیر کبیر، نوادر» تصانیف مشهوره سندندر.

(۱۸۹) تاریخ هجریسنده (۵۴) یاشنده ارتحال داربقا ایتدی. (هارون الرشید) ک کندیسنه تکلیف ایتدیکی قاضیلکی - ورع و تقوای جهتیه - قبول ایتدیکی ایچون ایکی آی قدر حبس اولندی. مؤخرأ سبیلی تخلیه قلنه رق ایستر ایسته مز (ری) بلده مشهوره سی قاضیلکنه نصب ایدلمکه قضایه رضا و یروب آخر عمرینه قدر اوراده قالدی.

قطعه آتیه دخی امام اعظم حقنده سویلن مدایحک اک کوزلرندندر. «ایا جبلی نعمان ان حصا کما، لیحصی و ما یحصی مناقب نعمان» «جلال کتب الفقه طالع تجدلها، حقائق نعمان شقائق نعمان»

حین وفاتنده هارون رشید، (دفن الفقه والعربیه) دیمش در. امام ابو یوسف، امام محمدی حسب البشریه قسقانیرمش! امام محمدک صیت کالی آفاقی طومتغله مصاحبندن استفاده واستانداذ ایتک اوزره حضورینه کتیرمسنی بر کون خلیفه امام ابو یوسفه امر ایدر. ابو یوسف دخی بالضروره امر خلافتیناهییه امتثالاً امام محمدی کتیرر ایسه ده کویا خلیفه، طول مکشدن خوشلانماز ایشده کندیسنه هر نه وقت کوز اوجیه اشارت ایدرسه درحال طیشاری حیقوب چاغریلنجه ینه ایچری کیرمسی لازم کله جکنی اخطار ایتمش و فی الواقع حضور خلیفه ده طاتلی طاتلی صحبت ایدیلیرکن، امام ابو یوسفک اشارت واقعه سی اوزرینه امام محمد بر قاچ دفعه طیشاری حیقمنغه مجبور اولمش. خلیفه امامک صیق صیق طیشاری حیقمنسک سببنی امام ابو یوسفدن صورمش. اوده کویا امام محمد سلس البول علتته مبتلا ایش ده آنکچون بر یرده طول مدت مکث ایده میوب صیق صیق طیشاری حیقمنغه مجبور اولیورمش یولنده جواب ویرمش. حضرت خلیفه دخی «بو علتی اولمسیدی امامک صحبتندن متلذذ و مستفید اولوردق» یازق که علتی بزى او تلذذ واستفاده دن محروم ایتدی. «دیه رک بیان تأسف ایتمش. مؤخرأ امام محمد، امام ابو یوسفک بو حال و قالنه مطلع اولدقده «بکا اسناد ایتدیکی علت کندینک سبب موتی اولسون!» دیه بددعا ایتمکه حقیقه آره سی چوق کچمکسزین امام ابو یوسف، سلس البول علتته مبتلا اوله رق آخرته کتمش دردی رلر.



ایشته بورالری صحیحاً جای عبرتدر.  
 امام اعظمك مشاهیر شاگردانندن بری ده (امام زفر)  
 حضرت تلریدر.  
 هجرت سنیه نك (۱۵۸) سنه سی (۲۸) یاشنده اولدینی حالده  
 بصره ده وفات ایلدی.

محدثیندن علم و عملی جامع، بر وجود نادر الامثال ایدی.  
 حقنده حضرت امام اعظمك حرمتلری زیاده اولوب «قیاسده  
 اصحابك اعلم وافضلیدر.» بیوررلر ایدی.  
 اهالیسنك طلب و رجاسی اوزرینه بصره ده اختیار اقامت  
 بیورمش و بر مدت دخی مسند آرای قضا اولمش در.  
 پدری (هذیل) نامنده بر ذات اولوب اصفهان والیسی ایدی.

§

### مذهب ثانی

ابو عبد الله محمد بن ادریس شافعی حضرت تلرینك مذهبیدر.  
 مشارایهك اسم شریفلری یعقوبدر. ولادت با سعادتلری  
 هجرت سنیه نك (۱۰۰) و ارتحاللری (۲۰۴) سنه سننده واقع  
 اولمش در.

مسقط رأسی (غزه) اولوب ایکی یاشنده ایکن مکه مکرمه یه  
 کتیر یلهرک، اورادنده مدینه منوره یه کیده رک (امام مالک)  
 حضرت تلرندن تحصیل علم ایش و (امام احمد بن حنبل) حضرت تلرینك ده

حلقه تدریسنده بولمش در. کریم الخصائل و جامع الفضائل اولان  
 مشارالیه ابو عبدالله الشافعی حضرت تلرینك مناقب جلیله لرینی مین  
 اولق اوزره اون اوج جلد کتاب یازلمش در.  
 مصرده (قرافه) نام محله مدفوندر. تره سننده شو ایکی  
 بیت یازیلیدر.

«قدکان صاحب هذا القبر جوهرة، نفیسة صاغها الباری من النطف  
 «سمت فلم تدری إلا یام قتیته، فردها غیرة منه الى الصدف»

امام موسی الکاظم حضرت تلرینه انتسابی جهتیله بعضیلری  
 امام شافعینك رفضنه ذاهب اولمشلر ایدی. اوده آل کرام حضرت  
 محمد اولان محبتی کتم ایتیه رک شعر آتی ایله علله اعلان  
 بیورمشلر در.

### شعر

یا راکباً قف بالحصب من منی واهتف بساکن ضیفها والناهض  
 سحرأ اذا فاض الحجج الى منی فیضا کما نظم الفرات الفاض  
 ان کان رفضاً حب آل محمد  
 فلیشهد الثقلان انی رافضی  
 امام شافعینك اشعار جیده سی الحاله هذه زیور السنه ادبدر.  
 بیت مشهور آتی دخی آنکدر.

ولولا الشعر بالعلماء یزری  
 لکنت الیوم اشعر من لید



امام سلیمان، امام حسن، امام ابو ثور، امام ابو ابراهیم المزنی  
اجله اصحاب شافعیاندر.

§

### مذهب ثالث

امام مالک بن انس حضرت تارینک مذهیدر.  
امام مشارالیه حضرت تارلی هجرت سنیه نک (۹۱) و علی روایه  
(۹۵) سنه سنده مدینه منوره ده تولد و (۱۷۹) یاخود (۱۷۴)  
تاریخنده ینه اوراده وفات ایدوب (بقیع) نام محله دفن اولندی.  
علوم شرعیه یی زهری، یحیی بن سعید، نافع، هشام بن  
عروه، زید بن اسلم، ربیع بن ابی عبد الرحمن مثالو اجله  
علمای کرامدن اخذ واستماع ایدوب امام شافعی، محمد بن ابراهیم  
بن دینار، ابو هاشم، عبد العزیز بن ابی حازم، معز بن عیسی،  
یحیی بن یحیی، عبد الله بن مسلم، عبد الله بن وهب کبی ذاتلر  
دخی کندیلارندن مستفید اولمشلردر.

تعلیم علم شریفده فرط اعتنالی بر درجه ده ایدی که، نقل  
حدیثه باشلامق مراد بیوردقلرنده تجدید وضو، تسبیح لویه،  
استعمال طیب ایدرلردی. آیاق اوزرنده، با خصوص اثنای  
طریقده نقل حدیثی کریه کوررلردی.

آخر عمرلرنده، کبرسن وضعف شیخوختلری حالنده بیله  
روضه مطهریه حرمة اصلا حیوانه بنامشلردر.

(منصور خلیفه) طلاق مکرهده حدیث روایتی منع ایلدیکی  
حاله بو منعی سمع اعتباره آلمادیغندن حضرت امامی ضرب  
ایتدیردی.

(هارون الرشید) دخی برسنه ادای حجندن صکره مدینه  
منوره یه کلوب کندیلرینی - حدیث شریف استماعی آرزوسیه -  
چاغردقده امام مشارالیه «تعلیم علمه راغب اولانلر علمانک اولدیغی  
یره کلیرلر؛ یوقسه علم کیسه نک آیاغنه کتیز.» دیمکه (هارون)  
بالذات قالقوب خانه امامه کتدی. او اثناده امام «بر علم،  
علی بر کیسه یه تخصیص ایدوب ده سائرلرینی منع ایلسه، نه تخصیص  
ایلدیکی کیسه، ونهده بشقهلری مستفید اولور.» مألنده بر حدیث  
شریف اوقوددی. (هارون) درحال منادیلر واسطه سیله اصحاب  
حدیثی اول مجلس ملائک انیسه جمع ایتدیردی. بونک اوزرینه  
حضرت امام «من تواضع للعلم یرفعه الله» حدیث شریفی روایت  
ایلدکده (هارون) یرندن قالقوب سائر حضار ایله برابر حلقه  
نشین تدرس واستماع اولمشدر.

ایکی خلیفه نک حال وشانلری شو حکایه دن مقایسه اولنه بیایر.  
علم حدیثده کتب سته نک برنجیسی اولان (موطأ) نام  
تألیف لطیف حضرت امامکدر.

§

### مذهب رابع

امام احمد بن محمد بن حنبل الشیبانی حضرت تارینک مذهیدر.



مشار اليه (۱۶۴) تاريخننده تولد و (۲۴۰) ياخود (۲۴۱) سنه سنده وفات ايتمش در .

حق عاليرنده «حجة بين الله و بين عبيده» دينمش بر فاضل متورع ايدى . علوم شرعيه ده تصانيف كثيره سى وارد ر . كتب احاديثدن «مسند احمد بن حنبل» جمله آثار جليله لرندندر . عقلره حيرت ويره جك درجه ده نيجه بيك حديث شريف ، حفظ ايتمشدى . علمدن مستفيد اولانلر چوقدر .

خلفاي عباسيه دن (معتصم) زماننده وزير (ابن ابى داود) ك ميدانه چيقارديني خلق قرآن مسئله سندن طولاني مشاراليه دخى حضور خليفه كتيريلوب قرآن كريمك مخلوقيتنى اقرار ، تكليف اولندقه قبول و اقرار ايتديكندن اللرى باغلانوب مبارك دريلرى ياريلنجيه قدر ضرب اولدى ، و برنجى قامچيده (بسم الله) ايكنچيسنده (لاحول ولا قوة الا بالله) او چنجيسنده (القرآن كلام الله غير مخلوق) ديدى ، و دردنچيسنده (قل لن يصيبنا الا ما كتب الله لنا) آيت كريمه سنى او قودى و مخضا كرامات عليه لرندن اوله رق اللرى چوزلدكندن در حال پراغلديسه ده اثر ضربدن حاصل اولان ضعف و سقام ، سبب ارحالى اولدى .

امام شافعى ، امام احمد بن حنبل مدحنده شعر آتئى انشاد ايلدى .

قالوا يزورك احمد و تزوره ، قلت الفضائل لا تقارق منزله  
ان زارنى ففضله او زرت ، ففضله فالفصل فى الحالين له

امام احمد بن حنبل دخى شعر آتئى ايله جواب ويردى .  
ان زرتنا ففضل منك تمنحنا ، او نحن زرنالك للفضل الذى فيك  
فلا عد منا كالا حالين منك ولا ، نال الذى يمتنى فيك شانيك

—  
§

امام ماتريدى ،

ابو منصور محمد بن محمود الحنفى الماتريدى حضرتلرى  
عملده سر مذهبز حضرت امام اعظم دن ايكي يوز سنه صكره  
ماوراء النهرده شهرت شعار اولمش در .

(ماتريد) سمرقنده برقرينه نك اسميدر .

ابو منصور ماتريدى حضرتلرى امام اعظم حضرتلرينك  
اعتقادياتده اولان مسلكلرينه سلوك ايله اصول وفروع اعتقاديات  
امامى اظهار و اعلام و مخالفلرينى افحام ايلدى .

(۳۳۳) تاريخنده سمرقنده داربقايه ارحال ايتدى . امام

ماتريدى (شيخ ابو نصر العياض) ك ، اوده (ابوبكر جرجانى) نك ، بوده

(امام محمد بن حسن الشيبانى) نك تليذى ايدى .

(مأخذ الشرايع) و (تأويلات اهل السنة) جمله تصانيف

مقبوله لرندندر .



## امام اشعری

شیخ ابو الحسن الاشعری حضرت تترینک سلسلهٔ نسبی بروجه آتی مضبوطدر .

«شیخ ابو الحسن علی بن اسماعیل بن ابی بشر اسحق بن سالم بن اسماعیل بن عبد الله بن موسی بن بلال بن ابی برده بن ابی موسی عبد الله بن قیس الاشعری الصحابی .»

بالاده بیان اولندیغی وجه ایله حنفی المذهب اولانلرک اعتقادده امامی (ابو منصور ماتریدی) حضرتلری اولدیغی کبی خراسان، عراق، شام واقطار سائرده اولان شافعیلرک، مالکیلرک، حنبلیلرک امامی دخی حضرت شیخ اشعریدر .

بویکی امام هام آره سنده اولان اختلافه کذلک بالاده اشارت اولغشدر . بینهماده کی مسائل مختلف فیهانک عبدی قرقه وارر .

تکوین وایمان مقلد مسئلهلری اک مشهورلرندندر .

(۲۶۰) تاریخنده دنیایه کلوب (۳۲۴) یاخود (۳۳۰) سنه سی آخرته کتدی . (۴۰) سنه مقداری مذهب اعتزال اوزره بسط قواعد ونشر ادله ایدوب او مذهبده امام اولمشدی . (۳۰۰) سنه سی حدودنده کوردیکی بر رؤیایه مبنی رئیس معتزله ابو علی الجیائی ایله بالمباحثه مذهب اعتزالدن رجوع ایله اهل سنت وجماعت مسلکینه سالک، و متکلمینه امام اولوب، قواعد وعقائد دینی اظهار وتأیید ایلشدر .

کلبوی مرحوم (جلال) حاشیه سنده دیمشدرکه :

«اشعر لفظی یا شعوردن، یا کسر یاخود فتح شین معجمه ایله (شعر) دن مشتقدر . فتح شین ایله (شعر) دن مشتق ایسه چوق قیللی معناسنی مفید اوله رق صفت مشبهدر . الحاصل نصل تقدیر اولنورسه اولنسون، (اشعر) اول ذاتک علمیدر . (اشاعر) دخی جمعیدر که شیخ اشعرینک اتباع واصحابی بونامی المشلردر . بونلرک هر برینه علی سلیل التغلیب (اشعر) دینیر . (اشاعر) ک آخرینه ده نقله علامت اولمق ایچون - علامه لفظنده اولدیغی کبی - حرف تا الحاق اولنوب (اشاعره) دینلیدی .» بتدی .

تاریخ ابی الفداده مسطوردرکه : شیخ ابوالحسن الاشعری (۳۳۰) تاریخنده مسقط رأسی اولان بغدادده ارنحال دار بقا ایدوب (مشرعة الزوایا) نام محمله دفن اولندی . اول وقت بغدادده بولنسان حنبلیلر، حضرت شیخک و آنک قولنه معتقد اولانلرک کفرینه حکم ایله دملرینی مباح صایارلردی . حتی حضرت شیخک وفاتنده قبرینی آچوب نعشینی احراق بالنار ایده جکالرینی سویلرلردی . بو سبیدن ناشی ارنحالنده اصحاب و تبعای قبرینی کیزله مشلردر . حنبلیلرک بو حال و قاللاری محضاً جهلرندن ایلری کلیوردی . شیخ مشارالیهک والده سی رئیس المعتزله مشهور ابو علی الجیائی نک تحت نکاحنده ایدی . ابی الفدانک ترجمه مقالیده بتدی .

شیخ ابو الحسن الاشعری مذهب اعتزالدن رجوعنده استاذی



وقاین پدری ابو علی الجبائی ایله بروجه آتی برمحاورده بولندی؛  
وبو محاورده دن صکره آرتق مذهب اعتزالک بطلاننه حکم ایله  
آندن آرلدی.

حضرت شیخ اشعری ایله ابوعلی الجبائی نك محاوره سی:  
اشعری - بری مطیع، دیکری عاصی، او چنجیسی صغیر  
اوله رق وفات ایدن اوچ برادر حقنده رأیک نه در؟  
جبائی - اولکیسی مثاب، ایکنجیسی دوچار عقاب، او چنجیسی  
نه معاقب، نه ده مثاب اولور.

اشعری - یا او چنجیسی جناب حقه تظلم حال ایدرک  
«یارب! بنی نیچون حال صغرمده اماته ایتدکده بیومکه براقدک؟  
بیوسه یدم، بلکه مؤمن ومطیع برقولک اولورددمده شمدیکی کبی  
فضل واحسانکدن، نعم جانکدن محروم قلمازدم.» دیرسه، جناب  
ارحم الراحمین آکا نه دیر؟

جبائی - «سن بیوسه یدک؛ عاصی، بناءً علیه مستحق عذاب  
اوله جقدک! آنکچون حال صغرکده وفاتک حقکده خیرلی ایدی که  
سنی بیولتدم.» دیر!

اشعری - اوله ایسه ایکنجیسی ده دهنکشای استرحام اوله رق  
«یارب! مادامکه، بنمده بیونجه سکا عصیان ایده جکمی بیلیردک؛  
نیچون بنی ده حال صغرمده اماته ایتدکده شمدی کرفتار عذاب  
ایدیورسین؟» دیرسه بوکا نه جواب ویریلیر؟  
بوصوک سؤال اوزرینه (جبائی) مبهوت اولدی.


هدایت ازلیسه نوریه مستنیر اولمغه باشلایان حضرت شیخ  
اشعری دخی درحال مذهب اعتزالی ترک ایلدی.

مومالیه «ابو علی محمد بن عبد الوهاب بن سلام» جییک  
ضمی وبای موحده نك تشدیدیه بصره کویلرندن (جبا) نام قریه یه  
نسبت اولنور.

جبائی (۲۳۴) سنه هجریه سنده طوغوب (۳۵۳) تاریخنده  
وفات ایلدی.

جبائی نك مطول برتفسیری اولوب آنده اختیارات غریبه سی  
وارد.

تفسیر مذکوره اهل سنت علماسندن پک چوق ذوات کرام  
ردیه لر یازمشدرکه جمله دن بریسی ده حضرت شیخ اشعری در.





## عقیده اهل سنت

کائنات، ظل زائل و خیال باطل قیامند دکلدر. هر شیءک بر حقیقتی وار. او حقیقت دخی مجهول دکل، معلومدر. علم بر صفتدر که متصفنه موجود و معدوم هر شی آنکه منکشف اولور.

مخلوقه کوره بونک اسبابی ده اوچدر :

حواس سلیمه، خبر صادق، عقل.

حواس، بشدر :

سمع، بصر، شمع، ذوق، لمس.

فلاسفه نك اثبات ایتدیکی دیگر حواس خمس باطنه نك دلائلی اصول اسلامیه موافق اولمادیغندن آنلری اسباب علمدن عد ایتیز.

خبر صادق که، اعتقاده مطابق اولسون اولسون واقعه مطابق اولان خبردر؛ ایکی نوعدر : اولکیسی - خبر متواتر، ایکنجیسی - رسالتی معجزه ایله مؤید اولان رسولک خبریدر.

مطلقا خبر، صدق و کذب محتمل اولان کلامدر.

خبر متواتر، کذب اوزرینه اتفاقلرینی عقل تجویز ایتین جم غفیرک شهادتیه ثابت اولان خبردر.

خبر متواتر، علم ضروری بی ایجاب ایدر.

علم ضروری، علم یقینی دیمکدر که صدقنه عقلک بالضروره حکم ایتدیکی شیدر. یعنی عمل حواس، منضم اولقسزین مجرد عقل ایله حاصل اولان انکشافدر.

رسول، تبلیغ احکام ایچون جانب حقندن خلقه بعث وارسال بیوریلان انساندر.

رسولک صحت نبوت و رسالتی معجزه ایله ثابت اولور.

معجزه، شرف وحی الهی ایله مشرف اولان انیا و مرسلینک دعوائی نبوت و رسالتده صدق مقالرینه شهادت مصلحتیچون یدلرنده طوق بشردن خارج، عاده مخالف اوله رق ظهور ایدن امر غریب، و فعل عجیبدر که نوع بشر، مثلی وجوده کتیرمکدن عاجز اولمغله آکا (معجزه) دینلدی.

خبر رسول، علم استدلالی بی ایجاب ایدر.

چونکه اولاستدلاله، ثنیا رسالتی معجزات ایله ثابت اولان پیغمبرک خبری اولدیغنی نخطر واستحضاره متوقفدر.

ایشته هر خبرکه، شانی بو اوله، صادق و مضمونی واقعدر.

حواس سلیمه و خبر صادق کبی (عقل) دخی اسباب علمنددر.

عقل - نفس ناطقه انسانیه به مخصوص بر قوتدر که نفس آنکه اکتساب علوم و ادراکاته قادر اولور.

الهام که، بطریق فیض قلبه القای معنی ایله مفسردر، اسباب علمدن دکلدر.

عالم که ماسوی اللهدر، جمیع اجزاسیله محدثدر. زیرا اعیان و اعراضدن عبارتدر.

عالم - مادام که، اعیان و اعراضدن، اعیان دخی مادام که، اجسام و جواهردن عبارتدر، حادثدر. چونکه بونلرک هپسی حادثدر.



محدث عالم، جناب واجب الوجود در .  
 مبدأ اوّل، صانع حقیقی اودر .  
 آندن بشقه خالق یوقدر .  
 بر در .  
 قدیمدر .  
 حی در .  
 قادر در .  
 علیم در .  
 سمیع در .  
 بصیر در .  
 شائی در .  
 مرید در .  
 عرض دکدر .  
 جسم دکدر .  
 جوهر دکدر .  
 مصور دکدر .  
 محدود دکدر .  
 معدود دکدر .  
 متبعض، متجزی دکدر .  
 ابعاض واجزادن مترکب دکدر .  
 متاهی دکدر .

مائتله وصف اولنماز . یعنی اشیا به مجانسته وصفی جائز دکدر .  
 کیفیتله وصف اولنماز .  
 هیچ بر مکنده متمکن دکدر .  
 اوزرینه زمان، جاری اولماز .  
 یعنی وجود باری زمان ایله تعیین اولنماز .  
 شبیهی یوقدر .  
 ضدی، ندی یوقدر [\*] .  
 هیچ بر شیئه حاول ایتمز .  
 محل حوادث دکدر .  
 جهت وحیز و مکان و سائر امارات حدوث و امکاندن، حرکت  
 و انتقالدن، جهلدن، کذبدن و سائر صفات و سمات نقصاندن منزه در .  
 علمدن و قدرتندن بر شی خروچ ایتمز . یعنی ممکنات  
 و ممکناتدن بر شی یوق که علمی، و یالکر ممکناتدن بر شی یوق که  
 قدرتی آکا تعلق ایتمیه .  
 فلاسفه نك زعم ایتدیکی کبی، جزئیاتی بیلز دکل، بیلیر .  
 قدرت باری اثر واحددن زیادیه تعلق ایتمز دکل، ایدر .  
 دهریه نك زعم ایتدیکی کبی، ذات پاکنی بیلز دکل، بیلیر .  
 معتزله دن نظامك زعم ایتدیکی کبی، جهلی قبحی یاراتمغه  
 قدرتی تعلق ایتمز دکل، ایدر .

[\*] ند، نونك کسریله، مثل ومانند .



عامه معتزله نك زعم ايتديكي كې، نفس مقدور عبده قدرتي  
تعلق ايتمز دكل، ايدر .

واجب تعالانك صفات ثبوتيه سي سكزدر :

علم، قدرت، حیات، سمع، بصر، اراده، كلام، تكوين .  
جناب حقك بوصفتاری - صفات مخلوقات كې - صكره دن  
حادث اولمش شیلر دكلدر . ازلیدر؛ ذاتیه قائمدر؛ هیچ بر وقت  
ذاتندن آیرلماز؛ ذاتنك نه عینیدر؛ نه غیریدر .

بوصفات ثبوتیه ازلیه «کیفیات و ملکات» جمله سندن دكلدر .  
علم - بر صفت ازلیه درکه، عند التعلق معلومات آنکله  
منکشف اولور. (تعلق ایستر قدیم ایستر حادث اولسون)

قدرت - بر صفت ازلیه درکه، مقدوراته - یعنی ایجاد و اعدامه -  
تعلق ایدنجه تأثیرینی کوسترر .

حیات - بر صفت ازلیه درکه، علمك صحتی ایجاب ايدر .

سمع - بر صفتدرکه، مسموعاتو تعلق ايدر .

بصر - بر صفتدرکه، مبصراته تعلق ايدر .

جناب حق، مسموعات و مبصراتی تخیل و توهم، تأثیر حاسه  
و وصول هوا طریقیه دكل، ادراك تام ایله ادراك ايدر؛ و سمع  
و بصر، صفتارینك قدمندن مسموعات و مبصراتك قدمی لازم کلز.  
نته کیم علم و قدرتك قدمندن، معلومات و مقدوراتك قدمی لازم  
کلدیکی کې .

اراده و مشیئت - ذی حیات اولان ذاتده بولنور بر صفت

درکه قدرتك مقدورات و اوقاتو نسبتی مساوی و علمك تعلق وقوعه  
تابع اولمقوله برابر (مقدورین) دن - یعنی فعل و وجود، ترك  
و عدمدن - برینك اوقاتدن بر وقتده وقوعه تخصیصنی ایجاب  
ايدر .

كلام - الفاظ قرآنیه نك دلالت ایتدیکی معانی شریفه دن  
عبارت بر صفت ازلیه درکه، نظم ایله معبردر؛ سائر صفات ثبوتیه  
كې، بودخی ذات پاك خدا ایله قائمدر؛ حرف و صوتدن مجرد،  
برمعنادرکه، آكا (كلام نفسی) اطلاق اولنور .

ذات الله ایله قائم اولان (كلام نفسی) حروف و اصوات  
جنسندن دكلدر .

متلو و مقروء اولان (كلام لفظی) حادث ایسه ده آكاده  
(قرآن) اطلاق اولنور .

تكوين - الله تعالانك یاراتمه سی اولمق دیمكدر که، مکنوناته  
تعلق ايدر بر صفت ازلیه در .

آخرته انطباعسز، شعاعسز اوله رق مؤمنلره رؤیت باری  
میسر اوله جقدر .

جناب حقك دیله دیکی اولور؛ دیله مدیکی اولماز. جناب حق،  
غنی عن العالمیندر .

برشیده برشیئه محتاج اولماز .

اوزرینه برشی واجب دكلدر .

اثابه ایدرسه فضلیله، معاقبه ایدرسه عدلیله ايدر . افعال خدا



کر چه حکمت و مصلحتدن خالی دکلدر؛ لکن معلل بالغرض دکلدر.  
اللهدن بشقه حاکم یوقدر.

جناب حق، ایشلدیکی و حکم ایتدیکی شیده جور ایله، ظلم  
ایله وصف اولنماز.

کفر و ایمان، طاعت و عصیان، کافه افعال عبادی یارادان اودر.  
بونکله برابر عبدك هر فعلی مجبوری واضطراری ده دکلدر؛  
افعال اختیاریه سی ده واردرکه، مثاب و معاقب اولمه سی او افعال  
اختیاریه سببیه در.

بوده محققدرکه، کافه افعال عباد، الله تعالانک قضا سیله در؛  
فقط بونلردن یالکز حسن اولانلری رضا سیله اولوب قبیح بولنانلری  
رضا سیله دکلدر.

هر فعلك خالق حقدرد؛ کاسی عبددر.

استطاعت، مع الفعلدر. یعنی فعله مقارندر. نه بعد الفعلدر؛  
نه قبل الفعلدر [\*].

عبد، وسعنده اولیان شیله مکلف و مأمور اولماز. مضروبده  
حاصل اولان الم، شیشه شکسته ده حاصل اولان انکسار، عقیب  
قتلده موت کبی شیلرک دخی هپسی مخاوق اللهدر؛ بونلری تخلیقه ده  
عبدك صنع و مدخلی یوقدر.  
مقتول اجلیه میتدر.

[\*] استطاعت، فعل عبدك ملها الحصولی اولان حقیقت قدرت  
دیمکدر.

موت، میتله قائم اولوب الله تعالانک مخلوقیدر.  
اجل، بردر.

رزق حلال اولسون، حرام اولسون، رزاق عالم اولان الله  
ذوالجلالک برای اکل و تغدی حیوانه سوق ایتدیکی شیئک اسمی  
اولوب هرکس، رزقی نه ایسه آتی استیفا ایلر.

بر کیمسه نك کندی رزقی اکل ایده مامسی، یاخود برینك  
رزقی آخرك اکل ایده بیلسی ممکن و متصور دکلدر؛ زیرا رزاق  
عالم، هر شخصه غذا اولق اوزره برر شی تقدیر و تخصیص  
بیورمشدرکه، او مابه التغدی بی شخص آخرك اکل و تناول  
ایده بیله سی ممتنع و محالدر.

جناب حق، قوللرندن دیلدیکنده ضلالت، اراده بیوردینی  
کیمسه ده ده هدایت، خلق ایدر.

انسانی سر منزل مطلوبه ایصال ایتمین طریقه سلو کدن عبارت  
اولان (ضلالت) و سمت نجاته موصل اولان یولی بولمقدن کنایت  
اولان (هدایت) منحصرأ اراده آلهیه ایله تحقق ایدر.

عبدده کوره اصلح اولان حالی یاراتمق الله تعالی اوزرینه  
واجب دکلدر.

قبرده کافرلرله بعض عصات مؤمنین ایچون (عذاب) و جناب  
حقك بیلدیکی و دیله دیکی وجه ایله اهل طاعتی (تنعیم) و (سؤال  
منکر و نکیر) دلائل سمعیه ایله ثابت اولوب حقدرد.

معاد جسمانی - یعنی حشر اجساد، و اعاده ارواح، حقدرد.



وزن، کتاب، حساب، سؤال، حوض، صراط، جنت، جهنم، بونلرک هپسی حقدرد.

جنت و جهنم، الآن مخلوق و موجوددرلر؛ باقیدرلر؛ کندیلری فانی اولماز؛ اهللری ده فنا بولماز؛ یعنی هر ایکسی ده دائم اولوب بونلره عدم مستمر، طریان ایتمز. معصیت کیره، عبد مؤمنی ایماندن چیقارماز؛ کفرده ادخال ایتمز.

حق تعالی معاصی نک شرکدن ماعداسنی دیلرسه عفو ایلر. معصیت صغیره اوزرینه ده عقاب جائدر.

استحلال حرام، کفردر.

رسل و اخیارک اهل کبار حقهده شفاعتلی ثابتدر.

مؤمنین دن اولان اهل کبار، توبه سز وفات ایتسه ده مخلص فی النار اولماز.

ایمان، حضرت پیغمبری حق تعالی جانبندن کتیردیکی علم ضروری ایله معلوم اولان هرشی ده - اجمالاً - قلب ایله تصدیق و لسان ایله اقرار ایتمکدر.

اعمال که طاعات دیمکدر؛ حد ذاتنده تزايد ایده بیلیرسه ده ایمان آرتماز، اکسیلز. زیرا اعمال، حقیقت ایمانده داخل دکلدرد. یعنی حقیقت ایمان، تزايد و تناقص ایتمز.

ایمان و اسلام بردر. یعنی بحسب الذات متحد اولوب تحقده احدهما آخری مستلزمدر.

عبدک کندیسنده تصدیق و اقرار بولندیقی وقت - ایمانی

متحقق اولدیغیچون - «بن حقا مؤمنم». دیمه سی صحیح اولور. فقط «بن ان شاء الله مؤمنم». دیمه سی لائق دکلدرد.

سعید، بعضاً شقی اولور. [۱]

شقی دخی بعضاً سعید اولور. [۲]

بعثت انبیاء، ارسال رسل حقدرد.

الله ذوالجلال، مبشرین و منذرین وناسه - دنیا و آخرت امورندن محتاج الیه اولدقلری شیلری - مبینین اولدقلری حالده بر طاقم پیغمبران ذیشان بعث و ارسال، و آنلری خارق العاده معجزه لرله تأیید بیورمش اولدیغی محقدرد.

انبیائک اولی حضرت آدم، و آخری حضرت محمددر.

«صلوات الله تعالی علیهم اجمعین».

بعض احادیث شریفه ده، انبیائک عددی بیان بیورلدیغی مروی ایه ده اولی اولان تسمیه ده عدد اوزرینه اقتصار اولنماقدرد؛ زیرا الله تعالی (منهم من قصصنا علیک و منهم من لم نقصص) بیورمش در؛ عدد انبیایی ذکرده ایه انبیادن اولمیانلرک دخی صاییلانلر ایچنه قائلسی - یاخود بعضیلرک انبیادن اولدقلری حالده صایی خارجنده براغلمسی کی بر حالک عدم وقوعندن امنیت حاصل اوله ماز.

انبیای ذیشانک کافه سی جانب حقندن مخبر و مبلغ ایدیلر؛

صادق و ناصح ایدیلر.

[۱] نعوذ بالله بعد الايمان ارتداد سببيله.

[۲] بعد الکفر ایمانه کلمک سببيله.



انبیای ایشان، کذبیدن معصوم ایدیلر.  
انبیائک افضلی حضرت محمد علیه السلام افندمزدر.  
ملکدر دخی جناب حقک دائماً امریله عامل اولان قوللری  
درلر.

ملکدر، ارککلکلهده، دیشیلکلهده وصف اولنمازلر.  
الله تعالانک کتب منزلهسی حقدر؛ بونلری انبیاسنه انزال  
وامرینی، نهینی، وعیدینی، وعیدینی اوکتابلرده بیان بیورمشدر.  
بوکتابلرک هپسی کلام المهدر؛ کلام الله دخی واحددر.  
تعدد و تفاوت یالکز مقروء و مسموع اولان نظمدهدر. قرآن  
عظیم الشانکده کتب منزلهنک افضلی اولسی بو اعتبار  
ایلهدر.

رسول الله صلی الله علیه وسلم افندمزک بشخصه - یعنی جسد  
شریفلریله - حال یقظهده سخاواته، آندن صکرهده الی ماشاء الله  
اعلای علینه معراج سعادتلری حقدر.  
کرامات اولیا حقدر.

بعد الانبیا افضل بشر، خلفای راشدیندر.  
خلفای راشدین «ابو بکر، عمر، عثمان، علی» رضوان الله  
تعالی علیهم حضراتیدر.

رسول الله صلی الله علیه وسلم افندمزدن صکره خلافت  
وامامت بو ترتیب اوزره ثابتدر؛ حقدر.  
هر بربر وفاجرک آردنده نماز قیلق جائدر.

اصحاب کرام، حقنده سوء تعبیردن کف لسان اولنه رق کندیلرینی  
خیردن بشقه صورتله یاد ایتمک جائز دکلدر.

عشرة مبشره نکه، طرف اشرف رسالتپناهیدن کندیلری  
جنتله تبشیر بیورلمشدر؛ اهل جنتدن اولدقلرینه شهادت ایلرز.  
عشرة مبشره - «ابو بکر، عمر، عثمان، علی، طلحه، زبیر،  
عبد الرحمن بن عوف، سعد بن ابی وقاص، سعید بن زید، ابو  
عبیده بن الجراح» رضوان الله تعالی علیهم اجمعین حضراتیدر.  
کذلک حضرت فاطمة الزهرا و فرزندان ذیشان حضرت  
حسن و حضرت حسین علیهم السلامکده اهل جنتدن اولدقلرینه  
شهادت ایلرز.

اهل بیعت رضوان، اهل بدر، اهل جنتدرلر.  
اهل قبله دن کیمسه بی اکفار ایتیمز. مکر التزام کفر ایلیه.  
یعنی قادر؛ عالم اولان صانع تعالی و تقدس حضرتلرینی نفی  
- یاخود - ذات احدیتته شریک اثبات ایلر؛ یاخود - نبوتی  
و حضرت نبی اکرمک جانب حقدن کتیردیکی بالضروره معلوم  
اولان شیئی، یاخود - حرمتی اوزرینه اجماع امت منعقد اولان  
محرماتی استحلال کی، مجمع علیه اولان بر امر دینی بی انکار  
ایدرسه، کفرینه حکم اولنور.

سفر و حضرده خفین اوزرینه مسحی تجویز ایلرز.  
نیز التمر دینیلن خرما شربتی حرام دکلدر.



اولياء اللهدن هيج برى هيج بروقت درجه انبياه اصلا واصل  
اوله ماز .

عبد مادام كه عاقل وبالغدر، امر ونهى الهى كنديسندن  
ساقط اوله بيله جك بر مرتبه به واصل اوله ماز .

نصوص، ظاهر لرى اوزرينه حمل اولنور .  
ظواهر دن اهل باطنك استخراج وادعا ايتديكى معانى به عدول،  
الحاددر .

رد نصوص، استحلال معصيت، كفر در .  
نصوصى استهانه واستحقار، شريعت غرايى استهزا كفر در .  
يأس ده كفر در؛ امن ده كفر در .  
كاهنى - غيبدن خبر ويرديكى شى ده - تصديق، كفر در .  
معدوم، شى دكلدر .

بر حيات اولانلرك امواته دعالرى، اموات ايچون تضدقلى  
امواته موجب نفع وفائده در .  
جناب حق، قوللرينك دعالرى اجابت و قبول، حاجتلىرى  
قضا ايدر .

دجالك، دابة الارضك، يا جوج و مأجوجك خروجه،  
حضرت عيسى عليه السلامك سمان نزولى، شمسك مغرب  
جانبدن طلوعى كى، يوم قيامتك اشراط وعلاماتنه دائر حضرت  
نبى محترم واعلم صلى الله تعالى عليه وسلم افندمرك خبر ويرديكى  
شير حقددر .

مجتهد، اجتهادنده بعضاً خطا، بعضاً اصابت ايدر .  
رسل بشر - رسل ملائكه دن، رسل ملائكه - عامه بشر دن،  
عامه بشر - عامه ملائكه دن افضلدر .

تم الجلد الاول، من كتاب (آراء الملل) بعون الله عز وجل .

### شعر

سهرى لتتقج العلوم الذلى، من وصل غانية وطيب عناق  
وتمايلى طرباً لحل عويصة، عندى لاشهى من مدامة ساق  
وصرير اقلامى على صفحاتها، اشهى من الدوكاه والعشاق  
و الذ من نقر الفتاة لدفها  
نقرى لالتقى الرمل عن اوراقى

«الحمد لله الذى هدانا لهذا وما كنا لنهتدى لولا ان هدانا الله»  
وصلى الله على اشرف جميع الانبياء والمرسلين وعلى آله وصحبه اجمعين .  
ثم اقول كما قال صاحب المواقف «نسأل الله تعالى ان يثبت  
قلبنا على دينه، ولا يزغنا بعد الهداية، ويعصمنا عن الغواية، ويوفى  
فقنا للاقتداء برسول الله واصحابه والتابعين لهم باحسان، ويعفو  
عن طغيان القلم، ومالا يخلو عنه البشر من السهو والزلل، وان  
يعاملنا بفضله ورحمته انه هو الغفور الرحيم» .

انقره، فى ۲۴ جمادى الاولى ۱۳۰۳



— ❧ فهرس ❧ —

صحیفہ	صحیفہ
۳۸ امر خلافتہ اختلاف	۳ طوغری سوز
۴۴ خطبہ حضرت صدیق	۶ مقدمہ
۴۵ استطراد	۸ تمہید
۴۷ حضرت جی علیہ السلامدن	۱۱ اهل الاهواء
ارثك ثبوتی مسئلہ سندہ	۱۸ مشرع
اختلاف	۱۹ کفر و ایمانی ایجاب ایتیمان
۴۸ استطراد	اختلافات
۴۹ زکاتی یعنی مکلف	۲۰ استطراد
اولد قلمری ویرکونی ویر-	۲۸ اسامہ بن ریدک جیشندن
مک ایستہ میان اعراب ایله	تخلفده اختلاف
مقاتلہ خصوصندہ اختلاف	۳۸ رحلت نبویہده اختلاف
۵۰ استطراد	۳۴ استطراد
۵۴ حضرت ابوبکرک عمر	۳۵ ینہ استطراد
بن الخطابی استخلافده	۳۵ صحابی اطلاقہ سزاوار
اختلاف	اولانلر کیلر در؟
۵۶ وصیتنامہ حضرت صدیق	۳۶ طبقات اصحاب



صحیفه

صحیفه

- ۵۷ وصایای حضرت صدیق ۱۰۰ ثمامیه  
 ۵۸ امر خلافت حضرت ۱۰۱ خیاطیه  
 عثمانده تقرر ایدنبجهیه قدر ۱۰۲ جاحظیه  
 شوری خصوصنده اختلاف ۱۰۳ کعبیه  
 ۷۳ کالاه مسئله سنده اختلاف ۱۰۴ جبائییه  
 ۸۱ خلافتیات - فرق اسلامیه ۱۰۵ ششییه  
 ۸۵ واصلیه ۱۰۷ شیعه  
 ۸۶ عمریه ۱۰۷ غلاة  
 ۸۷ هدایه ۱۰۷ سباعیه  
 ۸۹ نظامیه ۱۰۹ کاملیه  
 ۹۲ اسواریه ۱۰۹ بنانیه  
 ۹۳ اسکافیه ۱۱۰ مغیریه  
 ۹۳ جعفریه ۱۱۲ حناحیه  
 ۹۳ بشریه ۱۱۲ منصوریه  
 ۹۴ مزدریه ۱۱۴ خطابییه  
 ۹۵ هشامیه ۱۱۵ غرابیه  
 ۹۷ صالحیه ۱۱۶ ذمیه  
 ۹۷ حابطیه ۱۱۷ هشامیه  
 ۹۸ حدبیه ۱۱۹ زراریه  
 ۹۹ معموریه ۱۱۹ یونسیه

صحیفه

صحیفه

- ۱۱۹ شیطانییه  
 ۱۲۰ رزامیه  
 ۱۲۰ مفوضه  
 ۱۲۱ بدائییه  
 ۱۲۱ نصیرییه - اسحاقیه  
 ۱۲۲ اسماعیلییه  
 ۱۳۱ استطراد  
 ۱۴۰ باطنیه اسماعیلییه نك احوال  
 تاریخیه سندن بر نبذه  
 وحسن صباحك ترجمه  
 حالی  
 ۱۵۰ زیدییه  
 ۱۵۱ جارودییه  
 ۱۵۳ سلیمانییه  
 ۱۵۴ بتیرییه  
 ۱۵۴ امامیه  
 ۱۵۸ خوارج  
 ۱۵۸ محکمه  
 ۱۶۵ بیهسییه  
 ۱۶۶ ازارقه  
 ۱۶۷ مجذبات  
 ۱۶۹ اصفرییه  
 ۱۷۰ اباضیه  
 ۱۷۳ استطراد  
 ۱۷۳ اجارده  
 ۱۷۹ مرجئه  
 ۱۸۰ یونسیه  
 ۱۸۱ عییدیه  
 ۱۸۱ غثانییه  
 ۱۸۳ ثوبانییه  
 ۱۸۴ ثومنییه  
 ۱۸۵ استطراد  
 ۱۸۶ بحارییه  
 ۱۸۷ جبرییه  
 ۱۸۸ مشبهه  
 ۱۹۲ فرفه ناجیه  
 ۱۹۵ مذاهب اهل سنت  
 ۱۹۶ مذهب اول  
 ۲۰۰ مذهب ثانی  
 ۲۰۲ مذهب ثالث  
 ۲۰۳ مذهب رابع  
 ۲۰۶ امام اشعری  
 ۲۱۰ عقیده اهل سنت



# خطا صواب جدوليدر

صواب	خطا	صحيفه	سطر
بالمذهب	بالمذاهب	۱۴	۱۲
واضربوا	واخربوا	۲۵	۱۸
عندمده	عندنده	۴۵	۳
رضى الله عنه	رضى الله	۵۰	۴
شيئه عقل	شيئه ديت	۸۱	۱۶
زين العابدين	زيد العابدين	۱۵۰	۱۴
	۱۶۰	۱۶۰	۲
دوست	دوسب	۱۷۶	۱۳
بيلاهيم	بيلاهلم	۱۸۱	۱۷